

يوميّات اتنين مخطوبين
هبة سيد عبد العاطي

يوميات اثنين مخطوبين / يوميات

هبة سيد عبد الحافظي

الطبعة الأولى ، ٢٠٠٨م

الطبعة الثانية ، ٢٠٠٩م

الطبعة الثالثة ، ٢٠١٠م



دار اكتب للنشر والتوزيع

القاهرة ، ١٠ ش عبد الهادي الطحان ، المرج

موبايل : ٠١١٠٦٢٢١٠٣

E - mail : dar_oktob@gawab.com

المدير العام :

يحيى هاشم

تصميم الغلاف :

حاتم عرفة

رقم الإيداع : ٢٠٠٧/٢٤٠٢٧

جميع الحقوق محفوظة ©

يوميات اتنين مخطوبين

هبة سيد عبد العاطي

الطبعة الثانية

٢٠١٠



دار الكتب للنشر والتوزيع

أهداء

صعب أن أكتب أهداءً مختصراً لأن هناك أشخاص عديدين أعزاء
على كثيراً وكانوا سبباً مباشراً أو غير مباشر في أن أكتب هذه
اليوميات وأن أنشرها كذلك بدلاً من أبي الرائع الذي كان يجعلني
أكتب بنفسى خطابات لما نجيوى وبلبلظ، و "مترنى الكتونه" ماما
التي كانت هداياها دائماً قصصاً و كتباً، وآخر فرسان هذا العالم أخي
إيهاب، وأخي عبدالعاطى وأستاذى القدير في المدرسة الابتدائية أستاذ
عبدالناصر يحيى الذى كان يترك لى فعل ما يملو من كتابة وإخراج
للمسرحيات في حفلات المدرسة ودكاترة قسم اللغة الإنجليزية بكلية
آداب جامعة القاهرة وبخاصة د. أحمد هانى الذى كان له الفضل
الأول في أن أبدأ الكتابة بمجدية وكذلك نشر لى في المجلة الإلكترونية
التي يرأس تحريرها (بصر و طلل) والتي نشرت بها أولى حلقات هذه
اليوميات وأخيراً وليس آخراً أصدقائى الذين هم هبة الله لى وجزء من
رحمته على في هذا العالم الصعب وقد كنت أود أن أذكر اسمائهم جميعاً
في الأهداء ولكنى لا أحتاج لذلك لأنهم (عارفين أنفسهم كويس)
ولكنى ذكرت اسماء معظمهم في اليوميات!
إليكم جميعاً أهدي يوميات اثنين مخطوئين.

هبة

ربما سبب بداية كتابتي لهذه اليوميات لم يكن سببا سعيدا
(إذا كان هناك شئ يسمى سببا سعيدا) ولكن بمجرد صدور
الكتاب ورؤية ردود أفعال القراء كانت ولا زالت سعادتي لا توصف.
ولأنى مش ضامنة أخذ أوسكار أحسن كتاب (إذا كان هناك مثل هذه
الجائزة) فسأتخيل الآن أنى على ذلك المسرح الكبير أشكر كل من
ساندنى فى نشر هذا الكتاب وأولهم بالطبع أمى التى شجعتنى على
البدء فيه وأستاذ يحيى هاشم الذى كان استقباله للكتاب مثلجا للمصدر
وكذلك د. أحمد الشامى أستاذى بالجامعة ورئيس تحرير المجلة
الإلكترونية بص وطل التى نشرت بها بعض أجزاء من اليوميات.
"عارفة إنى طولت عليكم بس الموسيقى ورايا على المسرح لسه ما
خلصتش فألحق أقول باقى الشكر"
أشكر بشدة م. مصطفى السعدنى الذى صمم لى غلاف الطبعة الأولى
(مجانا على فكرة)
و لا أشكر جميع صديقاتى التى أوحين لى بالكتاب ووقفن بجانبى طوال
عملية نشره لأنهن صاحبات هذه اليوميات الأصلية.

وأولا وأخيرا

الحمد لله

هبة سيد عبد العاطى

كلما تحدثني أُمي عن زواج أحد الأقارب أو القريبات وعن
الجهاز الكبير الذي رآته عند فرش المتزل الجديد، تتور ثائرتي
وأصاب بالحموضة من شدة الغيظ، فوالداي قد أصرا على
توفير نصف مرتبي من أجل ذلك الزواج الذي قد يأتي يوما أو
لا يأتي. ولكن ما دخلني أنا بكل هذا ؟! إذا أرادوا أن
يزوجوني فليدفعوا هم وليس أنا . لِمَ لا يُسمح لي بالتصرف في
المرتب كيف أشاء؟! . أنا مثلا أريد التوفير لشراء سيارة في
خلال خمس سنوات. وكبداية أريد أموالا لتعلم القيادة
والحصول على الرخصة. وكذلك أريد إكمال دراستي العليا. أنا
أريد نصف المرتب الذي يُؤخذ مني "غصبا واقتدارا". ثم من
هذا الذي يستحق أن أحرم من نصف مرتبي بسببه ؟! . حاجة
تغيظ!

أنا لن أصرف قرشا برغيتي على شخص لا أعرفه يدخل في
حياتي فجأة متوقعا أن أصبح خادمه المطيع، "بلا جواز بلا
نيلة!!!"

سارة

تحسدي أختي لكوني رجل أستطيع أن أختار لنفسي وأن
أقرر متى أتزوج، في حين أنها كفتاة تضطر لانتظار الفارس
المنتظر وليس بيدها حيلة. ولكنها لا تدري كم الأعباء الملقاة
على كاهلي لكي أفكر في الزواج. بالتأكيد أحلم أن أمسك
يوما ما بيد فتاة - هي زوجتي- ونسير على الكورنيش وهي
تسلي باكل الترمس الذي يزيد بطنها المنتفخ من الحمل
انتفاخا. ولكن من أين لي بالمال الذي يجعلني أتقدم لخطبة أي
فتاة. وكذلك فأنا لا أريد أي فتاة. كيف أعرف أن هذه الفتاة
التي سأقدم لها ستكون مريحة في صحبتها، فبالرغم من صغر
سني واشتياقي إلى متع الزواج المعروفة، إلا إنني أدرك تماما أنه
بعد أيام فلائل سيكون ما يهمني أكثر هو طيبة زوجتي وخفة
دمها واستمتاعي بحديثها. فأنا أعرف أصدقاء قد تزوجوا
وكانوا يتصلون بالثلة قبل مرور الأسبوع الأول على
زواجهم، وذلك لأنهم قد شعروا بالملل. ملل!!! وهم مازالوا
في بداية البداية، إذا ماذا سيفعلون بعد عاما أو عامين. "بلا
جواز بلا نيلة!!!"

عمر

منذ أسبوع ألحت لي أمي بأن إحدى صديقاتها لديها ابن
يكبرني بثلاث سنوات، يعمل كمهندس كمبيوتر في إحدى
الشركات الخاصة. وهي تعرف أنه شاب مؤدب ووسيم
وسيزورنا هو وأهله ليشربوا معنا الشاي يوم الخميس القادم.
كنت أظن أنني سأثور ولن أرضى بفكرة الزواج الآن، فأنا أريد
أن أبني مستقبلي، فهذا ليس فعلاً يقتصر على الرجال فقط،
ولكن لا أدري ما الذي أسكتني؟ لعلّ الفضول لمقابلة شخص
يريد الزواج بي.. لا أدري. كنت أظن أنني لن أريد أن أقابل
عريساً آخر بعد مغامراتي العديدة مع عرسان غالباً يأتونني من
مصانع تصنع هذه الأشكال العجيبة من البشر خصيصاً لكسي
ينغصوا على حياتي. آخرهم أرسل قريته لتسأل عن مرتبي قبل
أن يتقدم ومن سبقه لم يكمل تعليمه ولكنه كان لديه شقة،
وكان شفته هذه كثر سليمان مثلاً اتصلت بصديقتي (مرورة)
وأخبرتها بكل ما يدور في بالي فضحكت ودعت لي بالتوفيق
وأكدت على أن أصلي صلاة الاستخارة، فصليت بمحرد أن
أنهي مكالمتي معها. وظللت في حالة قلق طوال الأسبوع
وكنت أبكي يومياً في التليفون وأنا أحدثها وأنا أتخيل قصصاً
مأساوية إذا لم يعجبني العريس وأجبرني والدي على الزواج

منه، وكيف سأعيش في بؤس. وكانت مروة تضحك عليّ
وتقول أنني أستبق الأحداث و أنني "نكدية". ولكن القلق كان
يؤلم قلبي ومرّ الأسبوع سريعاً. واليوم هو الخميس المنتظر وربنا
يستر.

سارة

منذ شهر أخبرتني أمي عن صديقة معها في العمل عندها فتاة جميلة تصغرنى بثلاثة أعوام، وهى تعمل في إحدى الشركات. والدها رجل طيب و محترم. فأخبرتها أنني لا أملك حالياً ما يعينني على مصاريف الزواج وأن كل ما ادخرته خلال سنين عملي مبلغ غير محترم! وفي الحقيقة كنت خائف من اختيارات أمي العجيبة فهي تأتيني كل فترة بعروسة تخبرني عنها أختي مروة بالعجب العجائب، ولكنني بالطبع لم أخبر أمي برأيي في خياراتها ولكنني شددت على موضوع حالتي المادية فطمأنتني أمي وأخبرتني أن والدي سيساعدني وأن هذه هي سنة الحياة. فحدي كذلك قد ساعد أبي عندما تزوج من أمي وعاشا أولى سنين زواجهم في إحدى الغرف ببيت جدي إلى أن وسع الله على أبي واشترى هذه الشقة. ولكنني لم أكن أريد العيش في بيت والدي، وكان رد أمي أن أمامي الحل في أخذ شقة إيجار جديد. ولما كنت أشعر بالاكئاب منذ فترة لشعوري بالعجز عن الزواج في وقت قريب، فقد استمعت لحديث أمي المتفائل ووعودها بمساعدة أبي ، وطبعاً لا أحد يستطيع الوقوف أمام رغبة أمي حينما تُصرّ على شيء . ومن الواضح أنها تصر على هذه العروسة بشكل خاص، ولذلك توكلت على الله واصلت

الاستخارة. و اتفقنا على مقابلة العروسة فى بيت أهلها يوم
الخميس القادم، وكاد التوتر يقتلني، فقد خشيت ألاّ تعجبني
وكم سيكون الموقف وقتها مخرجاً عندما أرفضها بعد أن ذهبنا
إلى بيتهم. ربنا يستر.

عمر

اللقاء الأول

الخميس المنتظر قد حان، وتوتري أصبح لا حدود له وإن كان مصحوبا بلسعة سعادة، فهي ليست سعادة بالمعنى الكامل ولكنني متحمسة للموقف -واهو على رأى نبيلة السيد "عريس يا امااى" - . ليس من عادتي استخدام الماكياج وفكرت لفترة أن أستخدمه هذه الليلة ولكني تراجعمت، ليراني كما أنا - وإن ماكانش عاجبه يبقى أنا خسارة فيه!! - ولكنني قمت بعمل عدة "ماسكات" لبشرتي من باب رفع معنوياتي لا أكثر ولا أقل، تحدثت تليفونيا مع (مروة) وظلّلت تنصحيني بما أفعله عند اللقاء المرتقب، مثلا: أن أدخل وعيني معلقة بالسجادة وعلى وجهي يرتسم الحياء؛ وأن أجلس على طرف المقعد ولا "أنجص" مثل الأولاد مثلما أفعل دائما . وكنت أضحك على ما تقوله وأعدنها بأن أفعل العكس، فهذا العريس عليه أن يعرفني كما أنا بلا تزويق، فأنا عصبية ولا أطيق تحكّم الرجال و.....و... كنت أتحدث مع (مروة) أو (ريهام) صديقتي كل ساعة ، و والدتي لم تحاول تأنيبي على كثرة استخدامي للتليفون كمعادتها، حيث يبدو أنها كانت تقدر توتري و احتياجي للمكالمات معهما. وجاء وقت الغشاء ولم أستطع الأكل من شدة التوتر. للحق كنت أحاول أن أبهو طبيعية أمام

الجميع وأن الموضوع لا يهمني، ولكن معدني الخائنة فضحتني
عندما أصبتُ بالحموضة من شدة التوتر وظللت أشرب في "
سفن آب" وأشتم نفسي في سرّي. وجاءت الساعة السابعة
والنصف مساءً ، تفصلي عن لقاء العريس المرتقب دقائق -
ربنا يستر- .

سارة

جاء الخميس بسرعة معتدلة نسبيا ، فقد كنت أترقب رؤية العروس التي أخبرتني والدتي أنني رأيتها من قبل ولكني لم أستطع تذكرها وكذلك كنت خا..... قلقا من الموضوع. كنت أتساءل هل سأرتاح إليها فور رؤيتها. هل هي جميلة و "رحمة" أم ستكون خفيفة الدم و... "وحشة" . هل يمكن أن أعجب بها و لا تعجب بي هي أو العكس؟ أعصابي مشدودة ولا أستطيع حتى ربط الكرافطة ونحن نستعد للذهاب . دخل أبي حجرتي وربط لي الكرافطة ورأيت الدموع تلمع في عينيه فقلت له " إيه يا بو عمر ده أنا لسه رايح أتقدم مش رايح أكتب كتاب ولا أدخل " فرد عليّ بأنه لا يصدق أن الله قد أكرمه و مدّ في عمره ليرى ابنه البكر يذهب ليخطب و أنني سأعرف شعوره يوم أن أذهب مع ابني لأخطب له.

ضحكت كثيرا، فأبي يتحدث عن ابني وأنا لم أرَ العروس بعد. خفف حديثي مع أبي قليلا من توترتي حيث أنه ظل يحدثنني عما يجب أن أبحث عنه في العروس ثم دعا لي فارتاح قلبي وأكلمت ارتداء البذلة. نزلنا من المنزل وقمت أنا بقيادة سيارة أبي حيث أنه لا يقود ليلا و وضعت شريط أم كلثوم في الكاسيت ليضطرب أبي وكذلك لهدف آخر خبيث وهو أن ينشغل أبي وأمي بسماع "سيرة الحب" حتى لا يتحدثوا معي لأنني لم أكن في حالة تسمح لي بالحديث و"ربنا يستر" .

عمر

تردد تردد

- أنا مش عايزه أشوف عرسان. و دخلت إلى غرفتي

(من خارج المنزل)

عمر

أول ما لفت نظري كان عينيه وابتسامته أو بالأحرى مشروع ابتسامه. يبدو أنه كان غارقاً في الخجل هو الآخر فلم

يكن يعرف هل يتسم أم يبدو جادا أما عيناه..... كانتا صافيتين! وكان نظره لا يستقر على شيء حتى أنني ظننت أنه ربما يكون أحول وكادت الفكرة تجعلني أضحك، وفجأة أجمر وجهه و...و...و... وكان وسيما حتى في خجله هذا ، فابتسمت و جلست ولاحظت أنه يتمتع بشيء ما أو لعله "يلع ريقه" فقد مد يده بعد ذلك وتناول كأس العصير ليشرب منه.

سارة

جلستُ على كرسي منفرد في الصالون، بينما احتلّ والداي الكنية وجلس والد العروس على الكرسي المجاور لجهة أبي ، بينما ذهبت والدتها لغرفة داخلية ثم خرجت تتبعها سارة.

ورأيتهما جميلة، وكأنني رأيت هذا الجمال من قبل وأعرفه، وذهب عني توتري في لحظة وانشرح قلبي لها. لا أقول أنه حب من أول نظرة ، ولكن شيئا ما جعلني أشعر أنني لسن أتركهما لأحد غيري. لم أستطع منع نفسي من التمتمة بالحمد لله ، ونظرت إليها فظننت أنها تغالب ضحكة تكاد تخرج منها فعاد إلي توتري لظنني أنها رأت شيئا بي يثير الضحك ، إلا أنها ابتسمت وجلست فحمدتُ الله ثانية وتناولت كوب العصير من أمامي فقد جفّ "ريقى"

عمر

نهاية اللقاء الأول

بدأ والذي يحدث عمر عن عمله وعن الشركة التي يعمل بها وظهر أن أبي يعرف أحد المهندسين بتلك الشركة ،حيث كانا زملاء دراسة و أوصى أبي (عمر) أن يسلم له على صديقه القديم ويذكره بصاحبه (عامر خليف) .

وتحدث عمي إسماعيل مع أبي عن وضع شركات القطاع الخاص، بينما بدأت (طنط) في الحديث معي عن عملي وعن طبيعة دراستي ولاحظت أثناء ذلك أن (عمر) يسترق النظر إلى كل دقيقة فتملكتني بـجاجة غريبة، ونظرت في عينيه بينما كان ينظر لي، وظننت للحظة أن روحه ستخرج من فمه، فقد فوجئ بعيني في عينيه فثبت وجهه وتحرك فمه وكأنه سيقول شيئا ما، إلا أنه لم يصدر أي صوت ولم يتقذه سوى أن سؤال وجهه له أبي له عن شيء ما في شركته فالتفت إليه وشعرت أنه بالكاد استرجع روحه التي تدلى نصفها من فمه وانفجرت في ضحكة بداخلي وأحسست أنه ظريف ولكن خجول أكثر من اللازم.

سارة

حاولت أن أفتح أي موضوع مع سارة إلا أن عقلي "قفش" وانعقد لسانى. ووجدت أمي تفتح مواضيع عديدة مع (سارة) وشعرت بغياي لعدم تذكُّرى لأيّ من هذه الموضوعات أو محاولتي التقاط خيط الكلام من أمي. وظللت أرقبها وهى تتحدث مع أمي، نصف عقلي يتابع حديث أبي وعمي ونصفه الآخر منشغل بسارة نفسها حتى أنني لا أكاد أعي ما تتحدث عنه مع أمي. كانت لها ضحكة جميلة كما أن "بروفيل" وجهها الذى أستطيع أن أراه فقط من مكاني بدا جذابا و فجأة رفعت عينيها نحوى و ضبطتني وأنا أنظر لها، حاولت أن أتحدث وأبدأ أي حوار معها إلا أن الكلام لم يخرج من فمي. شعرت أن منظري أصبح مضحكا، إلا أنها عادت للكلام مع أمي وقد احمرّ وجهها - يبدو أنها شعرت بالحجل - و وجهه إليّ والدها سوّالا ما فالتفتُ إليه ، إلا أنني كنت أريد الحديث معها فأنا لم آتٍ لكي أخطب عمي!

عمر

يبدو أن والدته أرادت "جرّة" إلى الحديث فقالت له "دى
سارة طلعت بتقرا الجرنال اللي طالع جديد وعاجبك يا عمر
بس ماجاتش العدد بتاع الأسبوع ده ماتقولها كان مكتوب
فيه إيه..". فنظرت له وفتح فمه إلّا أنه أصدر صوتا هذه المرة
وسألني عن أتابع مقالاتهم فى الجريدة ، فأخبرته وبدأ حديثه
واكتشفت أنه متحدث جيد بل و "رغّاي" أحيانا فقد ظلّ
يخبرني عن تفاصيل كل مقال ويعلق عليه ويسألني عن تعليقاتي
ثم يعيد ما قاله بطريقة أخرى ثم يتذكر شيئا آخر قرأه فيتحدث
عنه . وانتهرت أنا فرصة حديثه لأستطلع به شكل مفصل، كان
نحيفا ويبدو أنه متوسط الطول وهو جالس ولكن ... أعجبنى
شكل يديه فقد كانتا كيديّ عازف بيانو، أصابع طويلة وأظافر
قصيرة ، وكانت رموشه طويلة وعيناه بنّيتين و.....وبدأت
أثرثر معه أنا الأخرى.

سارة

أشفقتُ عليّ (ماما) أخيراً؛ وألقت إليّ بطرف خيط لأدخل
في حديثها مع سارة. سألتني عن جريدة أقرأها وكذلك سارة
وأنا - تقصد سارة - لم تقرأ العدد الأخير منها، فانتبهزتُ
الفرصة وظللت أحكي لها عن المقالات وكل شيء تذكرته، فقد
كانت تلك فرصتي لأنظر له "براحتي". كان كل شيء بما جميل
،صوتها وجلستها ويدها الصغيرتان وعيناها الضاحكتان دائماً
وتعليقاتها التي أثارت ضحكي كثيراً، كانت جميلة "وكمآن
دماغ"! كان حوارنا بعيداً تماماً عن الرومانسية ولكن "نص
العمى ولا العمى كله" على الأقل حُلّت عقدة لسانينا وعيوننا.

عمر

كانت الجلسة مجرد جلسة تعارف بالطبع. إلّا أن أبي وعمي
قد انسجما تماماً. وبدأ على الجميع السعادة، ونظر لي عمر
وهو خارج وقال لي بصوت هادئ ظل يرنّ في أذني "أشوفك
قريب يا سارة"

سارة

نزلت أصفر وأغني و ركبت السيارة وأنا في قمة النشوة.
سألني أمي عن رأيي، فقال لها أبي أن تترك لي فرصة للتفكير و
الاستشارة. أما أنا فلم أرد ولكنني توقفت عند أول بائع جرائد
وجدته ونزلت لأشتري عديدين من الجريدة التي نقرأها أنا
وسارة!

عمر

تفكير...تفكير....وقلق شديد. دخلت غرفتي بعد ذهاب
عمر وأهله وغيروا ثيابي وخبأت نفسي تحت الأغذية حتى
لاتأني أمي وتسالني عن رأيي. لا أنكر أن شيئا ما تحرك في
قلبي، بل أن صوته المنخفض وهو يقول "أشوفك قريب يا
سارة" قد دغدغ أحاسيسي. أريد أن أقول أنه يعجبني وأني
موافقة ولكن ما أدراي برأيه هو. وكذلك ما أدراي أن
مشاعري هذه لحظية، ربما (عمر) هذا ليس جيدا كما يبدو.
وهو ليس طويلا كما كنت أرغب. صحيح هو أطول مني
ولكن.... هل يمكنني أن أقضي باقي عمري مع (عمر). هل
هو المقدر لي أم لا ؟ يارب ارحمني من الصداع. غدا أصلي
صلاة استشارة مرة أخرى، وربنا يقدم ما فيه الخير.

سارة

نمتُ مباشرة بعد عودتي من عند بيت سارة، فكرت في صوت ضحككتها قبل نومي مباشرة إلا أن التوتر الذي أصابني طوال اليوم جعلني مرهقا ونمتُ فوراً. في اليوم التالي استيقظت واصلتُ الفجر والاستخارة ونمت ساعة قبل الذهاب إلى عملي. لم أر مناما ولا أي شيء وإن كنت لا أعتقد في موضوع المنام، ما يهم هو أنني أشعر بارتياح عام للموضوع. في العمل تذكرت أنني لم أحصل على تليفون سارة، أردت معادتها. سأخذ رقمها من أمي ولكن هل يصح أن أتصل بها ونحن حتى لم نقرأ الفاتحة بعد؟. سأحدث مع أمي في هذا الموضوع عند رجوعي للمنزل. أثناء فترة الراحة تذكرت أنني بقراري بالزواج من سارة فإنني أحكم على نفسي بالعيش معها للأبد. إنها جميلة ويبدو أنها طيبة. ولكن هل يمكن أن يكون لها عيوب خفية لا أستطيع تحملها. كنت سأجعل أبي يتصل اليوم بأهلها لتحديد موعد قراءة الفاتحة، ولكنني أحتاج أن أعرفها أكثر، ربما تكون بخيلة أو ... سليطة اللسان. لا، لا يبدو أنها قد تنطق يوما بكلمة سيئة. أصابني الصداغ من كثرة التفكير وشعرت أن أذني قد سختت بشدة.

يارب اهديني.

عمر

يبدو أن هذا الموضوع سيجعلني أستهلك كميات كبيرة من "السفن أب"، فالحموضة لا تريد أن تذهب. أفكر طوال الوقت في الموضوع. هل أقبل؟ هل أرفض؟ ولم أرفض؟ هل سيقبل بي (عمر)؟ أم؟ قد يكون به عيوب شديدة القبح وهو يخفيها بهذا المظهر الجميل. ربما هو يضرب النساء ولكن لا، يبدو أنه محترم ووالده كذلك رجل محترم وخلوق، لا يمكن أن يكون كذلك. هل يمكن أن يكون "بصباص"؟ ولكنه نحول. ربما يمثل؟ "آه.. الحموضة تقتلني... مش عارفة أقول إيه لما لما تسألني عن رأيي.. خائفة أوافق وبعدين عمر ما يردش يبقى شكلي وحش وكمان خائفة أوافق وبعدين عمر يطلق شخص سيئ، لكن أهلي متحمسين له وهذا إذا ظهر إنه "شرير" ها أقول لهم أنهم هم اللي وافقوا عليه من البداية. ياترى عمر وأهله هيتكلموا أمي؟".

سارة

وصلت البيت وأنا منهك ولم تكن لديّ شهية للطعام
فذهبت للنوم. استيقظت بعد المغرب فصليت وجلست مع
والدي في الصلاة. أخفض أبي صوت قناة الجزيرة التي لا يتابع
إلاها أو العربية للأخبار. التفت لي وسألني عن حالي فحمدت
الله . ودار بيننا هذا الحوار:

بابا: نويت على إيه إن شاء الله

- مش عارف، كنت متحمس بس دلوقتي قلقان

بابا: طبعي جدا. إنت مش استخرت

- مرتين

بابا: وحاسس بإيه؟

- مش عارف

ضحك أبي وقال: عادي بردو. أنا ساعة ما اتقدمت لأملك
عقلي شت من التفكير.

تدخلت أمي: ماتصدقوهوش ده حفي عشان أنا أوافق.

أكد أبي على كلامها ضاحكا وقال: شوف يسابني البنات
كويسة و أهلها طيبين و ان كنت خايف من حاجات ممكن
تظهر في المستقبل، فإنت استخرت وإذا كان الموضوع خير
هيمشي وإن ما كانش .. الأمور هتخلص لوحدها. شوف
إنت مبدئيا حاسس بإيه تجاهها؟

- هي عاجباني وانا مرتاح لها بس...

بابا: من غير بس، شعورك المبدئي كويس، إحنا نقرا الفاتحة مع الناس وبعدها تشوفها وتكلم معاها عند أهلها كام مرة ولو زاد ارتياحك ليها نكمل ونعمل الخطوبة اللي بردو هتكون فترة اختبار بينكم، و ان ما حصلش توفيق يبقى كل اللي يجيبو ربنا كويس، ولا رأيك إيه؟

أراحني كلام أبي ووافقت عليه .

بابا: يبقى اتصل بقي بعامر واسأله إمتى هنعرف رأيهم؟

- رأيهم؟ أنا حسبتك هتحدد ميعاد الفاتحة !

ضحك أبي وقال " ليه هوانت مادام وافقت يبقى العروسة وافقت"، عرفت بعد اتصال أبي بأهل سارة أنهم طلبوا أسبوعا لإبداء رأيهم وعاد إليّ توترتي، فأنا قد أبديت رأيي المبدئي في اليوم التالي مباشرة، لماذا تحتاج هي إلى أسبوع؟ أختارة هي لهذه الدرجة؟ ألم تعجب بي كما أعجبت بها؟

حاولت أُمي طمأنيتي بالحديث عن أن الفتيات يأخذن وقتنا أطول من الرجال في إبداء رأيهن وأن أهلها يجب أن يسألوا عني. فسألتهَا غاضبا "ألا يجب أن أسأل عنها وعن أهلها أنا الآخر؟" فردت أُمي بأنها تعرف أهلها جيدا وإذا أردت بمكنني أن أتجرى عنها هي بنفسي. فسألتهَا كيف، فقالت " روحلها الشغل ". وتركتني أُمي لحيرتي وقلقي .

عمر

اتصل أهل عمر ليعرفوا رأينا وتنفسْتُ أنا الصعداء. فمعنى
اتصالهم أن عمر وافق ويريد أن يعرف رأيي. إنزاح من على
قلي هم ثقيل. كنت مرعوبة من فكرة أن أعجبت به وهو قد
لا يعجب بي، على الرغم من كلمته "أشوفك قريب يا سارة".
بعد جلسة طويلة مع أمي قررت الموافقة على قراءة الفاتحة لكي
أستطيع أن أراه عدة مرات قبل أن أوافق على الخطوبة. ولكن
أبي قرر تأجيل إخبارهم بقراري إلى أن يذهب إلى عمل عمر
ويسأل عنه. وسمعت من أمي خطة أبي لمعرفة كل شيء عن عمر
من زملائه ورؤسائه في العمل، بل وجيرانه كذلك، فأبى رجل
طيب و هادئ ولم أتوقع أن يتحول إلى المحقق (كولومبو) من
أجلي. قارب الأسبوع على نهايته وأ شعر - قليلا - أنني أريد أن
أرى عمر .

سارة

قراءة الفاتحة

تحرّى كولومبو (أبي سابقا) عن عمر فوجد أن سيرته ممتازة بين جميع معارفه، ومن ثمّ اتصل أبي بعمي وأخبره عن موافقته. واتفقا على قراءة الفاتحة يوم الاثنين القادم، وظل أبي يتحدث مع عمي على التليفون قرابة النصف ساعة حيث أن كلاهما يهتمّان بمشاهدة القنوات الإخبارية. وكانا يتناقشان حول برنامج ما. يبدو أن علاقة أبي بعمي ستتوطد قبل أن تتوطد معرفتي بعمر! أخبرني أبي بعد إنهاء المكالمة أن عمي وطنط وعمر يسلمون علي. شعرت بالاشتياق لرؤية عمر مرة أخرى، إلا أنه بالطبع لن يكون بيننا أى اتصال قبل قراءة الفاتحة.

سارة

لم أحاول التحرّي عن سارة لأنني - أولاً - ارتحت لها ،
وثانياً أُمّي تعرفها وتعرف والدّها ، وثالثاً " أنا ما أعرفش إزاي
اتحرّى عن حدّ! " ولكنني للحقّ فكرت أن أذهب لأراها وهي
خارجة من عملها فقد شعرت أنني بحاجة لأن أراها. شئ ما
جعل قلقي يزول من جهة موافقتها عليّ أم لا. فأنا أظن أنني
تركت لديها انطباعاً جيداً. و جاء الخميس موعد ردّ عائلة
سارة علينا، وجلست بجوار أبي وهو يرد على تليفون عمي.
ظلاًّ يتحدثان في بداية المكالمة عن برنامج سياسي ما ، وأنا
جالس على الشوك في انتظار الجواب. وأخيراً سمعت أبي
يضحك ويحمد الله ويخبره عن سعادته بالنسب المرتقب بيننا،
فالتقطت أنفاسي وخرجت إلى البلّونة . كنت أشعر شعوراً
غريباً وكأن كل شئ يبرق أمامي . أحسست أنني أريد أن
أحضن العالم كله وأقبله. كنت أعرف أنني سأبدأ مشروع حياة
وأنني سأكافح من أجل تجهيز نفسي إلا أن هذا الشعور الغامر
بالسعادة أنساني أي قلق. وسألت نفسي كم سأنتظر لأقف مثل
هذه الوقفة مع سارة في بلّونة منزلنا.

عمر

هل يعقل أن أحب شخصا رأيته مرة واحدة. أم أن هذا
الشعور بقبوله الشديد ناتج عن صلاة الاستخارة. هل يعطينا
الله إشارة بأن عمر لي وأنا له؟

أنتظر يوم قراءة الفاتحة بسعادة شديدة. ولم أعد أعاني من
الحموضة. الحمد لله.

سارة

جاء يوم الاثنين الغالي. احترت في الهدية التي يجب أن
أقدمها لسارة. أخبرتني أمي أنه يمكنني أن أشتري لها خاتماً لقراءة
الفاتحة وأخبرتني أنها يمكن أن تقول تختاره لي ولكنني أخبرتها أنني
سأشتريه بنفسي. ذهبت إلى الصائغ ولم أكن أعرف مقاس
إصبع سارة ، إلا أنني حاولت التخمين قياساً على حجم يديها.
كنت أريد خاتماً مميزاً. فكرت بأن يكون خاتماً ذا فص مثل
خواتم الزواج التي أراها في الأفلام الأجنبية، إلا أنني وجدت
خاتماً عليه فراشة تبدو وكأنها حقيقية ، لا أدري لِمَ ذكرني
الفراشة بسارة، فدعوت دعاء الاستخارة واشترت الخاتم.
يارب يعجبها.

عمر

لا أدري ماذا يجب عليّ أن أرتدي في قراءة الفاتحة. هذه المرة أريد أن أبدو متألفة. بعد تفكير ومحادثات مع صديقتي مروة ومع ماما ومع المرأة ، اخترت طقمًا للبيّ اللون ووضعت "بروش" على هيئة فراشة يشبك الطرحة مع البلوزة. " يا ترى عمر يحب اللون اللبني. يارب .. يارب ... يارب خلييني فرحانة انهاردة. "

سارة

أحضرت بوكيه شيكولاتة ونحن في طريقنا إلى بيت سارة. في هذه المرة كان معي أولاد عمي في سيارتنا وكذلك أخي. بينما كان أبي وأمي في سيارة عمي وزوجته يلحقون بنا. في هذه المرة ظل أولاد عمي يثرثرون معي وظللنا نضحك طوال الطريق .

عندما دخلت منزل سارة هذه المرة كنت أكثر راحة. كان المنزل مزدحمًا نسبيًا عن المرة السابقة حيث حضرت خالة سارة وزوجها ، وأعمامها الثلاثة. عندما دخلتُ كانت سارة تكلم أحد أعمامها في ممر يطل على الصالون، التفتت ورأيتني وأنا أتجه صوب الصالون فابتسمت لي وابتسمت لها. كانت ترتدي طقمًا أزرق فاتح يجعلها تبدو جميلة كالسماء. واتسعت ابتسامتي حينما لاحظت أنها تضع " بروشا " على شكل فراشة.

عمر

دخل عمر هذه المرة فجأة ، فقد ظننت أن أبي يفتح الباب
لزوج خالتي الذي وقف على السلم ليدخن سيجارة، حيث أن
أمي لاتسمح بالتدخين داخل المنزل، وكان أبي واقفا على
الباب يتحدث مع زوج خالتي وصديقه في نفس الوقت حتى
يهوّن عليه وقفة السلم. ولكنني استدرت لأجد عمر أمامي
يتسم ويحمل بوكيه شيكولاتة. لقد زادت معزته في قلبي لما أتى
لي بالشيكولاتة!!

بعد أن قدمنا الجاتوه والحاجة الساقعة ، تحدث أبي مع
عمي وتعرّف الجميع على بعضهم وسألني عمر عن حال.
كان الجو مزدحما هذه المرة ، ولكن عمر كان هادئا وما زالت
لديه عادة اختلاس النظر لي!!! في وسط كل هذا وجدت أبي
وعمي يقولان "نقرا الفاتحة بقى" رفع الجميع أيديهم ليقرأوا
الفاتحة ونظرت تجاه عمر فوجدته بالطبع ينظر لي وقرأنا الفاتحة
وأعيننا متشابكة. وشعرت وكأنني خارج كل زحام الصالون
وكان جسدي كله قد تخذل.

سارة

قرأت الفاتحة وسارة تجلس في عيوني. تجرأت هذه المرة ونظرت إليها بثبات أثناء قراءة الفاتحة ، ولم تنعد عني بعينها. أخرجت الخاتم وقدمته لسارة التي ضحكت وقالت والسندقا" انت كنت عارف إن سارة هتلبس بروش على شكل فراشة ولا إيه؟" ولكني لم أكن أعرف ،أنا حتى لم أعرف رقم تليفونها وخفت أن يظنّ عمي أنني اتصلت بها من ورائه فأنكرت على الفور فضحكت سارة وضحك الجميع وشاركهم الضحك.

عمر

لم أصدق نفسي عندما رأيت الخاتم، فقد كان جميلا جدا. فأنا أحب الفراشات بشدة. لقد أتى لي عمر بشيكولاتة وفراشة من ذهب. يبدو أني سأحب هذا الفتي!

سارة

كلمني ٢ التليفون

لا أصدق أنه قد تمت قراءة فاتحتي بالرغم من أنني قرأتها معهم وإن كنت لم أع منها سوى "الحمد لله". كنت أنظر إلى خاتم الفراشة على يدي باستغراب. لقد امتلكت عدة خواتم ولكن ولا واحد منها شعرت به يحمل كل هذه المعاني بالنسبة لي. أشعر أن عمر وضع علامة عليّ تشير إلى أنني أصبحت له ولكن ... لكن عمر لا يحمل أى علامة تشير إلى أنه أصبح لي. ربما أقوم بعمل علامة في وجهه عندما يزورنا في المرة القادمة !! أم أنه قد يعتبر ذلك فظاظلة مني !!! ياااااا لا أستطيع أن أكون حادة حتى عند التفكير في مستقبلي. لكن أنا لم أره سوى مرتين و "ادبست" و وافقت على قراءة الفاتحة، كل هذا بسبب حماس أبي له و ألفته السريعة مع والده. " آآآآه عمر . قلنى بيرفر لما بفكر فيه " وبالرغم من ذلك فما زلت أشعر بالقلق بسبب موافقتنا السريعة، إلا أن أمي أخبرتني أن الفاتحة مجرد "ربط كلام" ليتسنى لي لقاء عمر عدة مرات حتى أوافق على إتمام الخطوبة. أنتظر مكالمة عمر على التليفون ولا أدري كيف سأبدأ أي حوار معه!

سارة

" افتح عليا يا ارب "

- 27 -

المفروض أن نأث يتصل بالتليفون على البيت ، لأننا لسه ما عرفناش موبايلات بعض. الواحد محرج شوية، ليس لأني سأكله ،فأنا بعون الله أكلم الأسد (بس وهو فى القفص طبعاً) المشكلة هى وجود بابا .كيف سأحدث "راااجل" فى وجود بابا..هو صحيح راجل طيب، لكن....المشكلة الحقيقية هى كيف سأحدث مع عمر؟ لا أريده حديثاً عادياً، أريد أن أستخرج منه كل أسرار شخصيته وأعرف عيوبه وأريده أن يعرفنى جيداً، فهو لم يعرف سوى سارة المادئة الخجول التى تجلس لتتحدث مع "طنط". قررت أن أتصل بإحدى صديقاتي المخطوبات لعلها تقيدينى فى اختيار مواضيع للحوار، ووقعت القرعة على فاطمة ، المخطوبة الأزلية منذ كنا فى الصف الأول الجامعي وحتى الآن، وقد انفجرت فاطمة فى الضحك عندما عرفت طلبى منها وقالت لى هازنة: "عايزة تعرفى كل ده من أول مكاملة، يابنتى انتى يادوبك فى مرحلة النحنحة. انتى وهو هتتنحنحوا على بعض! قدامك شوية حلوين عقبال ما تعدي مرحلة وش القفص، ده أنا ياللى مخطوبة بقالى سنين ، لسه بشوف العجب من إيهاب،يابنتى انتى دخلتى مشوار المليون خطوة وانتي يادوبك هتبداي فى أول خطوة" طبعاً ارتفعت معنوياتى جداااا بعد مكاملة فاطمة!!!!

" رجعت من الشغل واتفديت وغت و صحيت والمفروض
أكلم سارة، اتصلت بالرقم وانا بادعي إن سارة هي اللي ترد
وبالطبع ردت والدعا". قمت بالتسليم عليها والسؤال عن
عمي وسألتني هي عن والدي ووالدتي، ثم سادت لحظة صمت
محرجة، حيث تنتظر هي أن أطلب الحديث مع سارة بينما أنتظر
أنا أن تتفضل هي من نفسها بنداها. تنحنحت مرتين وأخذت
نفسا عميقا و..... قبل أن أنطق، قالت هي " طب هناديلك
سارة". تأملت أذناي حينما انطلق صوت موسيقى الانتظار
المزعج والمفاجئ ثم انتهت الموسيقى وسمعت خروشة ثم صوت
سارة :

- سارة: السلام عليكم
- * عمر: وعليكم السلام ورحمة الله وبركاته
- ازيك يا عمر
- * الحمد لله.....ازيك انت ؟
- الحمد لله ، وبابا وماما عاملين ايه؟
- * الحمد لله
- واختك؟
- * الحمد لله
- انت بتختم الصلاة يا عمر؟
- * (بلهشة) لأ ليه؟
- أصلك مايقولش غير الحمد لله ، فحسبتك بتسبح بعد
الصلاة ولا حاجة!

فهمت الدعابة وضحكت بشدة، وبدأت أسألها هي
الأخرى عن أحوالها وعن عملها وكذلك تحدثت هي
و.....استمرت المكالمة ٦٦ دقيقة والحق أنني لم أريد إنهاء
المكالمة، إلا أنني لاحظت أن والدتها دخلت إليها ووجهت إليها
الكلام، فخشيت أن أسبب لها الحرج وأخبرتها بأنني سأحدثها
غدا. وبالطبع كانت المكالمة وكأنها مع واحد صاحبي، وخاصة
أما لم تكف عن السخرية وإطلاق النكات، مما جعلني أبادلها
التنكيث، وبالتالي لم تكن المكالمة رومانسية على الإطلاق،
ولكنني استطعت أن أستجمع شجاعتي وأن أقول لها
"هتوحشيني قوى لحد بكرة" واقفلت الخط سريعا وكأن والدتها
ستحذيني من ملايسي من خلال السماعة !

عمر

لم أتفعل أن تسير المكالمه مع عمر على هذا النحو. كنت
أغسل المواقين فى المطبخ، بينما أفكر أنه لو اتصل الآن سيكون
شئ شاعرى جدا أن أتلقى أول مكالمه من خطيبي وأنا أفـ
على الحوض!!!! وبالفعل اتصل عمر أثناء غسلى للبراد. بدأ
محرّجا فى بداية الحديث ولكنني كسرت الجليد وضاحكته،
واتضح لى بعد ذلك أننا المكالمه أنه " واد مسخرة !"، وبالطبع
هذا ليس تقليلا من شأنه، فهو يبدو رجلا حتى فى هزره. وبعد
تبادل الحديث وتبادل أرقام الموبايلات - حيث أخبرتني أمى
قبل المكالمه بأنه يمكنني تبادل أرقام الموبايل معه - بعد كل هذه
الثرثرة أهى مكالمته بجملة تختلف عن جو الشقاوة الذى ساد
المحادثة وقال لى برقة أنه سيفتقدني. ياربى دائما ينهى كلامه
بجملة تخلى قلبى يهتز. يبدو أنها صارت عادة لديه. قاطعت أمى
تأملاتي الرومانسية بعد المكالمه - وكم تعددت مقاطعتها لى
أثناء المكالمه! - وقالت لى " إيه كل الضحك يا سارة هو اننى
بتكلمى فاطمة ولا مروة... مش تعقلي شوية" ظننتها فى البداية
ستتحدث عن طول وقت المكالمه ولكنها أخرجتني بحديثها عن
كثرة ضحكى، هل يمكن أن يظن عمر أننى أضحك أكثر من
اللازم؟ لكنه كان يضحك هو الآخر. يوووه هو كل شوية
قلق.

سلة

رن .. رن .. رن ... وفرحنى

في العادة؛ تعبّر الأغاني عن المشاعر، ولكن هذه المرة عبّر
إعلان خطوط تليفون عن مشاعري

"رن..رن..رن..رن.. وفرحنى" يشدو بها كاظم الساهر
وأنشز أنا بها طوال اليوم مع رنات عمر الكثيرة على الموبايل.
أمس، بعد أن انتهيت من أولى مكالماتي معه أرسل لي رسالة
بها دعاء جميل " اللهم لي أحبة أذكركم كلما نبض الفؤاد
وحن وأدعو لهم كلما دنا ليل الظلام وحن..إلهي ظلل أحبي
بالغيوم و ابعد عنهم كدر الدنيا و الهموم.. أدخلنا اللهم جميعا
من باب الريان واعتق رقابنا من النار" رسالة دينية وإن كانت
تبدأ ب "أحبة" واحدين بالكم ! أما اليوم فقد رن عليّ ٨
مرات حتى الآن، أما بالنسبة لي فقد رننت له مرة واحدة... لا
أدري لماذا

"ثقل" كما يقال ..للحق أشعر بالخجل من أن أرنّ عليه
كثيرا. ولكنني سعيدة جدا برناته. بالطبع أنا في عملي وزميلاتي
بلا حظن عليّ أنني أبتسم بلا داعٍ مرات عديدة. أبتسم عندما
أذكره ...و أبتسم عندما يرن ... و أبتسم عندما لا يرن...
"باين عليا اتجننت!" آه لو تدوم سعادتي هذه للأبد.
وصلتني رسالة جديدة من عمر، جعلتني لا أمالك نفسي من
الضحك و(اضطرت) بعدها لأن أرن عليه مرتين. كانت

الرسالة تقول " كده مش حلو .. لا رسالة .. ولا ألو .. ولا علينا تسألوا...طب حتى رنة وأقفلوا". فكرت أن أرسل له رسالة حتى لا يظن أنني بخيلة ولا أريد أن أضيع رصيدي! احترت هل أرسل له رسالة دينية أم رسالة ضاحكة. في النهاية قررت الرد على رسالته كالتالي " قلت للطير المسافر وصل سلامي للغالين....قالى سواق أهلك أنا؟! "

سارة

وغيضت من نفسى لأنني غيضت من سارة. وكان (علي) نعم
العون حتى أنه بعث لي رسالة "لعلاج هذه الحالة" كما قال
وقمت أنا بإرسالها لسارة. وعدت للتحقيق فوق السحاب
عندما ردت عليا سارة هذه المرة برنتين ورسالة دمها خفيف
مثلها.

عمر

"أربع رسائل في يوم واحد.. كثير بردوا الواد ده ماشى بموبايل خط ولا بيزنس ولا إيه؟! هو صحيح إني فرحانة جدا بكل هذا الإهتمام... لكن هي دى المشكلة.. أنا بخاف لما بفرح قوى.. باشعر إن فيه حاجة غلط. ماسورة الرسائل اللي انفجرت دى مش مطمئاني". أخاف أن يكون عمر حالما أكثر من اللازم. قد يبدو كلامي غريبا ولكنني أحب الرجل "الراسي" أريد رجلا يساندني على أرض الواقع. لا أحب الرجال المفرقين في الرومانسية.

سارة

لم يتهمني يوما أحد بالرومانسية، ولكنني مع سارة أخاف أن يكون هذا عيبا. لست قاسي القلب بالطبع ولكنني لا أجد الكلام الرومانسي الكثير يعني شيئا. أشعر أنني أحبها وغالبا ما سيزداد هذا الحب مع الأيام ولكنني لا أحب كلمة "أحبك" التي تتكرر كثيرا بين الأولاد والبنات. ولكنني أخاف أن يجعل ذلك سارة تكرهني ولذا قررت أن أكون رومانسيا معها في رسائل الموبايل. أرسلت لها كل رسائل الحب التي وجدتها ذلك اليوم، وكانت أربع رسائل "أربع رسائل في يوم

واحد....كثير..مش كده؟ " أدركت هذا عندما وصلت
للمنزل مساء. قد تراني سارة الآن "مدلوقاً".

ولكن لا ،هي لا تفكر بهذه الطريقة...أو...ربما هي تفكر
بهذه الطريقة.....لاحول ولا قوة إلا بالله...كنت قد قررت أن
أتصرف بمثالية في هذه العلاقة ولكن ها أنا وقد بدأت بخطأ...
أفففف.

عمر

مكالمة أخرى مع عمر على تليفون البيت، هذه المرة اتصل
أثناء مشاهدتي لمسلسل الرعب الأجنبي الذي أتابعه بشغف، ما
علينا سأشاهده في الإعادة. وجدته طبيعياً...أعني ليس حالمًا
غارقًا في الرومانسية كما أوحى لي الرسائل. ارتاح قلبي لذلك،
فأنا لا أحب الرجال معسولي اللسان.حدثته عن مشاكل في
عملي وأسديني بعض النصائح المفيدة بجانب بعض النصائح غير
المفيدة ولكنني لم أخبره بذلك بالطبع. إلا أنني ذهلت وزاد
إعجابي به عندما حدثني حول الاحتلال في العراق ووضع
الانتخابات الفلسطينية.إنه يعرف ما يتحدث عنه وله آراء

خاصة رائعة ولا يدّعي معرفته بكل شيء ، مثل الذين يتحدثون
وكأنهم كانوا مع بوش لحظة إعلان الحرب. أعجبتني سعة
اطلاعه وإن كنت أحبطت قليلا عندما عرفت أنه لا يهتم
بالكرة ، وأنا التي كنت أحلم بأن أذهب أخيرا للإستاد لأشاهد
المباريات من هناك بعد زواجي. إلا أنني للحق احترمتها ، فأنا لا
أتحيله يجلس مثلي أمام التلفزيون يكيل السباب للاعبين الفريق
المنافس و الحكم الظالم دائما! في وسط الحديث تطرقت إلى
موضوع الرسائل، فسكت قليلا ثم قال بلهجة شديدة الرقة
والعذوبة "زودتها شويه...مش كده؟" ولم أملك نفسي من
الضحك. أحيانا ينتاب الشخص نوبة غباء يندم عليها كثيرا
فيما بعد ..وكانت هذه إحدى نوبات غبائي. كيف يكون هذا
هو رد فعلي على هذه الرقة. بالتأكيد سيظن أنني بليدة
المشاعر. ارتبك قليلاً بعد ضحكتي الغبية ثم تجنب الحديث عن
رسائله وشكرني على رسالتي وأثنى على خفة دمي الذي كان
يغلي في هذه اللحظة من شدة غيظي من نفسي ومن ردود
فعلي الغبية.

سارة

ليه أبي و خطيب

زيارة أخرى.. لكنها هذه المرة من نوع جديد. فأنا لم أصطحب والدي، حيث المفترض أن هذه الزيارات ستكون لتوثيق علاقتي بسارة. وقد تفضلت أسرتانا بالسماح لنا باللقاء مرة أسبوعيا في منزل سارة. طبعاً كنت سعيدا لرؤيتها ولكنني غير راضي عن موضوع الزيارة الأسبوعية هذا... "هو إحنا في سجن". لماذا لا أراها كلما يحلو لي، أعرف أن هذا مبالغاً فيه لكن... ما علينا، أراها اليوم ثم يكون ما يكون.

عمر

تحضيرات... تحضيرات. دجاج ولحوم وحلويات. أشعر أننا سنستقبل دينا صورا إذا كان سيأكل كل هذه الكميات من الطعام. وإذا كنا سنحضر وليمة مثل هذه كل خميس كلما جاء عمر فأتوقع أن يفلس أبي قريبا. قمت بمساعدة أمي قليلا لأنني كنت مشغولة في عملي كثيرا هذه الأيام. للحق زاد إدراكي لحبي الشديد لأمي هذه الأيام. فهي تقيم كثيرا بزيارات عمر وأهله وتفهم حالاتي النفسية المتقلبة وكذلك حالات أبي. فعلى الرغم من سعادة أبي في البداية وألفته السريعة مع عمي، إلا أنني لاحظت وجومه مع مكالمات عمر ورناته المتكررة. كذلك لاحظت أنه يضيق بحديث أمي عن الجهاز ويقول لها ألا تتعجل

لأن الموضوع في بدايته ونحن لا نعرف ما الذى سيحدث بعد ذلك. كانت هذه النيرة غريبة على أبي المتفائل عادة والذى يقول لي دائما "أحسني الظن بالله يا سارة فالله سبحانه وتعالى يقول في الحديث القدسي (أنا عند ظن عبدي بي)". سألت أمي عن هذا التغير فأخبرتني أن أبي قلق، فهذه أول مرة يمر بتجربة تزويج ابنة له وهو خائف من أن تحدث لي أي مشكلة وخاصة أنه بارك هذا الزواج من البداية. سألتها وحي يزداد لأبي "بابا خايف عليا من عمر؟" فأجابت أمي "بابا بيخاف عليك من الهوا الطاير" فضحكت وسألتها بمكر "وانتي يا ماما مش خايفة عليا... شايفاكى متحمسة قوى للعزومة ولعمر؟" فأجابتني بضحكة سكر "ياخنى بس هو يشيل!"

كنت أرتدي حجابي وأضبطه عندما دخل أبي غرفتي وجلس على طرف السرير. التفت إليه مبتسمة أسأله عن رأيه في ألوان الطرحة والبندانة - وكان من عادته أن يضحك عندما أسأله عن مثل هذه الأشياء ويبدى دهشته من قدرتي على تجميع كل هذه الألوان في حجاب واحد - إلا أنه هذه المرة علق بهدوء قائلا "حلوة يا حبيبتي". كانت لهجته متغيرة فسألته عما به فأجاب "ما فيش يا جيلي" - و (جيلي) هذا هو اسم الدلع الذى يطلقه عليّ والدي - ومن ثم خرج وترك الغرفة في هدوء وقد أزعجني هذا إلا أنني انشغلت بالبحث عن دبوس جديد .

سارة

احترت في الهدية التي سأخذها معي. فكرت أن أشتري رواية
لكاتبة كانت سارة أخبرتني أنها أحببت أسلوبها في مقالاتها
ولكنها لم تقرأ روايتها بعد. ولكنني اكتشفت أن كل عساوين
روايات هذه الكاتبة كفيلة بجعل عمي يلقيني من الشباك ، ولذا
آثرت السلامة واشتريت لها الجزء السادس من (هارى بوتر)
وطبعا شيكولاتة لأنها مدمنة شيكولاتة كما أخبرتني. عند
وصولي إلى منزل عمي فوجئت بأن سارة هي التي فتحت لي
الباب. دخلت مبتسما وعيناي عالقتان بما ملاحظتا الألوان
العديدة في حجراتها- كيف تضع الفتيات كل هذه الألوان في
حجاب واحد- وجهت عيني ناحية الكنية المعتادة التي أجلس
عليها لأجد عمي- مقطبا حاجبيه- هذا غريب حقا ، فعادة ما
يقابلني عمي بالترحاب، لعله مهموما بشئ ما. قممت بتحيته
وحيت طنط التي جاءت من المطبخ والغريب أن عمي لم
يسألني عن أبي هذه المرة ولم يجلس معي قليلا كعادته قبل
تركي مع سارة.

وبعد كلمات الافتتاحية المعتادة في حوارتي معها ، لم أستطع
الانتظار وسألتها عن حال عمي ولماذا يبدو متغيرا.

عمر

عندما جاء عمر هذه المرة قمت أنا بفتح الباب له. انشغلت قليلا بابتسامته الجميلة قبل أن ألاحظ الجاكيت الأسود الكاجوال الذى يرتديه على (تى شيرت) أبيض و بنطلون جيزي تلحي ، كان رائعا وما زاده روعة أنه كان يحمل علبة شيكولاتة - على الرغم من أنها كانت مغلقة إلا أنني أشعر بوجود الشيكولاتة من على بُعد- وكان يحمل شيئا آخر يبدو كعلبة صغيرة، هل أحضر الشبكة بهذه السرعة!! لاحظت أن عمر بدا مرتبكا بعد مروره من الباب وعندما نظرت ورائتي عرفت السبب، كان أبي يقف هناك بوجه لا يحمله كثيرا . لم تكن ابتسامته الكبيرة المرحبة هناك ولكنه استبدلها بتكشيرة أعرف أنها قد ترعب عمر، فأنا أعرف كيف يجيد أبي هذه الأمور حينما يريد. جلس عمر وأثبت على ملابسه فابتسم وسألني في تعجب عن كيفية جمع كل هذه الألوان في حجاب واحد فضحكت وفكرت في أنه يشبه أبي كثيرا ، ولكنه سريعا ما "دخل في الجدل" وسألني عن أبي وإذا كان هناك شيئا ما يضايقه. فكرت في البداية أن أتحدث بأى شئ يتعلق بعمل أبي أو شئ من هذا القبيل إلا أنني وجدت أن : "honesty is the best policy"

ولذا أخبرته عما قالته لي أمي وأضفت من عندي أنني قرأت
على موقع (عمرو خالد) أن الآباء أحياناً يشعرون بالغيرة عند
ارتباط بناتهم. وعلى الرغم من أنني كنت أشعر مسبقاً بأن عمر
قد يغضب من هذا الكلام إلا أن رد فعله لم يكن متوقعاً.

سارة

صمتت سارة للحظات بعد سؤالي، حتى أنني خشيت أن
هناك مشكلة ما لديهم وهي لا تريد اطلاعي عليها، إلا أنها
انطلقت بعد ذلك بحجة على سؤالي بصراحتها المعهودة،
موضحة لي قلق والدها ورعا شعوره بالغيرة! للتخلة شعرت
بالإهانة إلا أنني تذكرت وقتها أختي مروة وتخيلت شعوري إذا
ما أخذها رجل غريب من بيتنا بحجة أنه زوجها ! أستطيع أن
أتخيل نفسي بسهولة وأنا أقطع رقبته!!! وهنا شعرت بمدى طيبة
عمي طوال الفترة السابقة، حتى أنه عندما شعر بالقلق لم يتم
بأكثر من تكشيرة وخروج صامت من الغرفة. يا له من رجل
طيب! عندها ابتسمت وأخبرت سارة أن والدها رجل عظيم
وأني أحبه الآن أكثر من أي وقت مضى، بدت الدهشة على
وجه سارة، إلا أنها انشغلت بعد ذلك بمحاولة معرفة ما الذي
أحمله معي بخلاف الشيكولاتة.

عمر

"أبو كي ده راجل عظيم وأنا بجه موووت ...أكثر من الأول كمان" كان ذلك هو رد فعل عمر غير المتوقع. إما أن الفتي يعاني من خلل ما في عقله أو أنه شخص رائع وإن كنت أؤيد الاحتمال الثاني أكثر. أشعر بالخلل عندما أقول أنسي شعرت وقتها أنني أريد تقييله على وجنتيه. لم أستطع قول شيء ولذلك نظرت جهة العلبة التي يحملها وتظاهرت بأنني متشوقة لمعرفة محتواها.

سارة

كان هناك طعام على الغداء يكفى لإنهاء مجاعات أفريقيا!
جلست سارة على كرسي مقابل لي وكان عمي بجانبها، في
وقت آخر ربما كنت تضايقت من هذا الترتيب، إلا أن هذا
الوضع كان يناسب خطتي تماما. فقد قضيت معظم الوقت
أحاور عمي. كان حمله على الحديث في البداية صعبا، فكان
يرد ردودا مقتضبة ويقول "كُل يا عمر" وكأنه يريدني أن
أسكت، إلا أنني أجبرته على الحديث أخيرا عندما تحدثت عن
جمال عبد الناصر، عالما أن عمي يعشقه، وأخذ عمي يحدثني
عن أهامه وعن حرب الاستنزاف وعن الحكومة التي تم تغييرها
عند زيادة سعر الزيت قرشا واحدا، وأخبرني أنه جاء بمجموعة
شرائط تحوي خطبه جميعها، فأخبرته عن كتاب صغير اشترته
من سور الأذربكية عن فلسفة الثورة وقد كتبه جمال عبدالناصر
نفسه أو هذا هو المذكور في الكتاب على الأقل، وتحمّس عمي
كثيرا لذلك وطلب مني أن يستعير الكتاب فأخبرته أني سأأتي به
في الزيارة المقبلة، وانتقل الحديث عن سور الأذربكية وأسعار
الكتب التي وصلت عنان السماء و.....و.....المهم أني تحدثت
مع عمي حول معظم المواضيع التي أعرف أن أبي لا يتوقف عن
الحديث فيها إذا ما تم فتحها. حتى أنني أكملت معه الحديث

وحدنا في البلكونة مع كوين من الشاي بينما وقفت سارة خارج البلكونة تنظر لي وتضحك وهي تأكل الشيكولاتة وتضيق عينها بينما تقول لي بشفتها فقط بدون أن يلاحظ عمى "أه يا لثيم" وانتهت السهرة على خير وشكرتني سارة على (هارى بوتر) وتصفح فيها والدها قليلا بينما همست لي سارة بأن أرن عليها عندما أصل البيت لأنها تريد أن تحدثني على التلفون.

عمر

عشة العصفورة

- " متهيألى عمر ولد ممتاز...والده كلمني على موضوع الشقة وقاللي أنه لو رضينا ممكن عمر يسكن فى شقة جده القديمة فى فيصل بعد ما يجدها بدل ما يلور على شقة إيجار وقعد يقوللي إن سارة تستاهل أحسن حاجة بس الولد لسه بيبتدي حياته ".

- "ما أنا وأنت بدأنا حياتنا فى شقة باباك وكنا عايشين مع أهلك كمان...."

- "بس أنا وانتي كان بينا قصة حب....."

- "كان؟؟!!!"

- " (ضاحكا)- مش قصدي ... المهم ،أوافق على طلبهم إننا نعمل الخطوبة قريب؟"

- "اللي تشوفه"

والد و والدة سارة

- "تفتكر يا بابا هيوافقوا على موضوع الخطوبة ع الشهر الجاي؟"

- "ان شاء الله هيوافقوا ،إنت مش بتقول إن سارة ماعندهاش مانع..."

- كان هذا جزء من الحوار الذى دار بيني و بين أبي بعد لقائه مع عمي واقتراحه عليه بأن أبدأ حياتي مع سارة فى شقة جدي القديمة، وبالطبع لم يكن لدى سارة مانع (كما هو معلن للجميع) حيث أن الحقيقة أن سارة هى صاحبة هذا الاقتراح فى الأصل ولكننا اتفقنا أن يأتي الموضوع وكأنه اقتراحى مصحوبا بالكثير من إظهار التقدير لسارة كي يرضى والداهما عني ويوافقوا على إتمام الخطوبة.

- لعل أكثر ما يسعدني فى هذا كله أنني وسارة أصبحنا نمثل جبهة مستقلة ، فمع كل الإحترام لعائلتي إلا أنني أشعر أننا أصبحنا ننتمي لأحدنا كل للآخر بأكثر ما ننتمي لأحد آخر.

- وكم كانت سعادتي وهى تُملئ عليّ خطة اقتراحى على أهلي موضوع شقة جدي وكيفية عرض الموضوع على أهلها.

- هذه هى أول خططنا سويا "ياارب تنجح"

عمر

عبقرية أنا ! كان عمر يحكي لي قصة حياته في التليفون
وكنت مستمتعة بذلك على الرغم من أنني عادة لا أحب
الاستماع كثيرا وفي وسط حديثه أخبرني عن شقة جده القديمة
والتي كان يعتبر النهاب إليها عيداوسأله عن مصير هذه
الشقة فأخبرني أنها مغلقة منذ وفاة جده وانتقال عمه منها
بسبب سفره وعائلته إلى الإمارات، وعرفت أن عمه لن يرجع
لهذه الشقة لأنه اشترى منزلا في مكان أفضل ومع الحديث
أقنعت عمر بأن هذه الشقة مناسبة لنا وللحق لم أبذل أي
مجهود لإقناعه فهو يريد أن تتم الخطوبة بسرعة وكذلك أنا
(ولكنني لم أخبره بهذا طبعاً). وكانت المشكلة الوحيدة أن هذه
الشقة ميراث مشترك بين والد عمر وأخيه وأخته.

صلة

لم تكن هناك مشكلة كما ظننا أنا و سارة ، وللدقة كان هناك مشكلة ولكن حلها جاء على يد أبي (ربنا يخليه) بسهولة ، فبعد أن اقترحت عليه موضوع الشقة قام في صمت واتصل بعمي في الإمارات وأخبره . ويبدو أن عمي قد وُثِّع أبي لأنه يستشير في شئ مثل هذا وأخبره بأنني مثل أحد أبنائه وأن نصيبه في الشقة لي في أي وقت وسيتنازل عنه عند نزوله إلى مصر وقت الخطوبة، أما بالنسبة لعمي فقد ذهب إليها أبي في اليوم التالي بعد زيارة إلى البنك ولم تعترض على الفكرة وكذلك لم تعترض على المبلغ الذي دفعه أبي لها بدلا من نصيبها في الشقة! حسنا..... لم أكن أتوقع منها موقف شهامة مثل موقف عمي على كل الأحوال.

عمر

تم تحديد ميعاد الخطوبة بناء على موعد إجازة عم عمر، ذلك
الرجل الشهيم الذى سنسمي ثالث أبنائنا على اسمه (حيث
سنسمي الأول على اسم والدى والثاني على اسم والد عمر!)
أما بالنسبة لعمه عمر فموقفها طبيعي وهذا حقها وكذلك هي
ليست في نفس مستوى عم عمر المادي ولكنني مع كل هذه
الأسباب لم أستطع أن أستلطفها كثيرا. بالنسبة للشبكة فبسبب
ارتفاع سعر الذهب قررنا شراء شبكة ألاماظ!!! طبعاً هذا محض
تخيل وإن كان عمر قد أخبرني أنني أستحق ما هو أغلى من
الأماظ وعندما سألتها عما هو أغلى من الأماظ قال "أنا طبعاً يا
حبيبي".

تعجيني ثقته بنفسه، ولكن على الرغم من اتفاقنا على كل
شيء إلا أن الشبكة تسببت في أول شجار بيننا...

أول خنقة يسه العصفافير

لم أتخيل أبدا أن أتسبب في أول شجار بيني وبين عمسـر.
وكان الشجار غريبا من نوعه. فكل ما حدث أنه بعد ما تم
الاتفاق بين والدنا حول الخطوبة و الشبكة والتي اتفق الجميع
أنها لن تكون شيئا كبيرا نظرا لأن عمر لا يزال في بداية حياته
وسيصرف كثيرا على تجهيز شقة جده ولم يكن لدي أي مانع
ولكن كان عندي حلم واحد فيما يختص بالشبكة؛ الدبلة .

لم أرد أي دبلة. لا فمعي الشبكة بأكملها ولكن فمعي الدبلة
فهى رمز اتحادى بعمر وانتمايى إليه. وحدثت عمر على
التليفون (الذى أصبح طرفا آخر من أطرافى من كثرة اتصالى
بعمر) وتحدثنا عن الشبكة وعن الجواهرجى الذى يعرفه عمسى
والذى سيكرمنى فى سعر (المصنعية) وأخبرته عن موضوع الدبلة
التي أحلم بها والتي أعلم أنها ستكلفنا بعض الشئ لأنها ستصمم
خصيصا لنا و أخبرته أن أدخر بعض المال وأنى سأدفع معه فى
هذه الدبلة و....كانت هذه هى نهاية المكالمة فقد صمت عمر
طويلا بعد اقتراحى حتى شعرت أنني سأبكي. أردته أن (يزعق)

أو يرفض الاقتراح ولكنه صَدَّر لي صمته الذى أوجع قلبي.
بدأت ألتئم بالاعتذار وأقول أن هذا مجرد حلم " ومشى لازم
الدبلة دي " ولكنه قال بمدوء لا يدعو للراحة " معلىش يا سارة
أنا مضطر أقفل معاكى دلوقتى... نتكلم بعدين " وأنهى المكالمة
و جلست أبكى لأول مرة بسبب عمر.

سارة

و كأنه لا يكفيني أنني لن أستطيع شراء شبكة محترمة لها
ولكنها تقترح أن تساعدني في دفع ثمن الدبلة. ألم يكن
بإستطاعتها أن تخبرني بما تريده فقط بدون أن تخرجني بهذه
الطريقة. "يعني يا سارة شايقة أني مش هاقدر حتى أجيلك حته
دبلة نفسك فيها" كانت هذه الجملة التي أردت أن أقولها لها
ولكني أثرت الصمت لأنني أعرف أنني لو تحدثت كانت الأمور
ستزداد سوءا وبخاصة بعد ما عادت لتخبرني أنها لا تريد هذه
الدبلة وأنها مجرد حلم .. "ليه يعني هيا هتجاوز شحات؟" أشعر
بالغضب الشديد منها .. لا بل أنا أشعر بالغضب من أحوالي
المادية. لم أتخيل أنها ستري أنني بحاجة للمساعدة لشراء أول
طلب لها مني وكذلك أن يكون هذا الشيء هو الدبلة التي
ستعلن ارتباطنا. الشيء الذي لا أريد الاعتراف به حتى لنفسى
أن ثمن الدبلة بالفعل غالٍ عليّ قليلا ولكنني سأتي بها . "
هاشتري لها أغلى دبلة فيكى يا مصر. "

عمر

" يا دبله الخطوبة عقبالنا كلنا... " كنت أحب هذه الأغنية بشدة ولكنني منعت نفسي بالكاد من البكاء حينما سمعتها اليوم. " يعني يا ربي أول خنافة تبقى على الدبله " المشكلة أنني لا أستطيع أن أشعر بالغضب من عمر، أحاول أن أوهم نفسي أنه غضب لأنه بخيل لأنه لا يريد شراء دبله غالية ولكنني بالطبع أضحك على نفسي. أعرف أنه غاضب لعرضي مساعدته في دفع ثمن الدبله " طب ما هو كده يبقى عامل فرق بيني وبينه " هكذا حدثت نفسي . لماذا يكون الرجال بهذا الغرور ؟ و ما الشيء الذي يجرح الكرامة في عرضي " ما إحنا هنبقى حاجة واحدة "

أفكر في الاتصال بعمر و الاعتذار . " بس هو أنا عملت إيه عشان أعتذر ؟ .. بصراحة أنا مستعدة أعتذر بس خايفة ما يقبلش أعتذارى ويبقى شكلى وحش. لازم هو اللي يتصل بيّا..الراجل هو اللي لازم يعتذر دائما حتى إن ما كانش غلطان ،ماما بتقول كده لما بتزعل مع بابا. "

سارة

لم أتصل بسارة لمدة يومين ولم أرن عليها وهي بالتالي لم ترن عليّ كذلك. لقد أحتفى غضبي إلى حد ما وأحاول أن أتفهم موقفها. لقد كانت تريد المساعدة فقط ، و لم تقصد جرحي أو إحراجي .

" هي دائما كده بتقول اللي في بالها من غير تفكيربس مالهش حق تظن أن غلبان قوى كده لدرجة إن ما أقدرش أجيبها الدبلة اللي بتحلم بيها.... وحشتني قوى ومش عارف أتصل أقولها إيه."

عمر

سأتصل به الليلة وأعتذر له " فيها إيه يعني؟... ونخليه ما يقبلش اعتذارى وأنا أهمله ...يعني إيه الراجل هو اللي لازم يعتذر.. أهو الراجل بتاعى مش عايز ينطق من ساعة ما زعلته..ماشي يا عمر هنت عليك عشان ماتنصلش بيا يومين بحالهموالله لأوريك."

سارة

- ألو ..إزيك يا سارة؟

- بخير...وأنت؟

- الحمد لله ، عاوزك بكرة إن شاء الله تحضري نفسك
عشان نزل نختار الشبكة وتقوللى للجواهرجى على تصميم
الدبلة اللي فى بالك.

-

- أنا هاكلم عمى وأقوله عشان ييجي معنا هو وطنط
وأخوكي وطبعا بابا وماما ومروة أختي جايين

-

- إيه عايزه تقولي حاجة ؟ (قالها بلهجة مأكرة)

- لأ أبد بس بخصوص ال.....

- (بجد) سارة

- (بسرعة) بكرة هانستناك إن شاء الله

- طب إدينى عمى عشان أكلمه

كان هذا هو أهم جزء فى حديثي التليفوني مع سارة والذي
ختمته معها بعد أن تناولها عمى السماعة بأن أخبرها أن ترتدي
الطاقم اللبني الذي أرتدته أول مرة رأيته فيها .

عمر

أبكي للمرة الثانية بسببك يا عمر .. والله لأوربك لما
تحتوز. تصوروا تصل بي قبل أن أرفع سماعة التليفون
بلحظات. كانت المكالمات سريعة كالعاصفة وكان صارما إلى
حد ما. لم يعطيني فرصة للاعتذار أو للحق لم أستطع أنا أن
أنطق بشيء... تذكرته في أول لقاء لنا حينما لم يستطع هو
الحديث وفوجئت به يطلب مني ارتداء ذلك الطقم الذي
ارتدته في أول لقاء لنا ... هل لا يزال يتذكره!؟ أشعر بسعادة
تدفعني للبكاء ... لم أكن يوما رومانسية حمقاء بهذه الطريقة .
بقى أنا سارة أبكي لأني سعيدة ... ماشي يا عمر... كله ده
بسببك.

لأول مرة أناام مرتاحة منذ ليلتين والغريب أنه لأول مرة
أحلم بعمر منذ التقينا ولكنني لن أخبركم عن الحلم بالطبع -
عشان ده سر بيني وبين نفسي وكمان عشان أنا
باتكسف - .

سارة

يادبلة الخطوبة

بطاقمها اللبني الحبيب نزلت إلى الشارع مع والدتها لتركب
في سيارة والديها ووقفت مع أهلي بأسفل عمارتهم لأننا أردنا
الذهاب مبكرا ولم نرغب بالصعود لأن عمي لن يتركنا نرحل
بسهولة قبل أن نلقى واجب الضيافة وكذلك لغرض في نفس
يعقوب لن أبوح به الآن.

سلمت على والدتي سارة وسألتها عن صحتها وفتحت لها
باب السيارة لتركب بجوار عمي وتراجعت عدة خطوات
للوراء لأفتح لسارة الباب الثاني وابتسمت في عينيها وتمتمت
قائلا " وحشتيني " فأجابتنني بعيون ضاحكة مليئة باللوم " وأنت
كمان يا ربحم " مش عارف أعمل إيه والله في
رومانسيتها الناشفة دي.

عمر

نزل أبي قبلنا ليستن السيارة ويقف مع أهل عمر الذين
أصروا على الذهاب مباشرة إلى الجواهرجي قبل الصعود إلى
مزلنا. أنهيت ارتداء ملابسى وذهبت إلى الشرفة لأرى عمر.
كان يرتدى بذلة بيع صيفية يبدو فيها رائعا كعادته وقد وقف
يضحك على شيء ما مع والدي ووالده بينما كانت والدته
وأخته في السيارة.

نادت عليّ ماما لتسرع بالتزول فأغلقت الشرفة وتبعتهما.
عند السيارة أخبرني أنني أوحشته وأعطيته أحد ردودي
الرومانسية بشدة ! وركبت السيارة وأنا أشعر وكأننا بالفعل
قد تزوجنا وأنه يفتح لي باب سيارتنا لأجلس بجواره، ولكن
كان هذا حلما بالطبع، فقد ذهب عمر لقيادة سيارة والديه
بينما جلس أخي الأصغر إلى جوارى وهو يضحك بشدة
ويخرج لي لسانه ويقول بصوت منخفض حتى لا يسمعه أبي "
كان نفسك هو اللي يركب جنبك مش كده؟" وبالطبع
أعطيته لكمه محترمة في بطنه فأخرج صرخة مكتومة لم
يلاحظها أبي الذي كان منشغلا في القيادة.

وضع أبي شريط أم كلثوم في كاسيت السيارة وهذا دليل
على مزاجه الراق ولكن اعترض أخي مصطفى وطلب منه أن
يشغل الراديو على " نجوم FM " حتى نسمع أغان (فرايجي)
تليق بالمناسبة. وسألني أبي عما أريده قائلا "أهأردة سارة هيا
اللي تقول نشغل إيه" وأخبرهم أن يشغلوا أي شيء فقد كنت
أستمع بموسيقى خاصة وأغنية جميلة تتردد في رأسي وقلبي ولم

أكن بحاجة لأي شيء آخر. ولكن قام أبي بالامثال لإلحاح
مصطفى وحول على نجوم FM وكانت تذيع أغنية صابر
الرباعي الجديدة "أجمل نساء الدنيا" فابتسمت حينما سمعتها ،
فنظر لي مصطفى وقال "أبوه يا عم" فضمت قبضة يدي
ورفعتها مهددة فغطى بطنه بكلتي يديه والتصق بباب السيارة
وهو يضحك بشدة.

سارة

جلس أبي بجواري بينما كانت أمي وأختي مروءة في الكنيسة الخلفية. تقدمت بالسيارة أمام سيارة عمي بعد خروجنا إلى الطريق العام وذلك لأن أبي هو الذي سيخبرني بالطريق إلى محل صديقه الصائغ. أثناء مرور سيارتي بجوار سيارة عمي نظرت إلى سارة ولكنها كانت منشغلة بالشجار مع أخيها على ما يبدو. أشعر كثيرا أنها طفلة ولكنها طفلتي الأثيرة. قمت بتشغيل أغنية لأم كلثوم يحبها أبي فقد كنت أريده راضيا عني بشدة اليوم لكي أنفذ عخطي التي لن أخيركم بها الآن. وصلنا أخيرا إلى الصائغ ونزلنا جميعا ودخلنا المحل الكبير في وسط الزغاريذ التي ظننت في البداية أنها لنا، ولكنها كانت من أهل عروسين آخرين يختاران شبكتهما. كان المكان مزدحما ووقفنا جميعا نشاهد المعروضات الذهبية. بعد ذهاب العروسين تفرغ لنا الصائغ وعرض علينا العديد من الخواتم والكوليهايات والإنسيالات، ولم تختار سارة إلا خاتم ومخمس ولكنني أصررت على أن تختار إنسيال وحمدت الله أنها لم تفكر في الكوليهايات لأنها كانت غالية جدا وليس هذا بخلا والله ولكنها الظروف. وبعد ذلك طلبت من سارة أن تصف تصميم دبلتها للصائغ وبينما هي تصف كنت أبتسم لها وعقلي يفكر في شيء آخر.

عمر

دخلنا محل الجواهرجي لنجد عروسين آخرتين يختاران
شبكةهما، شعرت أن العالم كله يحتفل معي وأن كل البنات
ستختار شبكةها معي اليوم.

تأملت العروسين وبيني وبينكم شعرت بالسعادة حينما
لاحظت أن عمر أوسم من العريس الآخر، ربما هذه تفاعلة
ولكنني سعيدة لأنه أجمل رجل في عيني. لم يعجبني ذوق
العروسة في اختيار شبكةها للدرجة أنني كدت أُنهيها عن اختيار
غويشة ذوقها رديء ولكن يبدو أن أمي تنبأت بما كنت سأفعله
فسحبتني من يدي لتريني خاتما وإنسيالا. ولكنني لم أكن أرغب
في أكثر من خاتم يصاحب الدبلة والمحبس .

وبالفعل لم أختَر غير ذلك بالرغم من أن الجميع طلب مني
اختيار قطعة أخرى ولكنني بالتأكيد لم أسمع كلام أحد إلا عمر
بالطبع بعد أن أعطاني إحدى نظراته النارية فخفت أن يعتبر
رفضني لاختيار قطعة أخرى تقليل من شأن رجولته فساخترت
إنسيالا جميلا جدا وبعد ذلك جاءت اللحظة المهمة حينما
بدأت وصف تصميم الدبلة للصائغ واستغرب الجميع طلبي
لنقش حرفي اسمي و اسم عمر على الوجه الظاهر للدبلة وليس
بداخلها كما هو معتاد، إلا أن هذا كان أساسيا في تصميمي
وبالطبع لم يعترض عمر على طلبي.

حقيقةً لا أصدق أنني أختار شريكتي وأنني أجلس الآن
وأصف تصميم ديلق، ياليتني أحضرت الكاميرا معي لتصوير
هذه اللحظة ولكنها على أي حال ستبقى مصورة بالألوان في
قلبي.

سارة

بعد أن اختارت سارة الشبكة واختارت دبلتي أيضا، قام أبي بدفع ثمن الشبكة بعد بعض الفصال حول سعر المصنعة بالرغم من أن الصائغ قد وعد أبي من قبل بتخفيضها من أجل خساطر معرفتهما ببعض. ولكن كل هذا كان لا يشغل بالي فقد كنت قلقا أترقب عخطي التي كنت على وشك الشروع فيها، حيث قام الجميع من أماكنهم و هنا نظرت إلى أبي الذي كان شريكا معي في الخطة فذهب باتجاه عمي ليهمس له بكلمتين وسمعت عمي ينظر له بخرج ويقول " طب و الغدا" وأجابه أبي " يتغدوا بره يا سيدى وأحنا هناكل كل الأكل اللي عملتوه" وضحك بجمرا عمي على الابتسام . وهكذا ركب والداي في سيارة حموي وركبت سارة بجواري في سيارة أبي بينما جلس أخوها الأصغر مع مروة أختي في الكنية الخلفية. ونظرت لها وهي بجواري في السيارة وابتسمت و تنفست الصعداء.

عمر

حدث كل شيء بسرعة، كنت أظن أننا سنذهب إلى المنزل
وأنني سأحظى ببعض الوقت مع عمر في وسط زحام أسرتينا
ولكنه فاجأني حينما قال لي بصوت هادئ ونحن في طريقنا
خارج محل الذهب " تعالى اركبي معايا" فأجبت " يا سلام...
بابا هيرحب جدا!" فأجاب ضاحكا وعينه تمتلئ بمكر صياني
أسرني " صديقي هتركي معايا". وفوجئت بأمي تخبرني أني
سأركب مع عمر و مروة و مصطفى في سيارة حموي، ولم
أستطع منع نفسي من الابتسام ولكنني نظرت إلى أبي بسرعة
فابتسم ابتسامة صغيرة وقال " بس ما تتأخروش" وكانت هذه
مفاجأة أخرى ... إذا فهذه ليست مجرد توصيلة مع عمر
ولكنها أول خروجة رسمية معه "
ياهووه "

سارة

أول خدوجة

"وكأنني انتقلت إلى عالم آخر مثل عالم أفلام الكارتون بألوانه الرائعة وحكاياته المبهجة و موسيقاه الرقيقة المنبثة من النسيم " باين عليا بقيت شاعرة ولا إيه؟! " لكن فعلا الهواء نفسه له رائحة أجمل و الجو دافئ وليس حارا حتى و كأنني أشعر أن الدنيا تحتضني. أجلس في السيارة قديمة الطراز مع عمر متأكدة أنني أفضل حظا من كل أصحاب الي إم دبليو والمرسيدس المارين بجوارنا. أنظر اليه بقميصه الكريمي بعد أن خلع جاكيتة البذلة ثم أشعر بالحرج من تأملي له و خاصة أنني ألاحظ ابتسامة ترسم على محياه فأشبح بوجهي تجاه النافذة ولا أستطيع منع ابتسامة كبيرة ترسم على وجهي من شدة سعادتي. ينطلق صوت مصطفى فجأة "هو احنا رايجين على فين" فأجيبه أنا "مالكش دعوة ، هيا خطوطك و لا خطوطي" فيضحك عمر ويقول له " ما تقلقش يا عم ،هيعجبك المكان اللي هنروح" ثم ينظر إلي و يهديني ابتسامة رائعة. الغريب أنني فضولية بطبعي ولكنني هذه المرة لم يكن يعنيني أى شيء سوى أنني مع عمر ولنذهب إلى أي مكان حتى ولو اصطحبني إلى المتحف مثلما فعل خطيب طاقق لإحدى صديقاتي.

سارة

كنت أعرف أن مروة و مصطفى سيأتيان معنا، فبال تأكيد
لن يتركنا أهلنا نخرج سويا وحدنا قبل حفلة الشبكة على الأقل
ولكنني أعددت العدة لهذا.

الغريب أن سارة لم تسألني عن وجهتنا وهو الشيء الذي
أدهشني فعلا لمعرفتي بفضولها الشديد ولكن مما جعل حبها
يتعزز في قلبي أكثر في تلك الخروجة كان عندما رفضت حتى
أن أجيب على سؤال أخيها عن وجهتنا وكأنها تخبرني أنها تشعر
بالأمان معي.

كنت أريد النظر إليها أثناء القيادة ولكنني خشيت أن أسرح
فيها وينتهي الحال بنا في القصر العيني بدلا من دريم بارك
....أخ...عرفتوا إحنا رايمين فين!

عمر

"دريم بارك" واخذني الملاحى يا عمر فى أول خروجه ليا
معاك. قصدك إيه يعنى إنك هتتجوز عيلة... ماشى يا عمر
مردودة ليك بردوه! ". نظرت له بدهشة وهو يركن السيارة
بجوار الملاحى بينما مصطفى يصيح فرحا ومروءة تضحك معه.
نظر إلى وجهى المندهش و ضحك ولم ينطق بكلمة وذهب
ليشترى التذاكر.

"طب ده ثمن التذاكر ممكن نقعد بيه فى مطعم جميل ولا
كافيه رومانسى ! ولا هيا عيلت ولا إيه!! " عاد بالتذاكر
وأخذ مصطفى ومروءة فى يديه وتبعتهما وأنا لا أعرف هل
أضحك أم أبكي. عند دخولنا قالت مروءة أنما ستلعب لعبة
"النهر النائر" حتى تحف ملابسها على مدار اليوم واتجهت هى
ومصطفى إلى طاوور اللعبة وبينما أنا ذاهبة وراءهم استوقفني
عمر

- إيه رايحة فين؟ -

- (بغىظ) رايحة أركب معاهم وإن شاء الله هرميك فى النهر
النائر لما نركب

- (يضحك بشدة) ليه بس دا احنا لسه شارين الشبكة
طب استنى بعد الدخلة عشان توريشني .

- وكمان بتضحك .. يعنى متخافق معايا وما سمعش منك
ولا كلمة إلا لما خلاص هنزل نجيب الشبكة وبعدين لما تخرجنى
تاخذنى الملاهى!!!

- بس بس بس دا إنتي شايلة مني قوي بقى مع إني على ما
افتكر ما كنتش سبب الخناقة دي .

- سييك من الخناقة.....إزاي ماتعيرنيش كل ده ...أمال
لما نتخافق و أحنا متجوزين هتعمل إيه ؟
- (ضاحكا) هنام فى الصالة

- انت بردوه بتضحك وبعدين ملاهى إيه اللي جاييني
فيها دي ...قصداك إيه يعنى هو أنا عيلة؟؟!!

- (بابتسامة خبيثة) إنتي مش قولتيلي إنك بتحبي الملاهى
قوي وإنك نفسك تروحي ديزني لاند معايا فى يوم من الأيام
أهى دى تصيرة لغاية مانروح ديزني.

- (لم تستطع منع نفسها من الابتسام) بس يعنى أقول لعيالنا
فى المستقبل إن أول خروجة ليا مع أبوكم كانت للملاهى
- (بابتسامة و نبرة خبيثة) : عيالنا....

- (مخرجة بشدة) والله انت قليل الأدب (وتشيع بوجهها
بعيدا عنه فيدور حولها ليواجهها).

- بس اسمعي بس فكرتي ...أنا قلت لو روحنا لأي مطعم مصطفى و مروة هيفضلوا لازقين جنبنا لكن كده هيتشغلوا في اللعب وأحنا نقعد مع بعض براحتنا

- (بدلال) ياشيخ!؟

(يضحك بشدة ويصطحبها ليجلسا على أحد المقاعد بعيدا عن ضوضاء الألعاب)

الغريب والجميل أنني أكتشف في سارة أشياء جميلة وصفات لذيذة في كل مرة نتحدث سويا، ولكن هذه المرة كانت وكأنها لقاء سحري لا يفصلنا فيه التلفون و لاأنجلس فيه في مترهم. جلست بجواري محافظة على وجود مسافة بيننا وخاصة في وجود حقيبتها في تلك المسافة. وكلما نظرت لها في عينيها الجميلتين كان وجهها يصبح ورديا ، وتشيح به بعيدا وعندما سألتها إذا ما كان توردد وجهها خجلا مني ضحكت بتوتر وأخبرتني أني أهلكس و أن وجهها أحمر من سخونة الجو ولكنني أستطيع الآن أن أقول أني أعرفها جيدا لأميز مداراتها لخجلها بالضحك و السخرية.

اشتقت في لحظة لأن أمسك بيدها ولكنني قررت أنه من الأفضل أن أدحر كل ذلك لما بعد كتب الكتاب لعل الله يبارك في زيجتنا.

عمر

حيي لعمر ربما أجمل شيء في حياتي، ولكنني أعترف أنني
بعد لقائنا وجدت أن احترامي له أجمل. فهو في كلمة واحدة "
كريم" ، وليس كرما ماديا فقط بسبب كل مادفعه في الملهي و
الغذاء هناك و "التوبيخ" الكبير الذي اشتراه لي ولكنه كريم في
أخلاقه كذلك. لم يحاول أن يجلس بجواري تماما كما أرى
ثنائيات الشباب و الفتيات من حولنا ولم يحاول حتى الإمساك
بيدي حتى في أثناء تحركاتنا من لعبة إلى لعبة ، بل كان يضع
يده على كتف مصطفى وتقدمنا قليلا حتى يقف مصطفى و
مروة في طاوور اللعبة أو يبدأ فيها ثم يعود إليّ. " ولو أنني بيني
و بينكم خائفة لا مايكونش الكلام ده في دماغه أصلا وهو
مش عايز يمسك إيدي من الأساس! هاشوف الموضوع ده بعد
كتب الكتاب. الغريب إنه ما قالش بحبك ولا مرة من ساعة
قراءة الفاتحة ولا حتى في الخروج دى ...صحيح هيا باينة في
عينيه بس أنا عايزه إقرار شفهي كمان! المهم إني بالرغم من إني
ما ركبتش في ولا لعبة لكن دى كانت أحلى زيارة للملاهى
في حياتي. "

سارة

فرحت عندما وجدت أننا في الملاهي ولكن بعد ركوبي أول
لعبة واكتشاف أن سارة و عمر لم يركبا معنا شعرت بالقيظ
والغيرة من عمر ونزلت من أول لعبة مسرعا لأرى أين ذهب
هو و سارة ولكنني وجدتهما جالسين متباعدين على أحد
المقاعد الخشبية. شعرت بالفخر بسارة فهي لا تفعل شيئا غير
لائق أبدا أما عمر فقد كنت قلقا منه قليلا و لكنه أثرر معي
كثيرا وكذلك لعب معي زوجيا في إحدى ألعاب الفيديو جيم
ولم يوافق أن أدفع وشعرت بالراحة تجاهه وأنه "واد جدع"
ولكنني بالطبع لن أبعد عيني عنه و هو مع سارة فانا رجلها حتى
تنزوج.

مصطفى

"كوبري يعني" كانت هذه هي فكرتي حول مهمتي في هذه
الخروجة، فيجب عليّ أن أكون رفيقة مصطفى الذي يصغرني
بأربع سنوات على الأقل لكي يتمكن عمر من الحديث مع
سارة "على راحتهم".

على رأي فؤاد المهندس "عقبالي يا رب عقبالي" في البداية
كنت أشعر أن الموضوع ثقيل على قلبي ولكنني اكتشفت خفة
دم مصطفى و استمتعت بمراقبته وهو يحاول مراقبة سارة
والاطمئنان عليها.

أردت أن أخبره أن يطمئن لأن عمر أخلاقه عالية وهو الذي
يُخشى عليه ولكنني لاحظت أنه كان يحاول أن يخفي مراقبته
لهم عني فلم أشأ إخراجهم.

ولكننا بعد ذلك اندمجنا في الألعاب و نسينا سارة
وعمر. " يعني يا سي عمر ماعرفتش تخطب واحدة أخوها أكبر
مني و لو بسنة واحدة!!! "

مروءة

أنتظنا

كان من المفترض أن أستلم الدبلة بعد أسبوع ولذا فقد اتصلت بعمر في اليوم السادس وسألته إذا كان سيأتي معي ومع أمي إلى الصائغ لاستلامها ولكنه أخبرني أنه لا داعي لنهايي وأنه سيستلم الدبلة وسيحضرها يوم حفل الشبكة. للحظة كدت أتشاجر معه فأهله قد تركوا الشبكة معنا ،حتى أنني احتفظ بها في غرفتي ولم أتركها مع أبي.. " يعني إيه يعني .. هيخلي الدبلة عنده رهن لغاية الشبكة! بس بصراحة لميت نفسي على آخر لحظة وقولت يعني الناس استأمنونا على الشبكة من غير حاجة إزاي يبقى تفكيري وحش كده. مش عارفة أنا بقيت وحشة كده ليه و متخيلة الأسوأ دايما. "

سارة

استلمت مكافأة مؤخرًا في عملي وعلى الرغم من أنني
أحتاج لكل قرش لتجهيز الشقة و شراء العفش إلا أنني أردت
بشدة أن أفعل بهذا المال شيئًا آخر. حدثت أُمِّي في هذا الموضوع
و الغريب أنها وافقت بسرعة وقالت "ربنا يرزق أختك بواحد
ابن حلال زيك". أخبرت سارة أنني سأستلم الدبلة من الصائغ
وأننا أعلم أنها ستموت من الغيظ من ذلك لأنها فضولية بشدة
و"هتتموت عشان تعرف شكل الدبلة هيبقى ازاي ... بس
خليها تتعلم الصبر شوية !"

عمر

قررت أفاتح عمر في موضوع خناقتنا قبل شراء الشبكة.
أنا مايجبش اتعامل مع حد كأني ماشية على الحبل خايقة من
أقل هفوة أقع... لازم يتعلم يناقشني في اللي مضايقه و يقول لي
هو عايز إيه مش ياخذ جنب ويلوى بوزه وأنا ما يجرقش دمي
حاجة قد لوية البوز."

سارة

(يزور عمر سارة مصطحبا أهله ليتفقوا مع أهلها على تفاصيل حفلة الشبكة وبينما يجلس الأهل في الريسبشن يتنحى عمر و سارة في كرسيين منفصلين بجوار النافذة)

سارة(بقلة صبر): استلمت الدبلة؟

عمر(ضاحكا): مافيش ازيك عامل إيه ..واحشني يا

ح.....يا عمر

سارة : ازيك ..عامل إيه ..واحشني ..استلمت الدبلة؟

عمر: محسسا في إن كل اللي بينا هو الدبلة

سارة: لأ طبعاً بينا الدبلة و المحبس كمان

وينفجر الأثنان في الضحك فتتجه أنظار الأهل إليهم

فيصمتا، وبعد لحظات

سارة: عمر ..بخصوص زعلتك قبل شرا الشبكة .انت مش

شايف أنك كبيرها شوية

عمر (بلا تعبير على وجهه): يعني إيه كبيرها؟

سارة : اديك هتبوز تاني أهوه

عمر: لا هبوز و لا حاجة بس الموضوع ده خلص

سارة: لأ ما خلصش... قصدي يعني أنا ما بتكلمش على
موضوع الفلوس... أوعدك يا سيدي إني هخليك تصرف عليا
لغاية آخر قرش في جييبك. أنا باتكلم عن المبدأ نفسه. أنت لما
زعلت سكت و هيت المكالمة و مسمعتش منك إلا بعد كام
يوم.

عمر: خلاص يا سارة كنت زعلان شوية ولما روقت
اتكلمنا

سارة: بس كده ما ينفعش

عمر: إيه ده اللي ما ينفعش؟

سارة: بص من الآخر كده أنا أحبك لما تزعل مني تقول لي
في وشي و نحلّ الموضوع سواء، ساعتها أعتذر لك أو تعتذر لي
ونتهي الموضوع في ساعتها.

عمر: بس أنا لما بازعل ما بجيش اتكلم لما
أزعل.....وبعدين أنا طيب والله وبروق بسرعة

سارة : هو صحيح مايشكرش في نفسه غير إبليس ،بس أنا
معاك في موضوع أنك طيب

عمر: "إبليس" .. الله يسامحك

سارة: آه إزعل بقى وغيب أسبوع عني عشان قتللك كلمة
ما عجبتكش

عمر: لأ هاعمل زي ما انتي عايزة سارة أنا زعلان
عشان أنتي شبهتيني بأبليس (لكن الضحكة المصاحبة للحملة
نفتها في الواقع)

سارة: وأنا آسفة يا سيدي ... شوفت اهوه خلصنا
الموضوع من غير لوية بوز

عمر (مستنكرا): لوية بوز !!؟

ويستمر الحوار الرومانسي بين سارة و عمر إلى أن
يستدعيهما أهلها لإخبارهما بما اتفقوا عليه بخصوص حفلة
الشبكة وما هو رأي العروسة.

تفاصيل ... تفاصيل

اتفقنا على أن تكون حفلة الشبكة بمنزلنا و سيقتنصر المدعوون على أسرتنا و أصدقائنا المقربين. وبعد جولة بين محلات تأجير فساتين الأفراح قررت أن أفصل فستان خاص بي للشبكة. كنت أعرف تحديدًا ما هو شكل الفستان الذي أريده، فقد كنت منذ فترة شاهدت فستان زفاف "رينيه زيلوجير" وقررت أنني إذا تزوجت يوما فسأفصل واحدا مثله. ولكن لأنه كان بسيطًا و منسابًا على الجسم فقد قررت أن أجعله لحفلة الشبكة ويكون لونه pink (أو على رأي عمر "بمبي يعني") وذلك لأنني قررت أن يكون فستان فرحي منفوشا وله ذيل طويل.

سارة

المفروض أن أكون في أسعد حال الآن و لكنني أشعر ببعض
الهمّ. أردد كثيرا دعاء " اللهم إني أعوذ بك من الهمّ
والحزن....." و لكنني لا أستطيع منع نفسي من التفكير في
المسؤولية المادية الملقة على كاهلي. صحيح أن مرتبي معقول
والحمد لله ، " وكنت زمان متخيل إنه مع مرتسب زي ده
هاعرف اصرف على بيتي كويس ، بس المشكلة دلوقتي إني
أكون البيت ده الأول. الموضوع عايزله "عكمة فلوس" (على
رأي سارة) عشان أعرف أفتح البيت الأول. و كالعادة روجت
لأبوي حبيبي وحكيته. ابتسم وقال لي " بص يا حبيبي
ماتفكرش في كل شئ مرة واحدة .انت مهندس كمبيوتر
وعارف أهمية التفكير المنظم والخطوات المرتبة...فكر الأول في
أهم حاجة لازم تخلص وهيا تجهيز الشقة وحتى لما تفكر في ده
فكر في حاجة حاجة... مثلا الأول تشيل الكراكيب اللي فيها
وتقرر إذا كانت مثلا السباكة أو الكهرباء محتاجة تعديل وبعدين
الدهان وصدقني في كل خطوة هتلاقى ربنا يرزقك بفلوسها من
غير ما تعرف إزاي... يابني رزق الجواز ده حاجة كده من
عند ربنا ،ماتنساش إنك بتطيع ربنا لما تعف نفسك و تتجاوز
واحدة صالحة و العبد لما يقوم بطاعة معينة ربنا يعينه عليها
...قوم بس اتوضى وصلّي ركعتين قضاء حاجة وصدقني
هتفرج "

عمر

"كلمني عمر المارده على التلفون و لاحظت إن حالته النفسية أحسن من اليومين اللي فاتوا . صحيح أنا لا عارفة هو كان زعلان ليه و لاهو كويس دلوقتي ليه بس مارضيتش أضبط عليه بالأسئلة لاني عرفت إنه مايجيش يتكلم عن اللي مزغله إلا لما المشكلة تخلص،أنا عارفة إني اتكلمت معاه في الموضوع ده بس هو مش هاتغير ما بين يوم و ليلة وكمسان واضح إنه مش زعلان مني أنا. وعشان كده هعديها له المرة دي. المهم قلت له إني هافصل الفستان بدل ما أجّر فستان ليستة واحده غيري قبل كده. سألني امي هاشتري القماش فأخبرته أن القماش عندي بالفعل وهذه ليست كذبة فقد اشتريت القماش بالأمس وهو عندي الآن ولا لزوم أن يعرف أنني اشتريته بمناسبة الخطوبة لأنه سيصر على دفع ثمنه وأنا عارفة "الزقة" المالية اللي بيعاني منها أي خاطب."

سارة

"نفسيتي ارتاحت كتير بعد كلامي مع بابا وكلمت سارة وعرفت أنها هتفصل الفستان بدل ما تأجر واحد ، وده أحسن

طبعا لأنى ماباحش موضوع التأجير ده لأنه بي فكرني بالسلف
و الدين وأنا بحب الواحد يحشي على قده.

" سألتني سارة عما إذا كنت سأشتري بذلة جديدة ولكنني
أخبرتها أن لدي واحدة جديدة بالفعل كنت قد اشتريتها من
محل مشهور في فترة الأوكازيون، في العادة لا أحكي تفاصيل
مثل هذه لأي شخص ولكن سارة لديها هذا الطبع الغريب،
فهي عندما تتحدث تخبرك بكل شيء يدور في بالها أثناء
الحديث مما يضطرك إلى التحدث معها بمثل هذه الصراحة.
ولكن للحق هناك موضوع ما لم أخبرها به بعد لأنني أنا نفسي
لم أصل فيه لقرار نهائي ولكن سيأتي وقته بعد حفلة الشبكة
بإذن الله.

عمر

" زراير البدلة و دبوس الكرافته " قمت بشرائها ليكونوا هديتي لعمر قبل الشبكة. وضعتهم في لفّة أنيقة و جهزتها لأعطيها له عند زيارته الأخيرة لنا قبل حفلة الشبكة. كانت زيارة عائلية حيث كان معه والده ووالدته و ذلك لأن علاقة صداقة قامت بين والدنا مما زاد من فرصة تفرغهم من بعضهم البعض وقلل من فرصة جلوسي أنا وعمر على انفراد !!

كانوا جالسين يتحدثون عن الذكريات وبتى هي أفضل ما ورثوه عن آبائهم ، وهنا أشارت أُمي إلى خاتم صغير يزين يدها وقالت أنه كان خاتم جدّها وقد أعطته لها بعد أن خُطبت لأبي وأخبرتها أنّها ستحظى بزيّجة سعيدة وبالفعل قد تتحقّق ترقّنا ، وهذا جعل أّبي يتدخل بكلّ تواضع قائلاً أعشان تعرفي بس انّني قد إيه محظوظة إن ربنا كرمك بيا!! " وذاك الجمع وأضافت أُمي أنّها ستعطيني الخاتم لعلّ الله يكرمني بزيّجة سعيدة. وهنا تدخل والد عمر قائلاً أنه هو الآخر سيعطي عمر خاتم الزراير و الدبابيس الذي ارتداه يوم زفافه لأنّه طاقم قيم ، قد احتفظ به كل هذه السنين ليعطيه لابنه يوم زفافه . ولم أستطع الاحتفاظ بالبسمة على وجهي وشعرت بغصة في حنقي.

سارة

أخبرنا أبي بأنه سيعطيني ثاقم أزرار بذلة زفافه لكي يكون
فألاً حسناً يجلب السعادة الزوجي فاستمت له باعتزاز ونظرت
إلى سارة فلاحظت تغير وجهها ، وهذه ميزة أخرى لها - أو
ربما عيب لا أدري - فعيونها تعكس برئوس كل ما تشعر
به، ولكنها سارعت برسم بسمه منكشفة على وجهها ولكنني
فهمت الموضوع . وبعد قليل بدأ برنامج ما ، يتابعه والدي
وعمي فانشغلا عنا وقمت أنا وسارة بالجلوس في مقعدين في
زاوية الريبشن يسمحان لنا ببعض الخصوصية ، وسألتهما
مباشرة "أمال فين الهدية اللي جبتها لي بمناسبة الشبكة؟"

سارة: " أنا اللي أجي ب هدية ولا إنت؟"

عمر: "أمال الشبكة دي تبقى إيه؟"

سارة: تبقى شبكة مش هدية!

عمر : ياسلاااااام تصدقي ماكتش اعرف كده ، ماشي
ياسني خدي الشيكولاتاية دي

سارة :هات ،حت في وقتها

عمر (ضاحكا) : مفيش شكرا

سارة:لأ مافيش

عمر: فين هديتي بقي؟

سارة: مافيش هدية

عمر (مكررا وكأنه لم يسمعها): فين هديتي؟

سارة: خلاص بقي يا عمر

عمر: يعني ماجبتليش طقم زراير

سارة (وقد توقفت عن أكل الشيكولاتة): أنست عرفت

إزاي، ده أنا حتى ماقلتش لما

عمر: العصفورة قالت لي

سارة: (والفضول يقتلها): عصفورة إيه ؟

عمر: " طب ما توريني الطقم"

سارة: (وهي تضغط على كلماتها) " مين اللي قال لك"

عمر : ما قلت لك العصفورة !

ضابت سارة من مناوراتي وأخرجت اللعبة الصغيرة من

جيب في تنورتها وأعطتها لي ، فتحتها وقبَّلتها (اللعبة لا سارة

بالطبع!)

عمر

قبل الشبكة

"أموت وأعرف إزاي عمر عرف إني جيت له طقم زواير للبدلة " لم يرد أن يخبرني بالحقيقة أبدا وظل يحدثني عن أن له اتصالات قوية بعفريت صغير السن يخبره بكل شيء يريد عني وعندما طلبت منه قول الحقيقة اعتدل في جلسته و مال عليّ وقال بصوت جاد " أصل يا ستي أنا عندي باللورة سحرية " ثم عاد للوراء و انفجر بالضحك وكدت أن ألكمه لولا وجود أهلنا في الجوار. ما علينا أنا حاليا في دوامة التحضير لحفل الشبكة، فعلى الرغم من أننا سنقيم حفلة على الضيق إلا أنني لديّ " تصور تاني خاــــــــــــص " فيما يختص بهذا اليوم المجيد في تاريخ البشرية ! يوم زواجي أنا الأميرة - سارة عامر خلف- على الفارس عمر إسماعيل المحمدي. " قصدي يعني يوم شبكتي بس الحماسة خدتن شوية! "

أرسلت لصديقتي الحميمات اللاتي سيحضرن الحفلة هذه الرسالة القصيرة :

"إليكم هذا النبأ الهام من القصر الملكي: ستقام بمشيئة الله في وسط حضور الأهل والأصدقاء حفلة شبكة الأميرة سارة

والأمير الفارس عمر و ذلك بقصر الأميرة و العاقبة عندكم في
المسرات"

أما عمر فأرسلت له في الليلة السابقة ليوم الحفلة هذه
الرسالة:

"مساء المانجا والأناثاس! مساء مكهرب و عامل ماس! مساء
جميل لأعز الناس"!!!

سارة

بعدما وصلتني رسالة سارة اتصلت بها و سألتها " مايجي
وأنا ناس مرة واحدة انتي ياب نتي مش قايلة إنك عامله
ريجيم؟! " وأخبرتني بالطبع بكل رومانسية أنها "إن ماكتتش
عاجباني أروح أشرب من البحر" ، فسألتها بكل براءة
" قصدك أشوف لي واحدة ثانية يعني " فأجابتي بكل هدوء "
آه شوف لك واحدة ثانية عشان أخنقك انت وهي وأرميكم
في البحر عشان سيد قشطة ياكلكم " فأجبتها بكل موضوعية
أن سيد قشطة لا يأكل البشر عادة وكذلك لا يعيش في البحر
وكانت النتيجة المتوقعة أنها صرخت في التلفون فضحكت
وحاولت تهدئتها بالرغم من أنني - بصراحة - أحب أن
أغیظها كثيرا! وخاصة لأنها تفتاظ سريعا و تفقد أعصابها
(شرير أنا مش كده!)

سألتي بعد ذلك عن تحضيراتي الخاصة قبل حفلة الشبكة ،
فأجبتها :

" تحضيرات إيه ، بكرة هاستحمي وألبس البدلة واجي أنا
وأهلي "

فردت ساخرة " وجاي على نفسك ليه وهتستحمي "
فأجبت بجدية " لأ أنا متعود أستحمي كل يوم بصراحة "
وسمعتها تأخذ نفسا عميقا لتحكم في أعصابها وقالت لي "

أقفل السماعة يا عمر قبل ما أطلعك من السلك وأخبطك
بحاجة " ضحككت وأخبرتها أنني بالفعل مضطر لإنهاء المكالمات
لأن لدي مشوار ضروري.

عمر

" طبعا حاسة بتوتر شديد ورجعت اشرب تاني (أشرب
سفن أب طبعا علشان الحموضة) عايزة الشبكة تكون مثالية
ورومانسية وكل حاجة بس حاسة كأن في حاجة خبطاني في
دماغي و مش عارفة أنظم أموري " ،أخبرت أمي بذلك
فقالت "أمال هتعملي أيه وقت الفرح!" كنت عايزة عمر
يرغى معايا شوية في ليلة الشبكة وكنت فاكدة إننا هنفضل
على التليفون للصبح ،لكنه أضطر ينهي المكالمات علشان عنده
مشوار .

يعني هو المشوار أهم مني.أنا هنام أحسنبكرا عندي
يوم طويل و جميل.

سارة

"بكره الشبكة.. المفروض إني أكون أسعد واحد في الدنيا
دلوقتي، لكن باين مافيش فرحة بتبقى صافية وخالية من الهم
سارة كانت عايزة تتكلم معايا شوية لكني خفت أتكلم معاها
أقوم أحكيها على الموضوع إياه. مش عايز أشوش على
فرحتها بالتفكير. قعدت قدام النيل في قاعة نهر في ساقية
الضاوي وأنا أسمع أنغام حفلة ورايا. سارة لو عرفت إن أنا هنا
لو حدي ممكن ترميني في النيل! إن شاء الله نيجي مع بعض بعد
الشبكة. ما فيش أحلى من أنك تدعى ربنا وانت قاعد قدامك
النيل وفوقك السما صافية."

"يارب تممها على خير و حلها من عندك".

عمر

حفلة الشبكة

لم أستطع النوم بعد صلاة الفجر. رنت على عمر بعد الصلاة فلم يرد عليّ فعرفت أنه نائم. تذكرت مقطعاً من أغنية لنجاح "وأنا رمشي ما داق النوم و هو عيونه تشيع نسوم ... روح يا نوم من عين حبيبي". لم يستيقظ أحد في المنزل بعد ولكنني أريد الحديث مع أحد بشدة، رفعت السماعة واتصلت بريهام - صديقتي - و التي أعلم أنها تستيقظ بعد الفجر لمشاهدة مباراة المصارعة على اللش (كل أصدقائي رومانسيين و عاطفيين مثلي!)

سارة

(رين تليفون عند ريهام مع ظهور رقم سارة)

ريهام : ايه يابنتي فيه حاجة؟

سارة :الهارده شبكتي يا إما

ريهام : وبعدين؟

سارة :تصدقني انك رخصة ، انا أعصابي مشدودة وعايزاكي
تعملي حاجة تهديني

ريهام: يا حبيبتي ما أنا مش قاعدة جنبك عشان أخطبك
بوكس في راسك يقوم يغمن عليك و تهدي.

سارة (بزعيق): بقولك أهدي مش أقدر

ريهام:بتفرجي على المصارعة ؟

سارة :لأ طبعا أنا ماأجبهاش

ريهام :روحي بس أتفرجي عليها وأنتي تهدي

سارة (محدة): قولي يا إما إنك عايزة تقفلي وتفرجي على
المصارعة

ريهام: خلاص ياسني أديني قفلت التليفزيون ، أبقي أتفرج في
الإعادة.مالك بقي ؟

سارة: قلقانة

ريهام: قلقانة من إيه ، عمر راجل كويس وكمان شكله
حلو.إنتي قمر ...وخلاص حضرنا كل حاجة عشان الشبكة
النهاردة .وكام ساعة وهاجيلك أنا والكوافيرة عشان نبدأ
نظبطك، وبالليل هتقعدي جنب عمر، وهناكل الجاتوه ونزغرد
أنا والبنات وتنفض الليلة ونروح ننام وتقعدي ترغي إنتي
وعمر في

سارة : بس كده ؟

ريهام :آه بس كده ، بلاش طبعك القلق ده ،ربنا كريم و
هيعدي الليلة على خير

سارة (تتنهد): خلاص أنا ارتحت شويه ، هنام شويه بقى
وانتي ماتأخريش عليا

ريهام (تتأب): مش هاتأخر ..روحي نامي بقي.

لم أستطع النوم ، صليت القيام و انتظرت الفجر وصليته
كذلك ثم نمت أخيرا. استيقظت لأجد رنة من سارة. اتصلت بها
ولكنني وجدتها نائمة... كثيرا ما اتصل لأجدها نائمة - هسى
بتحب النوم قوى كده ١٩- هجم على المنزل أصدقائي أحمد
فاخر و محمد محسن و علي و عادل وباقي العصاة وكان
هجومهم مبكرا حتى أنني خرجت من غرفتي لأجدهم يتناولون
الإفطار الذي أعدته لهم والدتي وقاموا - بكل بمحاجة -
بدعوتي لمشاركتهم الإفطار في منزلي! سألتهم عن سبب
حضورهم المبكر فنهرتني أمي لأتهم على حسب قولها " دول
نورونا" (على أساس إن النور كان قاطع قبل ما يحضروا!)

كان أحمد ممسكا كعادته بكاميرته ولكنه كان يصورني
هذه المرة. هزته كي لا يصورني لأنني مازلت أرثدي التريننج
ولكنه أخبرني بأنه يريد توثيق تحولي من عمر النعسان إلى عمر
العريس .

لم أناقشه حيث أن أحمد مجنون تصوير . ذهبت إلى المطبخ
لأشرب و اتصلت بسارة مرة أخرى فأخبروني بأنها في الحمام
(غالباً المرة الجاية هيقولولي راحت عند الحلاقا)

عمر

اتصل عمر مرتين فاتصلت به بمجرد خروجي من الحمام
ورد عليّ صوت غريب يبدو أنه لأحد أصدقائه الذي أخبرني
أنه في الحمام وسألني ما إذا كنت أنا العروسة فأجبت بالإيجاب
فبارك لي وأخبرني أنه سيخبر عمر بمكالمتي بمجرد خروجه. " هو
مال الموضوع بقى عامل زى الفيلم الهندي كده ليه .. هو
يتصل أبقي انا مشغولة و أنا أتصل يلقى هو مشغول. "
حضرت صديقاتي جميعهن وقمن بتحضير الإفطار سويا
وجلسنا مع أبي وأمي و مصطفى أخي وبالطبع كان الحوار
عبارة عن معاكسة البنات لأبي و معاكسته لهن وكل ذلك
بالطبع أمام أمي الغارقة في الضحك والتي لم تهتز لها شعرة حتى
عندما أخبرتها ريهام بأنها ستتقدم لأبي. طبعاً لم أستطع أن أكل
أي شيء سوى لقمة وضعها أبي الحبيب في فمي عنوة لأنه يظن
أنني شاحبة. لا أدري ما سبب كل هذا القلق الذى ينتابني
، المفروض أنني في قمة سعادتي ومع ذلك أشعر وكأن شيئاً سيئاً
سيحدث. ربما هي طبيعتي القلقة كما تقول ريهام . جميع
السيناريوهات السيئة تدور في عقلي : ربما سيحدث لي شيء ..
ربما سيحدث لأحد عزيز عليّ مكروه .. هل ستستمر هذه
الشبكة وسيكون عمر هو زوجي أم سيحدث شيء ما ونفصل

ويكون هذا اليوم ذكرى سيئة مثل يوم خطوبة صديقي الأتيم
بعد أن انفصلت عن خطيبها (النذل). لإنهاء كل هذا القلق
اتصلت بعمر وأخيرا قام بالرد عليّ.

سارة

سارة: صباح الخير يا عمر

عمر: صباح الخير يا عروسة

(الغريب أن مجرد كلمة عروسة منه أشعرتني بالارتياح)

سارة : مين اللي رد عليا من شويه ؟

عمر : ده عادل صاحبي من أيام ابتدائي

سارة : يااااه

عمر: صوتك متغير ليه؟

سارة: مافيش.....قلقانة شوية

عمر : مافيش قلق بعد المأزق ده يا جيلي ، انتي هتبقى في عصمة سي عمر بنفسه .

سارة (بغلاسة): دى شبكة مش كتب كتاب ياخويا

عمر (بثقة عظيمة بنفسه): يا روجي شبكة مع عمر تساوي كتب كتاب ،أنا كلمتي ما تولش الأرض أبدا

سارة (ضاحكة): طب بلاش الكلمة دى بقى عشان ما برخلهاش

(يظهر ضحيح الفتيات حولها وإحداهن تقول ضاحكة
"سيوها يا جماعة دى بتكلم الجو")

سارة : طيب هاقفل معاك بقى يا عمر عشان الكوافيرة
جت

عمر : طيب ماتدينى الكوافيرة عشان أقولها طلباتي

سارة (باستنكار) : طلبات إيه يا خويا ؟

عمر (ضاحكا): خلاص يا ستي أنا راضى بنصبي

سارة :طيب يا غلس لما أشوفك بس.

(سترجم القراء من تفاصيل مراحل تحويل سارة وعمر إلى عريس وعروسة على يد الكوافيرة والحلاق وثرثرة أصدقائهم حول خطوبات سابقة فاشلة وزيجات عجيبة تمت حولهم وطبعا تهريج أصدقاء عمر ، لأنكم بالطبع تعرفون نوعية أحاديث الرجال حين يجتمعون سويا !!!!

وننتقل الآن إلى حفلة الشبكة:

نظرت سارة إلى نفسها نظرة أحيرة في المرأة قبل الخروج ، بينما مروة (أخت عمر) تقول : "يا نخي زى القمر ، ياللا بقى الواد مستني لوحده بقاله نص ساعة " ، وبالطبع ردت عليها فاطمة صديقتي : " سيبها بس تستجمع شعاعتها "

ضحك الجميع وقامت ريهام بتأبط ذراعي فحاة بينما فتحت شروق الباب ووجدت نفسي في الريبشن - الذى

رفعنا أثاثه وتحول إلى قاعة صغيرة - ... لم أع شيئا سوى
زغاريد .. زغاريد وأبي وأمي ظهرا بصورة ما و أوصلاي
لأجلس على كرسي. هل تعرفون لعبة fish frenzy حيث
تصطدم السمكة بقنديل البحر فتخرج النجوم من رأسها ولا
تستطيع الحركة. أشعر بأنني مثل هذه السمكة بالضيـط عاجزة
عن التفكير والحركة. وفجأة ظهر عمر من وسط كم البشر
وأعطاني بوكيه ورد أحمر وجلس بجواري.

سارة

كان يوما طويلا، فعلى الرغم من وجود أصدقائي معي طوال اليوم إلا أنني كنت أتوق للحظة جلوسي بجوار سارة. فعلى الرغم من ادعائي أنني هادئ وخاصة ونحن على التلفون فأني أشعر بتوتر شديد وكنت أشعر أن نهاية ذلك القلق ستكون عند رؤيتي لها وكان ظني في محله فمسيحان الله زال الهم بمجرد رؤيتي لها وهي تتأبط ذراع صديقتها وشعرت أنني في مكاني الصحيح بمجرد أن جلست جوارها بعد أن قدمت لها بوكيه الورد الأحمر. وعلى الرغم من أنني أعرف أن سارة جميلة إلا أنها كانت تتألق وتمتد لنفسى "الحمد لله" فبين زحام الدنيا هداني الله لتوئم روحي. نظرت إلى عينيها فوجدتها تدمع وهي تضغط بأسنانها على شفيتها لتتمالك نفسها فناولتها منديلين سريعا وأخذت نفسا عميقا لأتمالك مشاعري فقد كانت سعادتي بمثل سعادتها ولكن قلقي كان أعظم.

عمر

[illegible]

كان كم البشر المحيط بنا يثير الضيق ، حتى أنهم أخرجوا
سارة بتعليقاتهم عندما رأوا دموعها ولكن صديقاتها تكفلن
بإحاطتها حتى استعادت هدوءها ، وهمست إحدى صديقاتها
بشيء في أذنيها جعلها تنفجر بالضحك وتنظر لي في
خجل.(بيبي وبينكم) لقد شعرت بالغيرة ، أردت أن أكون أنا
الوحيد الذي له حق الهمس بأذنها وأنا الوحيد القادر على إثارة
ضحكاتها ولكن .. كله بأوانه. وأخيرا خففت صديقاتها من
الحصار و استطعت أن أراها بشكل كامل ، " ولسه يادوبك
هابداً كلام ظهر أحمد بكاميرته وخلفه العصاية بأكملها (منهم
الله) !!! " :

" إيه يا عريس إنت متفضل لازق جنب العروسة "
"استنى يا بني خليه جنبها عايزين نصورهم"
"ميروك يا عروسة خلي بالك منه لحسن ده لسه ..ها ها ها"
طبعاً كنت سأشد شعري ولم ينقذني من تعليقاتهم السمحة
سوى ظهور والدة سارة بالشبكة.

عمر

عمر له أصدقاء كثيرون وهذا يعني فرصة كبيرة لكي أجد أزواجا محتملين لصديقائي . كانوا خفيفي الدم بشكل كبير إلا أنني لاحظت أن تعليقاتهم ستبدأ في إحراج عمر ولكن ربنا ستر وظهert أُمي بالشبكة ، وهنا تذكرت الدبلة التي لم أرها ، لقد جعلها عمر مفاجأة لم يرض حتى بالتحدث عنها. نظرت إليه فوجدته يهز ساقيه بشدة علامة على توتره وقبل أن أطلب منه أن يهدأ لاحظت أنني كذلك أفعل مثله فضحكت ...

عمر: بتضحكي له؟

سارة : فرحانة يا اخي، (وضحكنا سويا)

زغاريد...زغاريد ... زغاريد.... حتى أن طبلية أذني كادت أن تنفجر. وضعت أُمي الشبكة بيننا ، وفي نفس اللحظة قام أخي مصطفى بتشغيل الأغنية التي طلبتها منه ، بينما صوت مصطفى يعلو في الميكروفون " اهداء من سارة لعمر"

ونظر لي عمر بدهشة انتقلت لعيون عندما رأيت الدبلة.

سارة

أحسست أن السعادة كائن حي يتقافز بداخلي بمنون عندما
علت الأغنية التي أحبها " والله لو كان ده كيب كتابنا ماكنش
فيه حاجة منعني من إني آخذ سارة في حضني وماسيهاش تاني
أهدا. " ولكنني سأكتفي اليوم بأن تحتضن دبلتي أصبعها. نظرت
سارة إلى الدبلة بدهشة وفرحة ، لقد عدلت قليلا في التصميم
وجعلتها أعرض قليلا وبالطبع كانت حروف اسمي و اسمها من
الخارج مثلما طلبت ولكنهم أوضح قليلا بسبب حجم الدبلة .
صحيح أنها تكلفت أكثر قليلا ولكن سارة تمنحني أكثر من
ذلك بكثير. ولا داعي لأن أخبركم أن يدي ارتجفت وأنا أضع
الدبلة بأصبعها وكانت هي متوترة أيضا ، فقدمت لي يسدها
اليسرى ثم اليمنى .. إحساس غامر بالدفء غملكني بعد أن لمعت
الدبلة في إصبعها، أما بالنسبة لباقي الشبكة فقد ليستها سارة
بمساعدة بسيطة مني لأننا كنا في قمة الارتباك عندما تلامست
أيدينا .

عمر

ربما كانت هذه أروع لحظة في حياتي إلى الآن ، كانت
الدبلة أجمل من كل تخيلاي وكانت رائعة في إصبعي وكان
وسيطل عمر أجمل رجل في الوجود. بتلقائية مددت له يدي
ليضع بها الدبلة فنظر لي وابتسم ولم يضعها فخفت للحظة ثم
اكتشفت أنني قدمت له يدي اليسرى .. كانت هفوة (ولكن
ربما يكون لفرويد رأى آخر في الموضوع فربما تلك إشارة إلى
أنني "عائزة أجتوز عمر بقي ومش عائزة استنى" .

كانت يدانا ترتجف فقد كنا حريصين على ألا يمسك عمر
بيدي ولذلك فقد ألبسني الدبلة بأطراف أصابعه ولكن لا أخفي
عليكم فقد كان بي شوق كبير لأقبض على يده بيدي فلا
أتركها أبدا ولكني على أي حال قبضت عليها بدبلة فضية
كبيرة الحجم (مقارنة بدبليتي طبعاً) ولم أستطع منع نفسي من
التعليق على حجمها :

سارة: دى دبلة دى ولا غويشة !

عمر (بغلاسة): لأ ده كردان (وضحكنا)

التقط أصدقاء عمر صورا كثيرة لنا ولم يترك مصطفى أخي
كاميرا الفيديو من يده إلا ليقبلني مهنتا .. للحق لقد تلقيت

أكبر عدد قُبل في حياتي في هذا اليوم من الأهل والأصدقاء ..
ولكن قبلة واحدة تمنيتها هذا اليوم ولم أنلها ولكن هذا سر بيني
و بينكم

سارة

الحمد لله

انتهت حفلة الشبكة واختفى جميع المدعوين ما عدا أقارب
سارة الذين سيبتون لديهم وكذلك أبي الذي جلس هو
وعمي في البلكونة كما دأبنا.

كانت نساء عائلة سارة يرتبن المنزل قليلا بينما جلسنا أنا
وسارة في ركن صغير مرقو بجوار الشباك. جلسنا متقابلين
صامتين لمدة ليست بالقصيرة ولكنه كان صمتا أجمل من
الكلام فالكلام لن يعبر عن شيء من السعادة بداخلي ، بل
شعور أكبر من السعادة .. شعور بالإطمئنان .. شعور بأنك
أخيرا وصلت إلى وجهتك.. كنت أردد مع أنفاسي " الحمد لله
الحمد لله " وفجأة وجدت سارة بجواري تنقر على كتفي
لتوقظني وهي تضحك لقد ذهبت في النوم وأنا جالس معها...
تخيّلوا

عمر

السكينة والانتشاء .. كلمتان تلخصان شعوري الآن،
ذهبت جميع مخاوفي . أشعر وكأنني أجلس فوق سحابة ترفعي
عن كل هموم الدنيا . أشعر أن رأسي خفيف ولا أدرى هل
ذلك بسبب الفرح الغامرة في قلبي أم من قلة النوم ! نظرت
لعمر الجالس أمامي في ركني المفضل في بيتنا فوجدته مغمض
العينين .. " عمر .. عمر...عمر " لقد نام حبيبي ، جلست
بجواره لأوقفه ففتح عينيه وابتسم لي فاضطرب قلبي .

طلبت منه أن يعود لمزله لكي يستريح ويأتي في الغد لكي
نجلس ونتحدث كما نشاء ، فلم يجبني وظل ينظر لي بعيونه
المتبسمة الناعسة حتى شعرت بالخجل (مع أني ما باتكسفش
بسهولة!) ثم قام فجأة وأخبرني أنه سيأتي غدا صباحا، وقبل أن
ينادي على والده ليغادروا همست له " شكرا على الدبلة
والبوكيه الأحمر " فابتسم وذهب .

سارة

عندما أيقظتني سارة وفتحت عيوني لأجدها ، شعرت بالآلم
في قلبي لأنني أعرف أنني قد أحرم من رؤية هذا الوجه الحبيب
لفترة كبيرة ولذلك ظللت أنظر إليها وكأنني أعطي لعيني وجبة
سحور كبيرة قبل صيام طويل. سأخبرها غدا ولأتركها اليوم
لسعادتها التي تلمع في عينيها .

عمر

بعد ذهاب عمر ذهبت إلى غرفتي أحمل معي سعادة الدنيا،
استلقيت على السرير و أنا أردد "الحمد لله الحمد لله" مهما
رددتها فلن أحمد الله بما يساوي الهناء الذي في قلبي " الحمد لله
عدد نعمه علي و على المسلمين" .. " حاسة إني عايزه أعمل
حاجلا خير كبيرة قوي أحمد بيها ربنا. نفسى أرفع السماعه
أكلم عمر ، بس ده لسه مروح وكان نغسان كمان ...أنا
بجبك يا عمر ...أنا بجبك يا عمر.....بجبك يا عمر. فجأة
رن جرس الموبايل وكان عمر ففتحت الخط سريعا "

سارة

في طريقى إلى المنزل تحدثت إلى أبي قليلا وأخبرته بالموضوع
الذى يورقني وأخبرني أن القرار عائدي ولسارة وعندما
وصلت للمنزل كان أول شيء فعلته هو أن توضأت و صليت
ركعتين شكر لله أحمدته أن أنعم عليّ بسارة والغريب أنني بكيت
أثناء الصلاة فقد شعرت أنني أقل من أن ينعم عليّ الله بكل هذه
النعم " الحمد لله " بعد الصلاة وجدتي أريد التحدث إلى سارة
بشدة " عايز أقولها أى حاجة وأسمع صوتها " خفت أن تكون
قد نامت فقررت أن أرن مرتين ثم أغلق ولكنها ردت حتى قبل
أن أسمع الرنة الأولى .

عمر

عمر : ايه يا بنتي ده أنا لسه ما سمعتش صوت الرنة

سارة : انت بترن بس ؟!

عمر (ضاحكا): لا بتصل.. بس شكلك مدلوق عليا قوي.. نصيحة مني إتقلي شوية ..استني كام رنة و بعدين ردي!
سارة : أنا مدلوقة ! بقى كده؟ طيب .. أنا هاوريك التقل بعدين

عمر: لا خلاص عشان خاطري . أنا يا ستي اللي مدلوق ومتيم كمان

سارة (بخجل): إنت لسه مانتش ليه ؟ مش كنت نلم على نفسك وأنت قاعد معايا ؟

عمر : الهوا فوقني

سارة (مكرر): الهوى ؟!

عمر (باستهبال): آه..الهوا اللي ضرب في وشي و أنسا معدّي على الكورنيش

سارة (بغلاسة) : طب على الله ما تاخدش برد من الهوا

عمر: هو الهوى عمره يجيب المرض؟

(سارة مش عارفة ترد عليه)

عمر: ساكنه ليه؟ إنتي نعمتي ولا إيه؟

سارة: لأ ما نمتش

عمر : طيب مالك ؟

سارة : عايزة أنام

عمر:طيب تصبحي على خير . لا إله إلا الله

سارة: وانت من أهله . محمد رسول الله.

" كان لازم أهني المكالمة . ما بقتش عارفة أقول إيه ، لو
اتكلم كلمتين كمان كنت هاقول له بحبك يا عمر ! تصدقوا
وشي احمرّ وسخن على ما خلصت المكالمة القصيرة دي. طيب
هاعمل إيه بكرة لما يبجي ونقعد نتكلم على انفراد . ما فيش
داعي للقلق ، على رأي ريهام أنا شخصيه قلوقة فعلا. أحسن
حاجة دلوقتي أكل شيكولاته و أنام وأنا بافكر في عمر.

سارة

قبل الفجر صليت وصليت ركعتين قضاء حاجة ونويت
الصيام وبعد الفجر ظللت أدعو كثيرا حتى غلبني النعاس
ونمت . في الصباح ذهبت إلى مجمع التحرير لاستخراج بعض
الأوراق ، ثم ذهبت لأستلم من الصائغ هدية كنت طلبتها
خصيصا لسارة. وعدت لمترلي وغمرت ملابسي و نزلت.

عمر

الله يا رب

بعد ما صليت الفجر نمت ورأيت حلمًا غريبًا، رأيت الفراشة التي على خائمي تطير، فظللت أبكي بحرقة حتى عادت لي فضحكت، واستيقظت بعدها متأخرة على الرغم أنه كان من المفروض أن أستيقظ مبكرًا لأساعد أمي في ترتيب المنزل.. عاتبته لأنها لم توقظني فقبلتني وأخذتني في حضنها وقالت لي " هو أنا عندي حد أعلى منك أدلعه يا حياتي" وأعبرتني أن أبي قبلني قبل أن يذهب لعمله صباحًا ولكني لم أشعر به. لم أجد شيئًا لأفعله فأُمرت بطلب مني أن أترك لها البيت لتنظيفه مع جارتنا وصديقتها الأتيم "طنط هناء" وأرتاح لأنني سأنزل إلى عملي في الغد. فذهبت إلى غرفتي وطلبت أبي في عمله. طبعًا قعدت أعاكسه وأخبره أن كل صديقاتي طلبن يده وأنني سأزوجه لمن ستدفع لي أعلى مهر. فضحك وقال " يبقى أكيد أمك مش جنبك". ثم تركني أبي للحظات ثم عاد قائلاً " مش هتصدقني مين عندي.. عمر باشا بنفسه تحس تسلم عليه" ثم أعطى عمر التليفون. أنقبض قلبي، فما سبب ذهاب عمر لأبي في عمله. مالذي يريد أن يخبره به بعيدًا عن المنزل. سألت عمر

عما دار في بالي بمجرد أن سمعت صوته ، فأخبرتني بأنه سيقول
لي كل شيء عندما يأتي إلى المنزل ثم أعطى السماعة لأبي سريعاً
وأخفى أبي المكالمة معي. جلست صامتة لفترة طويلة ، حتى
عقلي توقف عن التفكير... هو فيه إيه؟

سارة

قررت أن أخبر عمي عن فرصة السفر الذي قدمتها لي
الشركة التي أعمل بها وذلك قبل أن أخبر سارة. لم أعطِ
للشركة جواب على عرضهم بعد لأنني مرتبط بسارة في مصر
و لا أعرف موقفها وموقف أهلها حيال سفري . أخبرت عمي
عن تفاصيل العرض وأنه يطلبون مني أن أسافر لمدة ستين
ولكنني يمكن أن أسافر لمدة سنة واحدة فقط إن أردت.
" السفر يحل لي مشاكل مادية كثير ويسهل حياتنا أنا
و سارة كثير. " ولكنني أخبرت عمي أن رأيهم هو الرأي
الأول والأخير لأن ارتباطي بسارة هو الأساس و بعده أي شيء
آخر. صمت عمي ثم طلب مني أن أذهب معه إلى كافيه مجاور
لمقر عمله.

جلسنا في صمت حتى طلب عمي قهوة و لم أطلب شيئا
لأنني صائم وأخيرا تحدث :

عمي: السفر ده قراركم مش قرارى ، أنا عارف طبعاً إن
دي فرصة ماتتفوتش وهترجحكم ماديا أنت و سارة ، بس أنا
كمان عارف بنيتي و عارف إن الفلوس مابتهمهاش قوي
وبصراحة يا عمر انا عارف إن بنيتي بتحبك وقلبها هيتقطع لو
انت سافرت . (ثم احمرّت عيناه وتناول كوب ماء ارتشف منه
رشقات قليلة حتى تمالك نفسه) .

شعرت بغصة كبيرة في حلقى وظللت أنظر إلى كوب الماء
بدون أن أستطيع أن أنطق بحرف، وأخيرا تمالكت أعصابي
- : أنا مش عارف أعمل إيه؟

عمي (مبتسما): انت بتكلمني ولا بتكلم الكوباية
ارتبكت و رفعت بصري إليه : أه .. أنا أسف بس
بس...

عمي: روح قولها يا عمر وربنا يسهلكم إثم الإثنين
: ماينفعش تكلمها أنت يا عمي

عمي: لا ماينفعش.. زى ماقلتلك ده موضوعكم ..أنتم
كده ولا كده ما كنتوش هتجوزوا قبل سنتين فالموضوع مش
فارق معايا بس هيفرق مع سارة لأنك مش هتكون في مصر
معاها

: وهيفرق معايا أنا كمان يا عمي

عمي : لو ماكنش هيفرق معاك ماكنتش رضيت أنك
تتجوز بنتي من الأصل ، يللا روح لسارة دلوقتي وقولها وربنا
يصبرها و يصبرك .

على الرغم من أنني كنت أحملهما شديدا خوفا من رد فعل
عمي ولكن ذلك لا يقارن بما أشعر به وأنا ذاهب لأخير سارة.
لو كانت واحدة عادية وكان ما بيننا عادياً كانت من المحتمل
أن تفرح لسفري ، " بس أنا عارف سارة . ربنا يستر "

عمر

أخيرا جاء عمر ولكنه جاء وحده . وما أثار رعي أن أمسي
لم تجلس معنا لفترة قبل أن تتركنا سويا كما هي عادت وألكنها
أحضرت لعمر ما يشربه وتركتنا فورا وكانت تتبادل مع عمر
نظرات غريبة وكأنها تعرف شيئا لا أعرفه. لقد كانت تتحدث
في التليفون منذ قليل ، هل كانت تتحدث مع أبي؟

سألني عمر عن أحوالي وطلب مني أن أشرب العصير بدلا
منه لأنه صائم فأخبرته أنني صائمة أنا الأخرى كنت أشعر
بتوتر شديد وانقباض في قلبي ولكنني أردت تلطيف الجو فسألته
بضحك " إنت جاي تفسخ الخطوبة ولا إيه ياعم ، شكلك
زعلان كده وكنت عند بابا ، هو فيه إيه؟" أخرج عمر علبة
صغيرة من جيبه وأعطاني إياها . كان بالعلبة قرطان جملا
الشكل على شكل قلب منقوش فيه حرف O وأخبرني أنه
يعرف أنني لم أغير قرطاي منذ كان عمري أسبوع فقرر أن
أرتدي قرطا جديدا يحضره هو لي ...

عمر: عشان ماتسينيش

سارة : هانساك إزاي يعني ما أحنا بنرغي مع بعض ليل نهار
وبنشوف بعض كل شويه

عمر : ما هو ده اللي كنت عايز أكلمك فيه ...

" وياريتہ ما أتکلم وياريتہ ما خطبتي و يارتني ما حبيته و لا شوفته .. عمر هيسافر و يسيبي . ما بقتش عارفة أقول إيه ولا أعمل إيه . قعد يقول حاجات كثير مافهمتهاش ... أنا كنت بابكي وكان حد دايس على قلبي بإيد خشب ... حسيت كأن كل جسمي وجعني مرة واحدة وكان قلبي هيطلع من مكانه "

و تركت عمر وذهبت إلى غرفتي وأغلقت على نفسي . طرقت أمي كثيرا على الباب وكذلك عمر ولكني لم أفتح لأحد .

وبعد ساعة طُرق الباب ثانية وكان هذه المرة أبي ففتحت له الباب و ارميت في حضنه وظللت أبكي حتى بكى هو الآخر .

سارة

توقعت أن تندهش و تبكي قليلا أو أن تصيح في وجهي
وترفض فكرة السفر و تطالبني بالبقاء في مصر ، ولكنها
انهارت تماما بمجرد أن أخبرتها، حاولت تهدئتها وإخبارها بأني
لن أسافر ولكنها تركتني و ذهبت إلى غرفتها ولم تستجب
لطرقات أمها ولا لطرقاتي ، اتصلت طنط بعيني وأخبرته عما
حصل فأتي سريعا وأخيرا فتحت سارة الباب ودخل لها والدها
وأغلق الباب خلفه ولكنني كنت أستطيع سماع شهقاتها وهي
تبكي. لم أستطع البقاء فزلت من المنزل على الرغم من أن
طنط حاولت استبقائي ولكنني بمجرد نزولي لم أستطع الذهاب
بعيدا فجلست على مقعد خشبي في حديقة قرية من مزلهم.
سألني فكرة السفر، " ربنا يبسر ويكرمني وأقدر أجهز نفسي ،
صحيح أن المال مهم على الأقل سيكون لدينا مبلغ ما نعلم
عليه بدلا من الاعتماد على مرتب الشهر ولكن المال غير مهم
والرزق موجود في كل مكان ..صحيح لازم نسعى بس...."
ظللت حائرا في أفكاري والصداع يقتلني وقلقي على سارة
يقتلني أكثر .. حتى رن الموبايل ووجدت اسم سارة ففتحت
عليها بلهفة ولكنني وجدت عمي هو المتصل، فسألني عن مكاني
فأخبرته، فطلب مني أن آتي لمزلهم فوراً. شعرت حريفا
بسقوط قلبي في أقدامي .. هل قرروا فسخ الخطوبة ؟ أنا
خلاص مش هاسافر ...مش هاسافر.

عمر

بعد عاصفة البكاء في حضن أبي هدأت قليلا وجلس أبي
بمسح لي دموعي وأنفي كذلك .

ماما: بتمسح لها دموعها ولا كأنها طفلة عندها سنتين
(كانت تحاول أن تجعلني أضحك وتشغلني عن البكاء)

بابا: امسح لها يا ختي يعني ما كنتش باحجتها كمان و هيا
صغيرة وأنيمها على صدري تقوم عملها عليها ، ابتسمت وإن
كانت دموعي لازلت تنزل بغزارة. طلب أبي من أمي أن تحضر
لي شيكولاتة " أنا عارف إن الشيكولاتة بترفع معنوياتك مش
كده " قالها مبتسما ولكن ماما أخبرتني أنني صائمة وقالت أنما
ستذهب لتحضر لي الإفطار لأن المغرب قد اقترب.

بابا: عمر اترعب من نافورة البكاء ، لسه ما تعودش عليك
لما بتزعلي (لم أحب)

: إنني عارفة إنه لسه ما قررش حاجة ، ده جاي ياخد
رأيتك بس في الموضوع و تقررروا إنتو الاتنين (ما زلت لا
أحب)

: خلاص لو إنني رافضة فكرة السفر تماما قولي له وأكد
هيسمع كلامك...

(وأخيرا أستطعت أن أفتح فمي بدون أن أبكى) " يعني هو
ما لقاش غير النهاردة عشان يتول لي "

بابا: ما هو استنى لغاية ما عملنا الشبكة و فرحتي وبعدين
قال

: " وعازي يسافر قد أيه ؟"

بابا :أحسن تتكلموا في التفاصيل دي مع بعض، هو كمان
صلم وخرج وانتي عارفه بيته بعيد ...أحسن أكلمه و أخقه في
السكة وأخليه يجي يفطر معانا.

ذهبت لأغسل وجهي وأضبط حجابي قبل مجيء عمر الذي
توقعت أنه سيأتي بعد ربع ساعة على الأقل ولكن جرس الباب
ضرب بعد دقيقتين فذهبت لأفتمحه لأجد أنه عمر. كان صامتا
على غير عادته وعيونه حزينة (لدرجة إنه صعب عليا) حاولت
أن أبتسم له فوجدت الدموع تحاول الانسكاب من عيني ثانية
فعضضت على شفتي وأشرت له بالتوجه للسفرة لأن المغرب
سيؤذن له بعد لحظات.

سارة

ودة صغراء و شيلولة ساخنة والكثير من الدموع

جمرء الأنف و العينين ودموعها لا تزال بعينها ومع ذلك
تبدو رائعة، فتحت لي سارة الباب ونظرت لي فتمنيت لو
أستطيع محو الساعة الأخيرة من حياتي حتى لا تكون بهذا
الحزن. اقتادتنى إلى غرفة السفرة وتركتني وحيدا وذهبت ، لم
أحاول حتى أن أستقيها ففي الحقيقة أنا خائف من البقاء معها
بمفردي. لقد اكتشفت أني لا أستطيع أن أواسيها أو أخفف
عنها مثل والدها. أعلم أن ظني غير منطقي ،فعلاقتها بالدها
تمتد بطول سنين حياتها ولكني مع ذلك لا أستطيع أن أمنع
شعوري بالغيرة وبالمرارة ، لقد سببت لها كل هذا الحزن ولم
استطع حتى أن أواسيها.

عمر

تركت عمر في غرفة السفرة سريعا لأنني كنت على وشك
البكاء ثانية. الغريب أن هناك شعور ما بالراحة يتأبني، لقد
كانت حكايتي مع عمر كالأسطورة كلها سعادة وأنا لا أعتقد
بوجود السعادة الخالصة في الدنيا. ربما كنت طوال الوقت
أنتظر اللحظة التي ستظهر فيها المشكلة أو ستأتي المصيبة...
الحمد لله أنها ليست ابتلاء لا أستطيع مواجهته.

سارة

(بعد أن أفطرنا وصلينا المغرب جلسنا نتناقش موضوع السفر)

"وأنت عرفت من إمتى بموضوع السفر"

"من حوالى ثلاث اسابيع"

"ثلاث اسابيع؟!"

"أنا مارضيتش أقولك قبل الشبكة عشان ماتشيليش المهم ذى ما كنت أنا شايه"

(لم أرد)

" بصي يا سارة زي ما قلت لعمي ده مش قرار ، ده عرض معروض عليا و احنا الاتنين هنا نقشه ونوصل فيه لقرار واحد بإذن الله"

"وايه رأي باباك ومامتك؟"

"بابا وماما يصعب عليهم إني أسافر بس هما عارفين الخيال فى البلد دلوقتى...بس على أى حال هما سايين لنا القرار"

"ولو سافرت هتسافر قد أيه؟"

"مممكن سنة ولو حبيت أمد العقد معاهم ممكن أكثر"

"لأ هيا سنة واحدة"

"يعنى إنتي موافقة على مبدأ السفر"

"لأ أنا لسه ما وافقتش بس لو وافقت يبقى مش أكثر من سنة ، عشان المفروض خطوطنا سنتين .. سنة تقضيها بـره و سنة هنا"

"ما هو أنا لو سافرت يمكن ما نحتاجش السنة الثانية وأحي و نتجوز على طول"

(شعرت باللحظة .. أسبيه يسافر وبعد سنة نتجوز ولا يقعد ونتجوز بعد سنتين بس هنكون مع بعض طول السنتين ولو رفضت ياترى هيكون موقفه إيه؟....)

"بص يا عمر سيني أفكر وأرد عليكبكره"

"بكره؟"

"أيوه ، أكيد الشركة عايزة ردك بسرعة وأنت بتقول عارف الموضوع من ثلاث أسابيع"

لم أكن في حالة تسمح لي بالحديث بعد هذا الحوار وشعر عمر بذلك ولذا أستاذن وذهب إلى منزله. جلست وحدي

طويلا في غرفتي أفكر في الموضوع. لم يكن لي علاقات أو صداقات أبدا مع أولاد وكنت أدخر كل حسي ومشاعري وأفكاري الجنونية لفارسي الذي سيأتي ليخطبني من أبي وأقع في حبه من أول نظرة . كنت أحلم بالخروج معه في كل مكان.. أحلم به يرن عليّ وأنا في نهاية اليوم بالعمل فأنزل له مسرعة ونسير سويا نتحدث عن يومنا وأعمالنا وأحلامنا... كنت أحلم أن يوصلني إلى حفلات خطوبات و زفاف صديقاتي فأتباهي به بينهن... كنت أحلم به يغار عليّ من زملائي وأقاربي ... كنت أحلم حتى بالمشاجرات اللذيذة بيننا. كل هذا سيتغير الآن بسفره وتصبح علاقتي به عبارة عن ساعة على الماسينجر و حديث قصير على التليفون . هل كل هذه تفاهات ؟ هل يجب ان أفكر بعقلانية وأنظر إلى المصلحة المادية؟ "لكننا مستورين و الحمد لله ...يبقى ليـه يسافر؟" تذكرت الحلم الذي رأيته بعد الفجر وعرفت معنى طيران الفراشة من خاتمي الذي أهدها لي عمر ولكنني تذكرت فرحتي بعودة الفراشة،لعلها بشرى بعودة عمر هو الآخر.

سارة

عدت إلى منزلي و الصداغ يكاد يشق رأسي. صليت العشاء
وارتميت على السرير معتقدا أنني سأذهب في النوم ولكن
الأفكار أذهبت النوم من عيني. لا أريد الابتعاد عن سارة ولكن
السفر مهم ، مرتبي سيكتفينا نحن الاثنين ولكن ماذا عن أطفالنا
حينما نتجيب؟ هل سنعيش إلى الأبد في شقة جدي الصغيرة؟
هل سأظل أستخدم سيارة أبي؟ " اللي يشوف مهندس كمبيوتر
يقول ياما هنا ياما هناك " ، في حين أنني حتى في زواجي أعتمد
على أبي في تكملة النفقات و الجهاز ... وهناك أختي مروة
وهي أولى مني بمساعدة أبي لها.

دعوت الله أن توافق سارة على السفر بسهولة وقمت
وصليت ركعتين قضاء حاجة.

عمر

استيقظت قبل الفجر فصليت ركعتين استخارة وظللت
أدعو الله أن يهديني ويختار لي ويذهب عني الهم ثم صليت
الفجر ونمت ساعة قبل أن أستيقظ و أذهب لعملي. اندهش
العديد لحالي في العمل لأنني لم أرد التحدث وظللت دافئة رأسي
بين أوراق الترجمة حتى قرب نهاية اليوم .. ورن الموبايل وكان
المتصل عمر....

"أزيك يا أميري؟"

"الحمد لله"

"خلصتي شغل ولا لسه؟"

"قدامي خمس دقائق و أنزل"

"طيب أنا مستيكي قدام الباب تحت"

بقدر سعادي أن عمر أتاني لأول مرة عند عملي بقدر حزني
أن هذا قد لا يتكرر. ذهبت ففسلت وجهي وابتسمت أمام
المرأة محاولة إزاحة العبوس الذي يعلو وجهي ونزلت إلى عمر.
وابتسمت بحق عندما رأيته فقد كان يحمل وردة صفراء ، لقد
تذكر أنني قد أخبرته من قبل أنني على عكس الناس أحسب
الورود الصفراء وأنفءل بها.

سارة

ابتسمت عندما رأيت الوردة الصفراء بيدي. عرفت أنها
ستبهجها، فهي تتفاعل بالورود الصفراء. اصطحبتها إلى كافيه
شهير يقدم الشيكولاتة الساخنة التي تحبها وجلسنا حوالى ساعة
ونصف نضحك ونحدث حول حفلة الشبكة وحول كل
شيء إلا السفر وقبل أن نغادر ذهبنا سارة إلى تواليت
السيدات وعادت بعد وقت طويل وعيناها وأنفها محمران.
نظرت إليها ولم أعلق وخرجنا نتمشى قليلا قبل أن أعود بها
إلى منزلها. كانت صامتة طوال الطريق وقبل أن أتركها أسفل
منزلها أخبرتني أنها وافقت على سفري وتركنتي سريعا وارتقت
السلام. بعد أن عدت إلى منزلي حاولت عدة مرات محادثتها
على الموبايل ولكنه كان مقفلا، فاتصلت على المنزل وردت
عليّ والدتها وأخبرتني أنها متعبة قليلة ودخلت لتنام منذ عادت
من الخارج. تملكني الهم فأنا أعرف أنها ترضيني بقرارها هذا
ولكنها غير راضية عن الفكرة ولكن ليس بيدي حيلة.

عمر

قضيت مع عمر ساعتين و نصف - منذ خرجت من العمل حتى أوصلني لمزلي - كنت فيهم في قمة سعادتي ، شعرت أنني مخطوبة حقا ، شعرت بالزهو وأنا جالسة في الكافيه مع خطيبي أخيرا بعدما جلست فيه كثيرا مع صديقتائي نسخر من الأولاد والبنات الجالسين مع بعضهم يؤدون جميعهم نفس المشهد العاطفي من نفس الفيلم العربي القديم. تعمدت الا أتحدث عن السفر وأتأساه مؤقتا لأستمتع بتلك الدقائق الثمينة ولكن قبل أن نخرج من الكافيه فقدت تحكمي في أعصابي وذهبت إلى التواليت وانفجرت بالبكاء. عندما رجعت لاحظت نظرة عمر لي ولكنه لم يعلق وكأنه لا يريد الضغط علي أكثر من ذلك. لم أخبره بقراري إلا عندما وصلت أمام بيتي لأنني كنت أعرف أنني سأهكي ثانية ولذا أخبرتته وتركته وصعدت السلم سريعا. لم أرد أن أتحدث معه ثانية وأنا بتلك الحالة فأغلقت الموبايل وطلبت ماما أن تخبره أنني نائمة إذا اتصل.

سارة

عمر مسافر (وجه حزينه)

أنهت جميع أوراقى بسهولة غريبة حتى أن سارة اغتاضت
وقالت " أصلها تبع النية و انت ملجوف على السفر عشان
كده الموضوع ماشي "

" يا جيلي ده تيسر ربنا وبعدين السفر ده هيكون بإذن الله
سبب فى رزقنا "

" رزقنا مش موجود غير فى الإمارات "

" سارة .. أنا عايزك راضية عني عشان ربنا يسر لي "

" روح يا بني ... قلبى و ربي راضيين عليك "

كان لعودتها للهزار وعودة روحها المرحه تأثير السحر على
نفسيتي ، فقد ذهب عني الهم ولم أعد خائفا من فكرة السفر
والغربة . بل أن حديثها المستمر على جمال الإمارات و خوفها
على من " المزر " هناك جعل أُمي تنسى خوفها وحزنها على
قليلا و تتحدث مثلها . أنهت أوراقى سريعا بفضل الله وتحدد
ميعاد السفر بعد أسبوع وقررت أن أقضي هذا الأسبوع موزعا
بين سارة و أهلي .

عمر

لم أكن أدري أن يمثل هذه القوة وعندى هذه المقدرة العالية على الادعاء والكذب فأمام عمر أصبحت أمزح كثيرا و لا تفارق الضحكة وجهي ولا أترك شيئا إلا وأسخر منه على الرغم من أن فكرة سفر عمر لا تزال تثير رعيي وألمي، وأحيانا يتتابني شعور فظيع بأن عمر (بعد الشر .. بعد الشر) " هيموت في الغربة وأنا هموت هنا من الحزن عليه " . لم أجد أمامي إلا ربهام لتسمع مخاوفي الغريبة كالعادة منتظرة منها الرد المفحم الذي سيرد قلبي، وما توقعته وجدته حيث قالت لي عبر التليفون وصوت قرمشتها للشيبسي (بخروش) في أذني " انتي بتحسبي نفسك ايزيس يا حنيعمر هيموت في دبي وانتي هتسافري هناك تلاقيه ناقص ذراع و لا رجل تقومي تقعدى تلفي في البلاد تدوري عليها وبعدين تلاقيها بس يا عيني تلاقي الدود"

هنا قاطعتها حتى لا تستمر في سرد قصة الرعب التي تحكيها باستمتاع. ولكنني أعترف أن تصويرها الأسطوري الكاريكاتيري لمخاوفي قد جعلني أهدأ قليلا . ولكن حزني لم يهدأ والمشكلة أنني أعرف أن الألم الحقيقي سيظهر بعد غياب عمر .

سارة

أسافر بعد الغد ولذلك قررت أن أفضي معظم يومي مع سارة لأنني في الغد سأكون مشغولاً بتوديع عائلتي. كنت أعلم أنها تنزل لعملها في الساعة فانتظرتها أسفل منزلها وقد فوجأت عندما رأيته ولكنها استفجاً فعلاً حين تعرف جدولي لهذا اليوم معها.

"ايه ده انت بتعمل ايه هنا؟!"

"مستي الأوتوبيس!"

"هتوصلني الشغل؟"

"مافيش شغل النهاردة"

"....."

"انهاردة أجازة عارضة...يوم ليا انا وانتي بس عشان نشحن للفترة الجاية"

" ده انت مقرر ومش مستني رأيي بقي"

"ليه ؟ انتي ليكي رأي تاني؟"

(بعد ادعاء التفكير) " لأ ماليش رأي تاني"

المحطة الأولى (نيل وإفطارنا)

لأنني أحب السير مبكرا على النيل قررت أن تكون أنحر
تمشية لي على النيل مع سارة. اشتريت بعض سندويشات
الفول و الطعمية البطاطس وأخذتها إلى النيل. سرنا وسرنا
وأكلنا وجرت ما لم أجربه من قبل عندما طلبت مني سارة أن
أشتري كوين من الشاي من رجل يجلس في الشارع ويصنع
المشاريب للعمال. ضحكت كما لم أضحك من قبل.

"هتوحشك مصر يا عمر"

"طبعاً هتوحشني"

"بالرغم من كل القرف اللي فيها"

: "بجها برقة وعنف وعلى استحياء

واشتمها وألعن ابوها بعشق زى الداء"

"ايوه ياعم صلاح جاهين يا عبقرى "

"يابنتي مصر دي فيها ابويا الراحل اللي مافيش زيه في الدنيا
وفيهها أمي اللي امومتها لو اتوزعت على كل عيال البلد

تكفيهم ومروة أختي اللي مافيش في طيبتها وجدعتها
وأصحابي اللي ربنا كرمي بيهم وعلاهم يشيلوني في
عنيهم..... وفيها انتي يا سارة"

"أنا إيه؟"

"بساطة..... انتي الزوجة الصالحة... إنتي حظي الحلو
...إنتي سارة"

عمر

"تخيل أقرب حد ليك وقالولك (بعد الشر) إن حصلت
ليه حادثة وبعدين جريت على بيته لقيته كويس وبضحك،
تخيل فرحتك هتبقى قد ايه وهتعرف شعوري لما شفت عمر
امام باب البيت لما نزلت للشغل الصبح بدري. كنت باحسب
ان مافيش احلى من نسمة الصبح الباردة تخفف من شعوري
بالهم ولكن وجه عمر وضحكته احلى من نسمة الصبح.

المشكلة إن كل ما استمتع بلحظة مع عمر أمسك دموعي
بالعافية لأنني عارفة إن اللحظة دي مش هتكرر إلا بعد سنة.
فطرنا على النيل وكمان شربنا شاي من عند راجل قاعد في
الشارع. كان نفسى قوي في مغامرة شرب شاي من عند
الراجل ده من سنين بس أبدا ما حد وافقني ووقف معايا
عشان أشتري منه كوباية بس المرة دي كان معايا عمر وحقق
لي حلمي .

كان منظر عمر يقطع من الضحك وهو يرجع الكوبايات
للراجل ويقول "ميرسي" وكان رد الراجل عليه "هارك أبيض"
ورد عمر مرة أخرى "ميرسي"
"مش تقوله ابيض بإذن الله"

"ايه !! ايض ياذن الله ... إنتي بتعرفي الكلام ده منين؟!"

ظللت أفحم عمر بكل المصطلحات التي سمعتها من صديقاتي وكل ما اختزنته من مرجعي الأول "اللمي"، بل إنني قلدت له مقاطع من أفلام محمد سعد وبالطبع كانت دهشته تثير ضحكي وكانت ضحكاتنا سويا تلفت أنظار الزاهيين إلى أعمالهم في مثل هذا الوقت من الصباح.

سارة

المحطة الثانية (السينما)

على الرغم من ترددي في الذهاب برفقة سارة إلى السينما
وحدنا إلا أنني قررت أن اليوم يوم الاستثناءات وأخبرتها أن
هناك فيلم ستجبه في السينما فصمتت قليلا ثم طلبت رقم ما
على المحمول واستدارت مبتعدة قليلا وتحدثت مع أحد
وعادت لتخبرني أنها موافقة على أن نجلس وبيننا كرسي فارغ.
"انتي كنتي بتكلمى مين"

"كنت باكلم ماما... قتلها أني خرجت معاك وإني عايزة
أروح فيلم معاك"
"و وافقت؟!!"

" ما أنا أتخيلت عليها شويه وقتلتها إنك هتغيب سنة وكده
يعنى.. قوللي بس الفيلم رومانسى ولا أكشن ولا إيه"
"بتسأل لي؟"

"عشان لو رومانسى نشترى شيكولاتة وحاجة ساقعة ولو
أكشن يبقى فشار وحاجة ساقعة "
"و لو خيال علمي؟"

" يبقى شيسى وحاجة ساقعة"

" ده ايه التقسيمة دى ؟!"

"امال يابني...السينما دى مزاج عندي وكل فيلم وله
موود معين وأكل معين!"

اشترت الشيكولاتة و الحاجة الساقعة من خارج السينما
وفقا لرغبة سارة لأنها لا تحب استغلال الكافيتريا داخل السينما
و الأسعار السياحية بها وبالطبع وضعت كل ما اشتريناه في
حقيبتها الكبيرة.

"لو فتشونا و التمسكتى هاقول ماعرفكيش"

" شوف الولاء والانتماء هو ده أمير أحلامي !!!"

دخلنا فيلم the Holiday واستمتعت سارة به كثيرا
ولكن ما لم أحسب حسابه أنها تبكي كثيرا مع المواقف
العاطفية وتتبع موجة البكاء بقطعة شيكولاتة وجرعة مياه
غازية. على الرغم من أني طوال عمري كنت أعتقد أني لا
أحب الفتيات العاطفيات اللاتي تبكين لأقل سبب إلا أني
أحببت سارة أكثر وأكثر وهى تبكي على أقل شيء في الفيلم.
أعتقد أنك عندما تحب شخصا ما فإنك تتعلم أن تحب كل
طباعه حتى ولو كانت غريبة عليك.

عمر

"حسى الله ونعم الوكيل!!!" لقد بكيت منذ بداية الفيلم وحتى نهايته، فى المواقف الحزينة و السعيدة على السواء. لا أدرى إن كان ذلك بسبب روعة الفيلم أم أنى كنت أتخذ لنفسى فرصة للبكاء وأنا أجلس بجانب عمر فى يومه قبل الأخير فى مصر. بالطبع أكلت كما هائلا من الشيكولاتة أثناء عرض الفيلم وعرفت أن وزى سيزيد فى هذا اليوم وأن على أن أبداً ريجيم قاسيا بمجرد سفر عمر.

وبالمناسبة أنا سعيدة لأنى اكتشفت أن عمر أكثر وسامة من (جوود لو) بطل الفيلم!

سارة

المحطة الثالثة (البرج و الصواريخ)

كان لسارة حلم غريب حيث كانت تريد أنت تعرف
كيف سيكون الحال لو ألقت بالصواريخ من أعلى برج
القاهرة. ولا أقصد تلك الصواريخ التي تكون نجوما في السماء
ولكن تلك الصواريخ الصفراء التي يلعب بها الأطفال في العيد
ورمضان بدلا من البمب. وكنت قد طلبت من تامر صاحبي
أن يحضر لي بعضا منها لأنه معتاد على عمل مقالب. يمثل هذه
الأشياء. واصطحبت سارة إلى البرج .

"تعالى عشان اوريكي بيتكم من فوق البرج"

"ما ينفعش أشوف دبي من فوق البرج" (قالتها وهي تبسم
وإن كنت شعرت بأنها تخفي حزنها)

حاولت أن أضحكها "دبي إيه اللي تشوفها وإنني نظرك
ضعيف أصلا"

"أنا نظري ضعيف"

"انتي بتحسسي إني مش عارف إنك لابسة عدسات"

"أنا نظري ضعيف حاجة بسيطة أقل من - ٢"

"بردوه نظرك ضعيف!!"

صعدنا البرج وكان به القليل من السياح وذهبنا بجانب
شبه فارغ وأخرجت لها الصواريخ

"اذي الصواريخ يا سي اتفضلى اعملني تجربتك"

عمر

لم أصدق أنه يتذكر كل التفاهات التي أحكيها له حتى أنه
تذكر موضوع إلقاء الصواريخ من الـرج الذي أحلم به. لولا
حجلي لكنت صرخت وأنا أعلى الـرج بأني أحبه. ولكنني
نظرت إلى السماء التي بدت قريبة ودعوت الله في سري أن
يحفظه ويجمعنا سويا في الدنيا والآخرة. وشعرت بالخلج لأنه
حضر كل هذه المفاجآت وأنا لم أحضر له شيئا سوى هديه
يأخذها معه في سفره. بعد أن قمت بإلقاء الصواريخ وبعد أن
ضحكنا حتى شعرت أن جانبي يؤلمني وقفنا طويلا صامتين ننظر
من أعلى الـرج. وتذكرت تلك الأغنية التي سمعتها في فيلم
.. Nottin Hill

(It's amazing how you can speak
right to my heart, without saying a word
you can light up the
.....you say the 'dark
(best when you say nothing at all)

سارة

(١) • من المدهش أنك تتحدث مباشرة إلى قلبي ، بدون أن تنطق بكلمة تضيء الظلام
إن أفضل ما أقول تقوله في صمتك

المحطة الرابعة (الغذاء)

كانت تلك المحطة الأخيرة وعلى الرغم من أنني قضيت يوما من أسعد أيام حياتي مع سارة إلا أنني شعرت أن المهم عاد ليذحف إلى قلبي مرة أخرى ولكن سارة كانت كالعادة منقذتي من المهم. فبعد أن أكلنا وطلبنا شيئا لنشربه نظرت لي سارة وقالت "أنا عارفة إن موضوع السفر ده صعب عليك زي ما هو صعب عليا ويمكن أصعب كمان لأنني مهما زعلت هاكون وسط أهلي وأنت لوحدة هناك وده سبب يخليني أزعل أكثر كمان وبكده نبقى متعادلين في الزعل.... لكن ممكن يخفف عنك إنك يكون عندك نوايا كويسة ورا السفر ده... قصدى نوايا لوجه الله... أنت هتسافر عشان تفتح بيت نربي فيه أولاد صالحين بإذن الله و الفلوس اللي هتكسيها من سفرك هتخرج جزء منها للمحتاجين وانت عرف كمان إن العمل عبادة وإنك هتكون إن شاء الله صورة مشرفة لبلدك ولدينك بره".

كان لكلامها بتلك اللهجة الجادة وقعا غريبا عليّ، فقد شعرت أنه يدخل عقلي وقلبي ليرسخ هناك وودت لو أمسك يدها وأقبلها ثم أحضنها و لا أتركها أبدا. ولكني بدلا من ذلك قلت لها بهدوء

"بحبك"

عمر

والأخيراً قالها "بحبك" قالها بهدوء وتمهل كما
حلمت تماماً به وهو يقولها. كنت بالطبع أعلم أنه يحبني ولكنه
لم ينطقها أبدا مباشرة وصريحة من قبل. وبالطبع انتابني تلك
الرغبة المجنونة باحتضانه وتقبيله ولكن لن يكون ذلك قبل سنة
من الآن.

كنت قد حضرت خطبتي العصماء لكي أقولها له قبل سفره
وجاء وقتها الآن حينما رأيت الحزن يملأ عينيه وسمعته تنهيدته
وهو يسر ورائي ونحن ندخل المطعم. كانت هذه الأفكار هي
التي أصبر نفسي بها ولذلك أخبرتة بها لعلها تلهمه الصبر هو
الآخر وكنت أتمنى أننا إذا أخلصنا النية في هذه السفيرة الصعبة
علينا فإن الله سوف يجزيينا خيرا.

سارة

بلاد جديدة بلاد بعيدة

ليست أول مرة أركب طائرة ولكنها أول مرة أخرج من مصر. بدأ شعوري بالقلق يتزايد منذ اقترينا من المطار. كنت منشغلا قبلها بتوديع الجميع وأصدقائي يحيطونني بمزاحهم وضجيجهم وأمي تبكي وأبي يخفي دموعه.

أما سارة فكانت صامتة على غير عادتها. كان حزنها عادة مصحوبا بالضجيج والبكاء ولكن الغريب أن صمتها كان مؤلما أكثر. كنا بلا حول ولا قوة نساق بعيدا عن بعضنا. قبل أن أتركهم و أذهب للطائرة نظرت إلى سارة المتروية على نفسها وكانت تتمتم بما يبدو أنه دعاء ما. أشرت لها مودعا واختفيت عن أنظارهم قابضا على هدية سارة في يدي بشدة.

عمر

استيقظت في ذلك اليوم لأرن على عمر مثلما أفعل كل يوم
لاكتشف أنه رحل، لحظتها فقط عادت لي دموعي حتى
شعرت أن قلبي سيتوقف من البكاء وقد رغبت في توقفه بشده
فكلما فكرت في أن عمر سيختفي لعام كامل شعرت أنني لن
أستطيع أن أعيش هذا العام. في يوم رحيله كنت و كأني
أشاهد مشهدا لا أنتمي إليه ، و بعد انتهاء المشهد المحزن
سيخرج عمر من وراء الكواليس و يرجع لي. ولكن اللحظة
التي سبقت اختفائه كانت أصعب لحظة في حياتي غير أنني
تذكرت أن أقول " لا إله إلا أنت سبحانه إني كنت من
الظالمين" فلا أعتقد أن هناك لحظة همّ أشد من هذه مرت عليّ
في حياتي.

سارة

اتصلت بأهلى بمجرد وصولي للمطار كما أمرني أبي ،
واتصلت بسارة كما أمرتني هي. كان كل شيء جميلا منذ
لحظة وصولي. النظام و الرقي في التعامل و جمال ونظافة ؛ كل
شيء. شعرت بالاطمئنان منذ لحظة وصولي وزاد اطمئنان
عندما وجدت أحدهم يتوجه إلي مخاطبني باسمي ليخبرني أن
الشركة أرسلته لاستقبالي مع ثلاثة مهندسين آخرين يصلون
على نفس الطائرة. كان شابا ذكيا يدعى عصام و هو مصري
مثلنا وبالطبع تعرف علينا جميعا عن طريق صورنا في سيرنا
الذاتية. وفي طريقنا إلى مقر الشركة استمتعت عيناى بكل ما
شاهدته. لا أطيق الانتظار لأخبر سارة بكل ما رأيته.

عمر

تماسكت جيدا أثناء اتصال عمر بي ، فقد كان يبدو
متحمسا ومبهورا بالمكان و هو لا يزال في المطار. ولكنني
عدت للبكاء بمجرد انتهاء المكالمة. لم أصدق أن لدي كل هذه
المقدرة على الاكتئاب ، فأنا في العادة لا أسمع لنفسى بالتماذي
في الحزن على أي شيء ولكن هذه المرة خرجت الأمور عن
سيطرتي. وعندما تخرج الأمور عن السيطرة فإن الحل هو لقاء
العصابة بأسرها لبدء العلاج.

سارة

"كان نفسي بابا يشوف الشركة اللي هشتغل فيها إيه
الشياكة والرقى ده! سلموا كلاً منا lap top وكل اثنين
يتشاركان في شقة محنقة و أنيقة. كنت متحمسا وسعيدا
ومعتقدا أن العام سيمر وكأنه أسبوع..
ولكن كان ذلك في البداية فقط.

عمر

في يوم السبت جئن جميعا يحملن كل المعدات اللازمة وعلى استعداد كامل لبدء الحملة لطرد اكتاي. وهي حملة تكررت عدة مرات عندما فسخت إحدانا خطوبتها وعندما لم تستطع إحدانا الخروج من حالة إكتئاب مزمنة رافقتها بعد مشكلة كبيرة في العمل أو في حفلة توديع مثل ما ودعنا ميريهم قبل سفرها لفرنسا مع محمد زوجها وفي حالات أخرى مماثلة. كان المنزل فارغا علينا لأن أبي و أمي سافرا البلد لزيارة عمي بينما سيمضي مصطفى اليوم عند صديقه عبدالعاطي الذي يسكن في الدور السادس وذلك ليتمكنني طلبه في أى وقت. حضرت مروة على الرغم من شكى في حضورها لأن ذلك يوم إجازة زوجها ولكنها أخبرته أنها تريد إجازة منه هي الأخرى وأنت! وظهرت فاطمة متأخرة بعض الشيء لأنها منشغلة بالتحضيرات الأخيرة قبل زفافها الموشك. أما ريهام فجاءت من الصباح الباكر لكي لا يفوتها مشاهدة ماتش المصارعة عندي قبل حضور باقي الفتيات. أما جميلة وهاجر فجئن في الميعاد كما هي عادتهن واعتذرت هايدي عن الحضور لأنها مسافرة مع زوجها و ابنتها. أما مي فلم نسمع عنها شيء يبدو أنها راحت عليها نومة مع زوجها كالعادة.

كان لدينا كل شيء : شيكولاتة من جميع الأنواع
والأحجام ، مياه غازية، فطير، عدة أنواع من الجبن، نسكافيه،
عصائر ، شيسى، صينية دجاج وصينية مكرونة بالفرن، فيلم
أجنى جديد على سى دي ، ودواء حموضة بالطبع!

سارة

كانت الأمور غامضة في البداية ، و لكنني فهمت بعض
الأمور مع نهاية اليوم الأول؛ و أولها أن أصدقائي المصريين هنا
ليسوا أصدقائي حقا ! ولكن بعيدا عن العمل افتقدت أبي
وأمي وأختي وافتقدت وطني سارة. واتصلت بها لتحديد موعد
أول لقاء يجمعنا على الإنترنت. واتصلت بعائلتي بالطبع كما
اتصلت بأحمد صديقي الأتيتم لأخبره أنني أفتقده فرد عليّ
" ماقلتلك يابني نتجوز قبل ما تسافر .. إنت اللي رحيت
وخطبت سارة! "

"معلش أديني باعترف بغلطتي!"

وحددت معه موعد لأخبره بما حدث معي من زملاء العمل
الجدد.

عمر

تناولنا جميعا حبتين لإنقاص الوزن قبل بدء الحفلة وهي عادة لا أعرف إن كانت صحية أم لا و لكن مروة صيدلانية و لم تعترض، وإن كانت لم تتناولها معنا لأنها حامل. وبدأت الحفلة أو الحملة، تبادل الجميع أخبارهن حيث أنهن لا يَكُن على اتصال دائم وبدأن في تناول الفطير و الجبن والشيسى والمياه الغازية وهذه وجبة إفطار غربية اخترعتها ربهام و أصبحت الإفطار الرسمي للمجموعة. وبعد ذلك جلسنا على أرض غرفتي جميعا نحاول أن نحث مروة أن تحدثنا عن الزواج وخاصة أن فاطمة قد قاربت على الوصول لليلة الزفاف ، ولكنها رفضت أن نخبرنا بشيء وظللنا نحن نحكي عن أفكارنا الرومانسية الخاصة بالدخلة وليلة الزفاف وكانت مروة تتدخل لتفسد أحلامنا بكلام واقعي محبط فأخبرناها إنها إن لم تصمت سنضربها حتى مع وجود حملها. وبعد ذلك أصبحت أنا محور اهتمامهن عندما اتصل عمر ليحدد ميعاد للحديث معي على الإنترنت وبالطبع بمجرد إنهاء حديثي معه ذهبت للحمام لأبكي بعيدا عن تعليقاتهن الساخرة ولكنهن كُنَّ وقحات بشكل كافٍ ليقنطن الحمام ويسحبني للخارج (ذكروني أن أوصد الباب بعد ذلك)

"العياط مش حلو في الحمام"
"انتي عيلة صغيرة عشان تعيطي كده"
"رشوا وشها بشوية ميه يا بنات"
"لأ رشوها بحاجة ساقعة"

"لأ إلحقوها بالشيكولاتة " وبدأن في حشوفمي
بالشيكولاتة حتى اختنقت من الضحك و الشيكولاتة.

جميلة : " طيب ما خالده مسافر بقاله سنتين ونص ولسمه
قدامنا ٦ شهور كمان عقبال ما يرجع مع أنه كان المفروض
مسافر سنتين بس وأديني زي الفل أهوه ، يابتي ده همسا دول
أحلى أيامك ، أديكي اطميني إن فيه حد رضي بيكي! وفي
نفس الوقت هتقدري تعيشيليك يومين على راحتك...تخرجي
براحتك و تتفسيحي معانا براحتك وكمان نفسيتك تكون
مرتاحة لأنك بتحيي كمان"

هاجر: " ما هو عشان بتحب عامله في نفسها كده ، لكن
إنني باين عليك فرحانة إن الواد سافر!"

مروة: " يا حبيبي دي كلها سنة وبعد كده هتقعدوا مع
بعض لغاية ما تزهقوا"

فاطمة: " على الأقل هو هيرجعلك وتتحوزوا وتعيشوا في مصر، الدور والباقي عليا أنا، هتتحوز و نساقر بعد الدخلة نرجع لشغل إيهاب في السعدية"

ريهام: " ايه اللي دخل موضوع سفرك في كلامنا دلوقتي؟"

مروة: " خلاص بقي بطلوا غلاسة على بعض بصي يا سارة إنني هتزعليلك يومين بس بعد كده لازم ترجعي لحياتك عادىي ..دي سنة كاملة ماينفعش تركني حياتك فيها على الرف لغاية ما عمر يجي..عندك شغلك و عندك هواياتك و عندك حاجات ياما عايزة تشتريها عشان بيتك"

سارة: " ما أنا مش عارفة هنسكن فين ..عمر ناوى ما يخذش شقة جده لو ربنا فتح عليه ويحب شقة جديدة"

مروة: " سواء خدتي شقة جديدة أو لأ فيه حاجات مالهش دعوة بكده والسنة دى هتعدى بسرعة لو شغلتي نفسك"

جميلة: " وإن كان يا ستي على عمر ما اتوا كنتوا بتكلموا كثير على التليفون ، وأديكوا هتكلموا على الشات وتشتوفوا بعض كمان لو حبيتهم"

هاجر " هو أكيد طبعا ده مش هيعوض أنه يكون موجود
جنبك في مصر بس أهي تصيرة عقبال ما تتجوزوا وبعدين يا
سني هتزهقوا من بعض"

" أنا مش هزهق من عمر أبدا"

ريهام: " هو يا سني اللي هيزهق منك " وبالطبع قمت
وجلست فوقها فور أن قالت ذلك.

سارة

العمل به فتيات كثيرات ، " مُرز" على رأي سارة. الحمد لله أنما لن تراهن وإلا كانت أجبرتي على العودة غدا.تقابلت على الغذاء مع شاب أمريكي يعمل في قسم التسويق ووجدته مرحا وكثير المزار مما ذكرني بأصدقائي في مصر و كذلك قابلت عصام المصري الذى يعمل بالعلاقات العامة و الذى قابلنا في المطار وأخذني بعد العمل في جولة سريعة حول الشركة وحول منزلي وأراني المسجد الذى صلينا فيه سويا وكان تحفة معمارية حقا مما ذكرني بتوقي للعمرة. أخبرني إيهاب أنه يعمل في دبي منذ خمس سنوات وأن له خطيبة في مصر ستلحق به بعد العيد الصغير. " وإمتى هترجع مصر"

" مش هرجع مصر ...ماليش مستقبل هناك"

"ليه واضح إنك ناجح جدا في شغلك هنا ...ليه مش هتنجح في مصر؟"

" مافيش فرص في مصر يا عمي . أنا هناك واحد من آلاف خريجين تجارة ..أنت مهندس ويمكن عندك شغلانة كويسة هناك .. بس بصراحة هتجيلك قد اللي هاتجيبهولك الشغل هنا؟"

"؟"

ربما إجابتي تلك على عصام هي التي أعطتني الصبر لأجناز
ذلك العام بكل ما قابلت فيه من صعاب في العمل ومواقف
سيئة من زملاء في العمل . أنا هنا من أجل المال لأجمع أقصى
ما أستطيعه وأعود لأهلي.

عمر

قمت بتشغيل الفيلم وكان " عن العشق و الهوى " و بمجرد أن بدأ أوقفته ريهام و قالت " مين اللي جايب فيلم زي ده إنهارده " حاولت أن أجعلها تصمت حتى لا تخرج جميلة التي أحضرت الفيلم ولكن ريهام كعادتها لا تصمت " يعني البست مكتتبه و مش مبطله عياط و انتي جاييا لها فيلم النكد ده " فأخبرتها جميلة أنها لا تعرف الفيلم و هنا قامت هاجر بتشغيل فيلم آخر وافقنا كلنا عليه فورا ، كان فيلم كارتون طبعاً ؛ فيلم ٢ Shrek ، استمتعنا كثيرا بالفيلم وضحكنا كثيرا وخاصة عندما ألحت ريهام أن فرح جميلة سيكون مثل فرح الأميرة فيونا وشريك وذلك لأن جميلة رشيقة القوام وقصيرة بينما جمال طويل وممتلئ و عندما وجدت هاجر أن وجه جميلة تغير قالت " بس على الأقل راجل طيب ومحترم ، مش زي المصارعين اللي داوشة دماغنا بيهم " فضحكت لأن جميلة كان أملها طوال عمرها في شريك الأحلام أن يكون رجلاً طيباً و كان هذا يجعلنا نسخر منها كثيرا فكلنا كنا نخلم بفتى الأحلام الوسيم كأمرء الأساطير. ولكني الآن أفهم وجهة نظرها فأجمل ما في عمر هي طبيته الشديدة والتي أخاف منها الآن لأن أعرف أن الغربة بها أشرار و أولاد حرام كثيرون.

سارة

وصلة النت والهاسينجر وأشياء أخرى

لم تكن وصلة النت التي ركبها مصطفى مع باقي سكان العمارة تعني لي الكثير ، فأنا لست من هواة الإنترنت ولكنها أصبحت الآن من أساسيات الحياة، فهو نافذتي الوحيدة لأطل على عمر براحتي لأن المكالمات التلفونية غالية جدا غير أن الشبكة زبالة! كان لقائي الأول مع عمر بعد وصوله بيومين في الحادية عشر مساء ، بعد أن اتصل بأسرته و أصدقائه وذلك لكي لا نضطر لإنهاء حديثنا بسرعة.

"عمر سامعني... " (لا شيء)

"سارة ..سارة سمعاني"

"آه سمعك "

"سارة...سارة"

"مصطفى..... عمر مش سامعني تعالى شوف فيه ايه...

يلا بسرعة الواد أون لاين"

"سارة انتي سمعاني ..انتي فين"

"المالك ما كانش راكب يا ستي و اديني ركبته"

"طب يلا أخرج"

"ايوه يا عمر سامعني"

"ايوه يا حبيبي سامعك"

سارة

كان اللقاء الأول بدون كاميرا للأسف لأن سارة ليس لديها كاميرا. ظللت لفترة أراها اون لاين و لكني لا أسمعها وأخيرا سمعت خروشة ثم صوتها. تحدث أخيها وأخيرا تحدثنا. الحمد لله أنها عرفت تكلمني على النت لأنها بالرغم من ذكائها إلا أنها تصيبي بالشلل حينما تتعامل مع أى تكنولوجيا حتى ولو كانت mp3 أو ريموت كترول به أكثر من ثلاث زراير. حينما تحدثت مع أهلي ارتحت كثيرا وإن كان شعوري ببعدي عنهم جعلني أفقدتهم حتى وأنا أحدثهم أمسا حينما تحدثت مع سارة فقد شعرت أن بلدي كلها أتت مع صوتها. وكأن شعوري بالغربة زال وأنا أسمع صوتها بنبرته المألوفة وهى تشخط في أخيها وتحدثني بحماس ضاحك بأسلوبها السريع وكأن هناك من يجري ورائها .

حتى أنني استمتعت بكلمتها اللتين طالما أثارنا ضيقي وهى تخاطبني " يابني " و " يا واد ". كانت بخير وهذا هو كل ما يهم.

عمر

الحمد لله ..عمر بخير...كنت خائفة بشدة أن أسمع في نبرة
صوته حزنا...كنت خائفة أن أبكي بمجرد سماع صوته ولكني
شعرت وكأنني التقطت أول نفس لي منذ سفره. سألته عمن
قابلهم فأخبرني عن المهندسين المصريين الذين وجد أنهم معه في
نفس الشركة ..وليسأخني الله لأني نقلت له ما أستمعه دائما من
أعمامي (لأنهم يعملون في الخارج) وهو أن لا يعتمد على فكرة
أهم أهلي و من بلدي لأننا أجدع ناس نعمل مقالب في بعض
خارج مصر! لم يعارضني كما هي عادته عند سماعه مثل هذه
الأقاويل مما أعطاني أنطباعا أن هناك شيء ما حدث لا يريد
إخباري عنه ولكني لم أحاول أن أضغط عليه ليحكسي لأني
أعرف عادته الهباب بأن لا يحكي و هو يشعر بالضيق. ولكنّه
أخبرني أنه تعرف على شابين وهو سعيد بمعرفتهم وبخاصة
بالمصري الذي يسمى عصام.وسألته عما ارتداه في أول يوم في
العمل وعما أكله وعن أشياء كثيرة ولكن نسيت أن أسأله عن
أهم شيء ، هل هناك فتيات وخاصة أجنبيات في العمل؟!

سارة

للأسف نصيحة سارة بالابتعاد عن المصريين كانت صحيحة
إلى حد ما، على الرغم من أني وثقت علاقتي بعصام ولكن
باقي المهندسين المصريين كانت لهم حركات غريبة، ولكني
كنت في حالي أحاول أن أتجنبهم قدر الإمكان وليساعدي الله
ولا أضطر لمواجهة أحدهم فأنا لا أحب العمل في بيئة متوترة.
رئيسي رجل سويدي أعجبت به منذ أول لقاء لنا يبدو من
الناس الذين لا ينخدعون بالمظاهر وقد اطلع على سيرتي الذاتية
وخبراتي و تعامل معي بطريقة ودية جدا. يارب أعرف أثبت
نفسي كويس قوى في الشركة.

عمر

اشتريت كاميرا لزوم الاتصال بعمر و لكني وجدتها تبطئ الحديث ولذلك لا نستعملها كثيرا، وخاصة أني أحب أن أحدثه وأنا على راحتي بدون ارتداء الحجاب والجلوس بطريقي معتدلي. نتحدث شبه يوميا سواء على النت أو دقيقة على الموبايل على الرغم من إن شركة المحمول الحرامية سرقوا من رصيدي أكثر من أربعين جنيه ؛ اكتشفت أنهم راحوا من الرصيد قبل ما اتكلم واكتشفت أنهم حسبوا عليّ كل رنة على عمر بثمان دقيقة وطبعاً ماعرفتش آخذ لا حق ولا باطل من خدمة العملاء ..حسبي الله ونعم الوكيل.

أكثر ما يؤلمني أن عمر لن يعود قبل رمضان. أول رمضان لي وأنا مخطوبة سيكون بدون خطيبي وهذا يضايقني كثيرا لأنني دائما ما كنت أحلم بأن أخطب ويأتني لي خطيبي بفانوس في رمضان و نصلي التراويح سويا في عمرو بن العاص أو الحسين في ليلة القدر. أشعر أحيانا أنني تافهة لأنني أفكر بهذه الطريقة ولكن كما أخبرتني أمي أن هذه التفاصيل الصغيرة والأحلام البسيطة هي التي تجعل لحياتنا طعما. بس أنا للأسف حاسة أن كل حاجة مالهش طعم من غير عمر.

سارة

شغل وشغل ومشاكل وحديث قصير مع أهلي ومع سارة كل فترة. بعد ثلاثة أشهر أشعر أنني لن أستطيع أن أكمل العام. أخبرت عصام و جون (الشباب الأمريكي الذي يعمل بالتسويق) بأنني أشعر أنني لن أحتمل الغربة أكثر من ذلك. أخبرني عصام أنه عانى من مثل ما أعاني في البداية ولكن خيار العودة كان مستحيلاً ، تأقلم بعد فترة وأصبحت مصر بمجرد زيارة قصيرة أما الحياة كلها فهي هنا. أما جون فأخبرني أنه أحب الحياة هنا و لم يفتقد سوى والدته ولذلك طلب منها أن تأتي لتعيش في دبي هي الأخرى ولأنها ليس لها أقارب سواء فقد وافقت وتعيش معه الآن. استغربت حديث جون وخاصة لأنه أجنبي وقد كنت أظن أن الأجانب لا يقدرّون الحياة الأسرية مثلنا ولكنني كنت مخطئاً. ولكن حديثه جعلني أفكر أن سفري ينفعني فعلاً كإنسان، صحيح أنني سافرت لجمع المال ولكنني تعلمت الكثير في هذه الأشهر القليلة، منها الاعتماد على نفسي في كل شيء ،فقد أصبحت أحضر طعامي وأغسل وأكوي ملابس (ده غير أيام الدلع في مصر لما كان الغسيل يعنى أن ألقى ملابس المتسخة خلف الباب لأجدها بعد ذلك نظيفة ومكوية في الدولاب) وكذلك تعرفت على حقيقة الناس

بشكل أفضل. فليس الجميع طيبين كما يبدو عليهم وكذلك
ليسوا جميعا أشرارا. ربما أنا أحاول أن أفلسف الأمور لنفسى
لأجد الدافع الذى ييقيني، بس بصراحة دافعى الأول أن أدخر
الكثير من المال لكى أتزوج سارة و أقوم بمشروع خاص بي فى
مصر. أشتاق للجميع.....

عمر

ويمر الوقت

أخذت بنصيحة مروة وبدأت في شراء (الرفايح) كما تسميها والدتي، وهي بالمناسبة ليست رفايح على الإطلاق لا من ناحية الحجم ولا الثمن. ولكنني بصراحة استفدت من الأموال التي كان أهلي يجيرونني على ادخارها لأنني باستطاعتي شراء ما يروق لي. صحيح أن بابا (ربنا يخليه) يدينني الفلوس اللي أنا عايزاها وكمان ماما بس مش هقولوهم هاتوا فلوس عشان أشتري سجادة لا تتعدى المتر في مترين ويفوق ثمنها ثمن السجادة الكبيرة في الريسبشن لأنها صناعة يدوية. وكذلك ثمن الماكياج والبارفانات وهي أشياء لا أشتريها عادة ولكن شروق صديقتي أقنعتني أني سأحتاجها وأنني لن أستطيع شراءها دفعة واحدة على الرغم من أني لا أدري ما سأفعله بياليتة الألوان التي اشتريتها هذه ولا هذا الكم من البارفانات الذي سيصيب عمر بحساسية الصدر !!! . كانت مشاويري تكون عادة مع جميلة لأن موعد رجوع جمال قد اقترب وإن كانت ريمونده صديقتي وزميلتي في العمل تصطحبنا أحيانا في سيارتها إن كان المشوار قريب من منزلها أو من عملنا، وطبعاً كانت سيارتها تحمل أشياء

عجبة تشتريها جميلة من أجل ديكور منزلها وكننا بالطبع
نفترض منها المال لأننا عادة ما نأتي على كل مالدينا في مثل
هذه المشاوير؛ و لولا أننا نعود في سيارتها لمسا وجسدنا ثمسن
المواصلات! ويمكنني الآن أن أعمل مرشدة سياحية لمن يريد
الذهاب للأزهر و سوق التلات. وقد حمدت الله على وجود
المترو وسيلة المواصلات الأفضل للوصول للعتبة!

سارة

تأقلمت وتعودت على المعيشة هنا بشكل ما. لم تعد الحياة تقتصر على العمل، فقد أصبحت أخرج مع زملاء العمل كثيرا. وتوطدت علاقتي بعصام وجون اللذان يسّرا لي مخارج وفصح كثيرة بدون أن نتكلف كثيرا لأنهم يعلمون أنني أؤخر من أجل العودة لمصر بعد شهور قليلة. قاعات السينما هنا رائعة.. أخبرت سارة عنها وبالطبع جئت عندما نزل فيلم هاري بوتر هنا قبل أن يسّزل في مصر وشاهدته قبلها. أؤخرت مبلغا جيدا حتى الآن ولكن أحلامي الآن تحتاج أضعاف هذا المبلغ. أفكر أحيانا في أن أمد العام وأبقى لعامين ولكن أخاف من رد فعل سارة. ستحزن و تشيط غضبا وتتشاجر معي ولكن ما أخافه فعلا أن تفكر في فسخ الخطوبة. على العموم لم أقرر مد العقد بعد.

عمر

ها قد أتى رمضان وشوقي لعمر لم يفتر. أستيقظ صباحا
أحيانا وأنا أشعر بالغضب الشديد منه لأنه سافر ولازلت أبكي
أحيانا بعد أن نتحدث على الإنترنت . بكيت كثيرا عندما
أخبرني أنه شاهد هاري بوتر في السينما لأني تذكرت يوم
أحضر لي رواية هاري بوتر والشيكلولاي في إحدى زيارته بعد
قراءة الفاتحة. كنت كل عام أدعو في رمضان بأن يرزقني
بالزوج الصالح وهذا العام أدعو الله بأن يحفظ عمر وأن نكون
في رمضان القادم سويا. أذهب لصلاة التراويح في المسجد مع
أمي وجارتي نسرين ووالدتها، وأستمع كثيرا بحديثي مع ولاء
ونحن عائدتين من المسجد لأن لديها مقترحات عديدة لفعل
الخير في رمضان مما يعطيني فرصة للانشغال عن التفكير بعمر
وحزني الشديد أننا لسنا سويا في رمضان. قمنا بدعوة عمي
وطنط ومروة على الإفطار ودعونا هم كذلك وفي المرتين كنا
نلتقي جميعا مع عمر على الإنترنت مما زاد من ألمي لأني أفقد
نظراته الخاطفة نحوي عندما نكون سويا في مثل هذا الجمع
وأفقد رائحة عطره وأفقد مشهد أصابع يده وهو يطرق على
ذراع الكرسي وأفقدته كثيرا عندما أحضر لي عمي فانوسا
كبيرا عند زيارته لنا وأخبرني أن عمر قد وصّاه بشرائه لي.
أفقد عمر بشدة وأبكي كثيرا في صلاتي داعية الله أن يحفظه
ويعيده سريعا.

سارة

أخبرت أبي بأني أفكر في مد العقد فبكي. تمنيت لو أن الكلمة لم تخرج مني ولم أدر ماذا أفعل. تخيلت أي رد فعل إلا أن يبكي، ربما توقعت أن تبكي أُمي ولكنها تماثلت نفسها أكثر من أبي. أخبرتني أُمي بأني الأدرى بمصلحتي وأنا كانت تشعر بأني سأتي لهم بمثل هذا الخير لأن لا أحد يسافر و يعود بعد عام واحد ولكنها تخشى من موقف أسرة سارة لأننا سنربط ابنتهم لمدة سنتين. أما أبي فلم يتحدث كثيرا بعد أن سمع الخير وإن كان دعا لي في نهاية حديثنا على التت بأن يوفقني الله ويعيدني سالما.

أفتقد أبي كثيرا وأعلم أنه يفتقدني كثيرا كذلك ولكنه كان دائما رجل المنطق والحلول العملية ولذلك ظننت أنه سيؤيدني في قراري.

يعز عليّ أبي كثيرا ولكني لا أريد أن أضغط عليه كذلك لأنه سيساعدني بالمال إذا ما احتجت وهذا هو ما لا أريده، بل أريد أن أساعد أنا بالمال في جهاز أختي وأن أجعله هو وأُمي يحجون على نفقتي. أشعر أُنّي بالفعل بين نارين ، بل ثلاثة فما زال أمامي سارة التي لا أدري رد فعلها. ولذلك فقد جلست لأقرأ في المصحف الذي كان هديتها لي قبل سفري ثم قممت فصليت صلاة استخارة ولكني لازلت لم أصل لقرار بعد.

عمر

بعد رمضان غيرت نغمة الموبائل من "رمضان جانا" إلى
"هتفضل في قلبي" وجعلت النغمة التي يسمعها عمر عندما
يتصل بي هي "لسه ناوي على الرحيل" وذلك لكى يعرف
مدى افتقادي له و يعود كما عاد بطل الأغنية إلى حبيبته في
النهاية.

أخبرته بكل ذلك في آخر حديث لنا في أول أيام العيد.
وطبعا أخبرته بما اشترته من ملابس العيد وشغلت الكاميرا
لأريه الطقم الجديد وغرفتي بعد أن علقت بها البالونات وسألته
عن العيد عنده فأخبرني أن لا رمضان و لا العيد لهم طعم
خارج مصر. كنا ذاهبين لزيارة أسرته فأخبرته فطلب مني أن
أتحدث مع عمي وأمزع معه لأن نفسيته سيئة بسبب غيابه.
كانت معنوياتي مرتفعة بشدة لأنه لم يبق سوى شهرين و يعود
عمر ولذلك أخبرته أني سأضحكه هو و طنط حتى يؤلفهما
فكأهما. وبالفعل عندما ذهبنا إليهم دخل أبي و أمي ثم دخلت
بعدهم واستغللت فرصة وقوف الجميع سويا فقممت برشهم
بالتلج و الخيوط الملونة.

كان يوما جميلا جدا قضيناه عند عمي وبخاصة لأنني وجدت
تشابه كبير بين عمر وعمي في طريقة الحديث و حركة اليد بل
و نبرة الصوت . يبدو أن عمر ابنهم حقا و لم يجدوه أمام

جامع!! تحدث معنا عمر على التت بالطبع وإن كنت لاحظت أنه لا يمزح مع والده كما هى عاداته وأن عمى يدو حزينا إلى حد ما. ولكن طنط كانت طليعية وأخبرت عمر عن الشلج الذى رششته عليهم وأخبرته أن عمى غلبني فى الشطرنج ولكن بابا عاد فانتقم لي وغلب عمى فى الدور التالى.

عندما عدنا مساءً، جلست فى غرفتي أحلل أحداث اليوم. عمر كان منشغل البال و هو يحدثني صباحا .. ولم يعطينى إجابة محددة عندما سألته عن موعد عودته ولكنى لم أشغل بالي كثيرا وقتها لأنه تحدث عن أن عمى حزين لغيابه، وعمى بدا مهموما عندما تحدث عمر و لم يتحدث معه كثيرا كالعادة. هل هناك مشكلة ما فى العمل عند عمر ولا يريد أن يحكي لي عنها ولكن عمى يعرفها ؟ أمهل يفكر عمر بمد عقده مثلما فعل جمال خطيب جميلة؟ دي تبقى مصيبة!!!

سارة

نقطة تحول

كعادي هذه الأيام أعود من عملي إلى شقة (جميلة) لكي
أساعدها في توضيب أشيائها ورفض هذا الكم الهائل من
الفايزات و تلك المنمنمات الصغيرة التي تعشقها جميلة. أحرقها
بشكوكي حول مد عمر لعقده بينما نحن نضع الحلال في المطبخ
بعيدا عن دوشة شقيقاتها و بنات عمها.

"والله يابنتي من كلامك كده شكله هيمد العقد"

"مستحيل ده أنا ساعتها كنت....."

"كنتي إيه ؟ هتسيبيه يعني؟ ما هتقدرش خلاص انتي طبطي
حياتك وأحلامك عليه، زى بالظبط ما حصل معايا مع جمال
و أهو الستين بقوا تلاته وماقدرتش أفتح بقي لأني عارفة إنه
هيقوللي أنه بيعمل كل ده عشاننا"

"بس سنتين كثير .. ده ربنا أعلم السنة دي عدت عليا
إزاي... أنا مش قادرة حتى أفكر في الموضوع".

"خلاص ريحي دماغك واتصلي بيه واسأليه مباشرة"

"ما أقدرش ... أخاف يكون ظني في محله"

حاولت جميلة إقناعي بالمنطق بأن غياب عمر لسنة أخرى ليس بالشيء الكبير وأن السنة "متعدى زى اللي قبلها" ولكنني كنت أعند من البغل (وفقا لرأيها).

سارة

حاولت أن أستجمع شجاعتي وأخبر سارة عن موضوع مد العقد و لكنني لا أستطيع. فكرت أن أنتظر حتى ينتهي العام ثم بعد ذلك أتجمع بأني لا يزال أمامي عدة مشاريع معلقة وبعد مرور شهرين أو ثلاثة أخبرها بأني سأضطر لإكمال العام. بس بصراحة يصعب عليا إني ألف وأدور على سارة وأعمل عليها خطة. مش عارف أعمل إيه؟ عايز إشارة من ربنا .

عمر

اتصلت بي ريهام قبل نزولي إلى عملي وهو وقت لا تتصل
فيه عادة إلا لأمر طارئ... استر يا رب

"ايوه يا ريهام ... صباح الخير"

"سارة قابليني عشان نروح الجميلة دلوقتي"

(شعرت بالجزع فقد كان والدها مريض)

"نروحلها دلوقتي ليه؟"

"جمال اتوفى"

"ايه!!!!!!!!!!!!!!"

سارة

أحاول الاتصال بسارة منذ يومين ولكن تليفونها مغلق وكذلك لا تدخل على النت في مواعيد لقائنا. اتصلت بعمسي ولكن كان هناك شيء ما بالشبكة فلم أستطع الحديث معه. بعد اليوم الثالث استطعت أخيرا الحديث معه ، بعد أن اتصلت بأبي وطلبت منه النهاب إليهم. أخبرني عمي أن خطيب صديقتها جميلة قد توفى و سارة عندها منذ علمت بالخير.

أعرف جميلة صديقة سارة ، فقد حدثتني عنها كثيرا لأنها صديقتان منذ الطفولة وخطيب جميلة كان زميلهما في الجامعة و خطب جميلة بعد التخرج ثم سافر بعد الخطوبة ستة أشهر. ربنا يكون في عون جميلة وفي عون أهله ويصبرهم. أريد ان أتصل بسارة و أسمع صوتها لأطمئن عليها فأنا أعرف مدى تعلقها بجميلة. ولكني كنت مشغلا أنا الآخر كثيرا لأن عصام يستعد للسفر لكي يأتي بعروسته من مصر والتي تعرف عليها عن طريق عمته في إحدى زياراته.

عمر

أجلس بجوار جميلة غير قادرة على الكلام... لا أجد ما أقوله لها ليعزيها على الرغم من أن كثيرين يدخلون و يحدثننا عن الصبر، وجاءت فاطمة وحدثتها كثيرا عن أجرها عند الله إذا صبرت وأن الله يبتلي أحبائه وأن الله يدخر لها كل الخير. كان الكلام يريحني ولكن جميلة كانت وكأنها في عالم آخر لا تفيق منه إلا لتبكي بشدة وتنادي على جمال فنيكي معها. كنت أتألم لألمها وتمزق قلبي عندما التقت هي ووالدة جمال واحتضنا بعضهم وانفجرتا في البكاء. كنت أعرفه منذ كنا في الجامعة وكان من أفضل طلاب الدفعة خلقا وأحبته جميلة بسبب أخلاقه العالية تلك وطيبته التي تجعله أشبه بالأطفال وقد سافر بعد خطوبتهما بعدة أشهر بعد أن أحضر له سمير - أخوه الأكبر الذي كان يعمل في السعودية - عقدا معه. أنظر لجميلة و لا يدور في بالي إلا فكرة واحدة.. ياترى بعد قد ايه هترجع جميلة زي ما كانت امبارح بس؟

سارة

كان من المفروض أن نلتقي أنا و جون عند منزل عصام لتوصيله إلى المطار ولكنني اضطررت إلى التأخر في العمل فاتصلت بهم وأخبرتهم أن سألتقهما في المطار وقد أصل قبلهما لأن مقر عملي أقرب إلى المطار. ووصلت إلى المطار قبلهما بالفعل ولكنهما تأخرا كثيرا فاتصلت بهم ولكن لم يرد أيا منهم .

جاء موعد الطائرة ولم يصلا و زاد توترى بشدة وعرفت أنه بالتأكيد قد حدث لهما شيئا ما عندما أقلعت الطائرة ، فعصام لن يدع شيئا يؤخره عن الطائرة التي ستوصله إلى عروسته التي صدع أدمغتنا بالحديث عنها. أعدت محاولة الاتصال بهم وأنا في طريق عودتي من المطار إلى أن رد موبايل جون أخيرا ولكن ردت عليّ سيدة ظننتها في البداية والدته ولكنها أخبرتني أنها ممرضة في مستشفى (.....) وأن صاحب هذا الموبايل في المستشفى. سألتها عن عصام فلم يكن لديها إجابة. سارعت إلى المستشفى لأجد الوغدين راقدين في أسرتهما يضحكان مع ممرضة أجنبية شقراء .

" انتو الاثنين باستردز... قاعدين تضحكوا مع البلوند وسايبين في الأيربورت" كنت أتحدث خليطا من العربية والإنجليزية لأنني أريد توبيخهما هما الاثنين في نفس الوقت. اطمئننت عليهما بعد أن أخرجت شحنة توتري وحموي ، وعرفت أنهما اصطدما بسيارة بسرعة ولكن ربنا ستر فكسرت ذراع عصام و ساق جون. وهذه نهاية جيدة لمثل هذا الحادث

لأن سرعة السيارة الأخرى وقوة الصدمة كانت تكفي لإغناء
حياتهما لا قدر الله.

اتصل عصام بخطيبته ليطمئنها و أخبرها بما حدث وأخبرها
أنه سيأتي في أول طائرة يستطيع أن يحجز فيها. وهنا تذكرت
خطيب جميلة الذي لم ينسَ له أن يجري مثل هذا التليفون.
أريد أن أتصل بسارة.

عمر

أحناء.....وأفراح

لأن فرحيّ جميلة وفاطمة كانا مقررز لهما أن يكوننا في أوقات متقاربة فقد كانت كلا منهما تحاول أن تقنع الأخرى بأن تتزوج هي أولا لكي تخبرها عن الزواج وأسراره! الآن نتجمع عند جميلة محاولين أن نخرجها عن حزنها و صمتها ، خاصة وأنه قد مر شهرين على وفاة جمال ولكنها لازلت في حالة صدمة. وللأسف لن تنفع حفلاتنا الشهيرة بإخراجها مما هي فيه، فالموقف أكبر منا جميعا. ولكني في قرارة نفسي كنت أعرف أن هناك خيرا كثيرا في انتظار جميلة و أياما سعيدة جدا لأنني أعلم أن الله "حنون جدا" أحن علينا من أمهاتنا. كنت أحيانا أستطيع أن أجعلها ترى الأمور من هذه الناحية وأحيانا أخرى أقف صامتة أمام انفجارها في البكاء.

كان فرح فاطمة قد تحدد منذ فترة ولم تستطع تأجيله ولذا اصطحبتي فاطمة الى بيت جميلة لأنها تريد استئذنها بعمل الفرح. صحيح أن العلاقة بيننا جميعا ليست إلا صداقة ولكننا أصبحنا جميعا عائلة واحدة لا يصح أن يفرح أحدهنا بدون الآخر. وطبعا أذنت جميلة لسارة وعاتبتها لأنها تستئذنها لأن فرحها سيسعدنا، بل وقامت وأحضرت هدية لفاطمة أخبرتها أنها كانت ستحضرها لها يوم زفافها ولكنها تعتذر لها لأنها لن

تستطيع الخروج الآن وحاولت فاطمة أن تقنعها بالحضور ولو
لدقائق ولكنها اعتذرت برقة. وذهبت فاطمة وعدت إلى جميلة
وكانت تبدو هادئة وصامتة ولكني كنت أعرف ما تشعر به
فأخذتها في حضني فانفجرت في البكاء.

سارة

اتصل بي أبي وكان صوته وكأنه يمنع نفسه من البكاء بالكاد

"أزيك يا عمر يا حبيبي؟"

"الحمد لله يا بابا إزي حضرتك؟ مال صوتك مش عاجبي؟"

"لأ مافيش يا حبيبي. أنت ما بتتصلش بسارة...إبقى كلمها يا حبيبي عشان حالتها النفسية تعبانة"

"ما أنا باكلمها بس ما بعرفش اوصل لها اليومين دول على التت عشان تبقى في بيت جميلة معظم الوقت"

"طيب يا حبيبيانتي عامل ايه في شغلك"

"سيبك من الشغل تحب تسمع خير حلو؟"

"احب طبعاً"

"أنا راجع ومش هآمد العقد"

كان أبي يضحك ويكي ويدعو لي و يخبرني كم أفقدني
(كله في نفس واحد) شعرت للحظة وكأنى والده وهو ابني
وتمنيت أن أكون بجواره الآن لآخذنه في حضني. حفظه الله و
أسعده و مدّ لي في عمره هو وأمي ياأارب. الي نفسي بقى

دلوقتي أفرحها زي مافرحت أبويا هي سارة. اتغيرت كثير من
ساعة وفاة جمال، بتكلم بصوت هادي مايشبهش صوتها العالي
اللي بيضحك وبأحس بدموعها اللي نازله طول ما هي
بتكلمني. يارب فرّج همها وارزق صاحبها الصبر.

عمر

" واحشنى عمر قوي، بقالنا كتير ما اتكلمناش على
الشات، حتى الدقايق القليلة على الموبايل باكون فيها مش في
الموود وطبعاً اليومين دول كل ما اسمع صوته أقعد أبكسي لأنني
بافتكر جمال وبخاف عليه إنه (بعد الشر بعد الشر) يحصله
حاجة. عايزة نفسي تبقى أحسن عشان أعرف أكلمه من غير
ما أنكد عليه. والحمد لله جاء الخير الحلو عندما اتصلت ربهام

"أيوه يا بنتي"

" مافيش ألو ما فيش سلامو عليكم "

"عندي خير حلو"

"إيه الحمد لله هتسافري بره تحضري مباريات المصارعة
مباشرة"

" بطلتي غلاسة انتي مش بتقولي إن نفسيتك تعبانة؟! "

"طيب قولي قولي فيه إيه؟"

"أنا جالي عريس"

"لا حول و لا قوة إلا بالله وده مين اللي أمه داعية عليه"

"تصلقي هاقفل في وشك السماعة"

"لأ لا خلاص هاسكت ..مين ؟ حد نعرفه؟"
"لأ ده ابن صاحب بابا وشافني لما ماما كانت فى المستشفى"
"ويشتغل ايه؟ وعنده كام سنة ؟ وشكله ايه؟ وبيقبض
كام؟"

"يشتغل ظابط فى الجيش"
"يلعب مصارعة فى الجيش؟!"
"يوووه بقى انتي مش هتبطلى هزار"
"خلاص يا ستي إنتي مالك على أحرك كده هو مش
عاجبك ولا إيه؟!"
"لأ عاجبيى بس مش عارفة....."

طبعا قعدنا نرغى أكثر من ساعة ونص لغاية ما ماما ندهت
عليا عشان أتعشى معاهم. طبعا فرحانة لريهام جدا .بس أكثر
حاجة مفرحاني إنها هتشوف القلق اللي أنا شوقته وهأقعد
أغلس عليها زي ما كانت بتعمل معايا!"

ولأن حالتي النفسية تحسنت قليلا فقد أرسلت لعمر رسالة
بأنى أريد محادثته على الشات. ورن على بعد حوالي ربع
الساعة معلنا أنه أون لاين.

سارة

كان هناك الكثير والكثير لأحكيه لسارة لأعوض تلك المدة التي لم نثرثر فيها. وكانت سعادتي لا توصف لأنها عادت مثلما كانت تتحدث معي ثم تتشاجر مع أخيها مصطفى أو تطلب منه شيئا ثم ترسل لي صوراً ونكاتاً وكاريكاتيراً وهي تحدثني . أشعر أحياناً أن هناك ثلاث سارات يتحركن في نفس الوقت كلاً منهن تؤدي شيئاً تريده سارة. سألتها إذا كانت تريد شيئاً لأحضره لها وأنا قادم لأن العقد على وشك الانتهاء فطلبت شيكولاتة بالطبع.

عمر

" مش هيمد العقد...هيه....مش هيمد العقد...هيه...! "

كان هم و أنزاح من على قلبي لما قال عمر أنه خلاص راجع واطمنت أنه مش هيمد العقد. " وهذه المناسبة طلبت منه تشغيل الكاميرا وقمت بتشغيلها أنا الأخرى لأنني أستطيع الآن أن أجعله يراني لأنني لا أبكي، " ده غير أنه واحشني قويسبي ونفسي أشوفه. " للأسف كانت الكاميرا سيئة فلم ترتو منه عيني ولكنها تصيرة حتى يعود! للحظة فكرت أن أتصل بجميلة لأخبرها أنه قادم لأنني كنت أتحدث معها في هذا الموضوع ولكنني تذكرت الموضوع فاتصلت بها لأسألها عن حالها وأثرثر معها قليلاً ومع الثثرة نمت في عقلي فكرة.....

سارة

أفراح .. أفراح .. وأفراح

قررت أن أشتري هدية لعمر بمناسبة رجوعه على الرغم من أنه يفصلني عن لقائه أربعة أشهر ولكني أفرح بشراء هدايا له وكأنه معي. احترت بالطبع في اختيار الهدية " فالأولاد غير البنات في موضوع الهدايا ده ، البنات فيه حاجات كتير تقدر تماديهن بيها لكن الأولاد يحجروا فعلا.

حزام جلد طبيعي؟ لأ مش رومانسي قوي وبعدين زمان لما كنت أخذ عصايه للمستتر في المدرس كانت ماما بتقوللي يبقى انتي أول واحدة تنضربي بيها ، لأ لحسن عمر يضربني بيه!!!!!!

قميص ولا بنطلون؟ ممكن يكون مقاسه اتغير في السفر كانت ليليان لديها الإجابة فهي تحب شراء الفضة وتعترف محل بيع بأسعار جيدة في شبرا ولذلك غلشنا على ريمونده لكي تأخذنا في سيارتها وبعد أن رشوتها بشيكولاته بيضا (دفعست فيها ٥ جنيه حنة واحدة!) وافقت وأخذتنا في سيارتها للمحل. ريمونده: إنت يا بت مش مابتحيش تلبسي فضة

سارة: لأ هاجيب هدية لعمر

ريمونده: هو مش لسه قدامه كام شهر عقبال ما ييجي؟

سارة: ما أنا معايا فلوس دلوقتي ألحق أجيب الهدية قبل ما
أصرفهم

ريمونده: تفتكري أجيب أنا كمان هدية لنجيب؟

سارة: هو جاي إمتي؟

ريمونده (بتنهيدة): بعد شهر

سارة: ومالك مهمومة كده، ده انتوا مابتطلوش رغي على
الشات وبتيجي الشغل مش قادرة تفتحي عينيك من كسر
المسهر قدام النت معاه ولا داهية تكوني اكتفيت بالخطوبة أون
لاين ومش عايزة تتجوزي.

ليليان: انتي اتخانقتي معاه ؟

سارة: وتخانق مع الواد ليه في غربته هو ناقص؟

ريمونده: أنا إللي مش ناقصاكم انتوا الاتنين!

سارة: لا ده انتي موودك وحش قوي، هاتي الشيكولاتة اللي
ادهاالك

ليليان: بطلي طفاسة يا سارة ، مالك يا موند
ريمونده: مش عارفه خايفة لما يرجع نجيب ألاقه شخص
تاني

سارة: هيدلوه يعني ، ياريت يا شيخة يمكن يجييه أشقر و
عيونه زرق وطويل

ريمونده: خايفه يتغير يا سارة ...بقالنا سنة و نص ماشفناش
بعض... مش عارفة يمكن ما يفضلش نفس الشخص اللي
وافقت عليه من سنتين.. يمكن....

سارة: فاهماكي .. أحيانا لما عمر بيتكلم بلاقي نفسي عمالة
أفلتر كلامه وأشوفه إذا كان في نبرة تغيير ..مش قصدي يعنى
من ناحية حبه ليا ولا من ناحية أخلاقه ..فيه حاجه كده مش
عارفة أقولها لك إزاي ...خايفة عمر اللي يرجع يكون غير عمر
اللي سافر لأن السنة دى عدت عليه وشاف حاجات كتيرة من
غير ما نكون مع بعض .

ريمونده:أهو اللي انتى بتقوله ده بالظبط اللي خايفه منه
...بس مافيش حل غير إني أستنى لما يرجع ... متهيألي هاعرف
إذا كان اتغير من أول نظرة ليه

ليليان : يعنى إيه هيتغيروا؟! ، ما أنتو بتكلموهم على الشات
وعلى الموبايل و بتشوفوهم على الكاميرا كمان

سارة: قُري علينا بقى ،خطيبك جنبك وكل اسبوع
والثاني في راس البر وجاية تُقري علينا على الكلمتين على
الشات ، نزلها يا بت يا موندنا من العربية

ريمونده: سيبها سيبها ده هيا الوحيدة فينا اللي عارفة
طريق محل الفضة!! "

في محل الفضة وجدت ضالتي سريعا ، كانت هناك
ميداليات جميلة على شكل أسماء عديدة ووجدت لحسن حظي
اسم "سارة" ... " هى دى بالظبط الهدية الليأنا عايزاها ،يشيلنى
في قلبه و يشيل اسمى في جيبه ! "

سارة

"يا جيلي حاولي تتخلصي من عفريت الخاطبة اللي لابسك ده"

"عفريت خاطبة إيه يا بني...زي مابقولك كده انا حاسه إن الواد سمير أخو جمال الله يرحمه يليق على جميلة، نفس أخلاق جمال العالية وكمال وسيم وشخصيته واضح إننا كويسة، كفاية إنه رجع مصر نهائيا مع إن كل شغله و مستقبله كان في السعودية عشان يكون جنب مامته"

"بقى شكله وسيم وشخصيته كويسة؟ ما فيش حاجة كمان لاحظتيها فيه أثناء تأملك العميق ليه؟"

"إيه ده؟ إنت بتغير ولا إيه؟"

(بحدة) "هاغير من إيه يعني؟"

(بحدة أيضا) "لو ماكنتش حاسة إن كل دول في نظري مش أكثر من عيال مقارنة ببيك ماكنتش كلمتك بالشكل ده عنهم ،انا باحكيك عنه زي مابقولك كده مثلا على ياسين ابن خالي انه واد قemor"

(بنبرة ضاحكة) "وكمال ياسين قemor؟ مين كمان يا جيلي؟ باين عليا غبت عليكى كثير يا هاتم"

(ضاحكة) "ياسلام كمان هتغير من عيل عنده عشر
سنين!!!!"

موضوع الغيرة ده كان من الحاجات الغريبة اللي زادت
قوي عندي اليومين دول، من أول ماعرفت سارة وأنا بساغير
عليها حتى أحيانا من أبوها نفسه، بس دلوقتي بلاقى نفسي
باتضايق لما تحكي عن الشغل وتجييب سيرة زمايلها، سارة
بتتكلم كعادتها بعفوية وبتقول كل حاجة بس.....مش عارف
يمكن لو ماكتتش سافرت ماكتتش هابقي بالحساسية
دي...بس أنا خايف حد يشوف سارة ويعرفها زي ما أنا
عارفها ساعتها أنا متأكد إنه هيحاول يشاغلها...أبوه أنا واثق
من سارة ٢٠٠ % بس مش واثق في أي راجل حوالها !!

عمر

شعور لذيد إن حد يغير عليا، صحيح إن كلمت عمر بنيرة
جادة وكأني زعلانة لما حسيت بغيرته بس بصراحة كنت طائيرة
من الفرحة ، صحيح أنا طول عمري من المؤمنين باستقلالية
الست وإن الواحدة ما تبقاش تابعة لجوزها ، بس بصراحة
حييت إن أحس إن عمر حاسس إن أنا بتاعته و مش من حقي
أشوف واحد تاني غيره ، لأنني أنا كمان بردوه عندي نفس
الإحساس وما فيش واحدة تستجري تفكر تاخذ عمر ميني
ساعتها كنت أرتكب جريمة! لو يعرف عمر إن من ساعة ما
شفته ما بقاش فيه راجل في الدنيا بيملي عيني غيره لكان بطل
يغير عليا خالص....بس أنا طبعا مش هاقوله كده عشان ما
يتمر عش علياوعشان كمان ما يطلش غيره!

سارة

المشاكل بدأت تخف في الشغل من ساعة ما عرف زمائلي
إني سايبها لهم مخضرة!! الواحد يطلع من حفرة يقع في دحديرة
بسبب عمال المهندسين اللي معايا .

كان نفسي أقعد على قلبهم خصوصا إن مديري معجب
جدا بشغلي وعندي فرصة أكر منهم كلهم في الترقية بس أبويا
أغلى عندي من كل ده ، الواحد مش ضامن بعد سنة كمان
هيكون لسه حسه في الدنيا ولا لا قدر الله مش معايا، وطبعاً
سارة كانت غالباً هتضربني بالرصاص لو قتلها إني هامد سنة
كمان!

عصام رجع بعروسته وعزمتا على أكلة مصري من إيسدين
مصرية، صحيح جون حاله تلبك بس بردوه عجبه الأكل ،
وطبعاً أنا الأكل عاجبي جدا عن الأكل اللي بأكله في بيت
جون لأن والدته بصراحة بتعمل أكل غريب الشكل والطعم!
ياترى سارة بتعرف تطبخ!!!

عمر

فرحين مرة واحدة...دخلة فاطمة و خطوبة ريهام. كان
نفسى قوي عمر يكون معايا فى المناسبتين، بس ولا يهمني بابا
كان معايا وكان زي القمر.

فاطمة كانت مش مصدقة نفسها المأذون قال "بارك الله
لكما..." وبقت زوجة إيهاب رسمي، متهيألي هيفمى عليا
لحظة ما هابقى زوجة عمر رسمي أنا كمان. أما ريهام فكانت
زي القمر وهيا قاعدة جنب كريم خطيبها فى صالون بيتهم يوم
الخطوبة. أول مرة تبطل تتكلم عن المصارعة وتقعّد مكسوفة
زى البنات!!!! بصراحة حضور الأفراح دى خلاني اشتاق
احضر فرحي بقى! يا!!!!!!!!!!!!!!رب اتجوز بسرعة يا!!!!!!!!!!!!!!رب

سارة

اختفى عصام من خروجائنا وأصبحنا كاليتيمين أنا وجون ،
لأن عصام كان هو اللي عارف كل حته في البلد وعارف
نروح فين عشان نتبسط. طبعاً أنا وجون ما كناش بنبطل قرّ
عليه وكل ما نتصل بيه تلاقيه قافل الموبايل.

جون: تفتكر قافل الموبايل ليه؟

عمر: مشغول يا عم!!!

جون: ٢٤ ساعة في اليوم !!!

عمر : عقبال ما ننشغل إحنا كمان زيه!!!!

عصام فتح نفسي على الجواز أكثر ما هي مفتوحة ، منه لله،
ربنا يسهلها ونخلص كل حاجة بسرعة بعد رجوعي عشان
نتحوز بقى!!!!

عمر

22. |||||

عمري ما صدقت كلام الأغاني وكل الحكى عن العيون
والمش عارفه إيه، بس النهارده الصبح صحيت لقيت نفسي
مشتاقه لعيون عمر، بعد ٣٧٢ يوم ماشوفتش فيهم عمر أغارده
هاشوفه واشوف عينيه واشوف نفسي تانى جوه عينيه، حقيقي
واحشاني عينيه. ألبس إيه باترى ؟ بقالى اسبوع بافكر ألبس إيه
فى المطار لما نروح نستقبله، البس الطقم اللبني اللي بيعجبه؟ بس
هو بعني أنا ما عنديش غيره؟! ألبس أبيض فى أبيض عشان
أفكره بالملايكة؟! ولا ألبس إيه؟ طبعاً هاخذ معايا بوكيه الورد
الأصفر اللي بيجبه عشان أنا متفائلة وعندى أمل إن كل الأيام
الحياة هتكون مليانة فرحة وخير. والهدية؟ لأ الهدية هاديها ليه
لما نبقى لوحدها. باترى أقوله وحشتني؟ ولا هاتكسف أقولها
قدام بابا وقدام أهله؟ مش مصدقه إن أحيرها هاشوفك يسا
عمر، متهايلي قلبي هيقف من كثر الفرحة قبل ما نوصل المطار.

ساره

مع ربط الأحزمة سرت قشعريرة في جسمي، بعد أقل من
ساعة سيأخذني أبي في حضنه وستقبلني أمي وسأملأ عيوني
بمسرة، " ياترى هاتأخذ بالها إني حاطط من اليرقان اللي
جابتهاولي في عيد ميلادي قبل ما أسافر . ياترى هتتعجبها
هداهاي ، ياترى عينيها هتضحك لما تشوفي زي ما كانت قبل
ما أسافر . ياترى بابا مش واحد على خاطره إني فكرت اغيب
سنة كمان؟ إزاي فكرت في كده؟ ده أنا مش قادر اصبر
الدقائق اللي فاضلة ، إزاي كنت هاصبر كمان سنة؟ الحمد لله
إنه رجعتي.

عمر

من بعيد شعرت به ، لست أما بعد ولكني أظن إنه هو ده
الإحساس اللي بتقول عليه الأمهات بأنهم بيحسوا بعياهم من
غير ما يشوفوهم ، قبل ما يظهر عمر - وخصوصا إن ربنا
واعدي بكل الناس الطوال يقفوا قدامي - حسيت وكأن قلبي
انقر في مكانه وبعدها شفته. كان بيعدل شنطة الابل توب
على كتفه ولسه ما شفتاش وبعدين رفع عينه وشافني
وبعدها..... ماشفتش حاجة! لأن الدموع ما بتقتش سايبالي
فرصة أشوف أي حاجة من وراها - حسبي الله ونعم الوكيل
يعني أنا هالاقيةا منين ولا منين ، من الناس الطويلة ولا من
دموعي - ولكني لاحظت وسط شهقائي ودموعي أن عمي
وطنط ومروة يكون أيضا. سلم عمر علينا جميعا ثم ارمى في
حضن والده وهذه أول مرة أرى دموع عمر!!

سارة

عدت مع أبي وأمي ومروءة في سيارتنا بينما لحق بنا على بيتنا عمي وطنط و سارة و مصطفى، بينما ذهب أصدقائي إلى بيت أحمد لكي يتركوا لي فرصة لكي أرتاح وأجلس مع أهلي قليلا. كنت أمني أن تأتي سارة معنا ولكنني أخرجت أن أطلب ذلك ولكن ما صبرني و أسعدني أبي وحدثت نفس الرغبة في عينيها وكأنها لا تريد تركي لأذهب مع أهلي. على الرغم من أني عدت إلى عالمي الأصلي إلا أني أشعر وكأنني أرتدى ملابس جديدة، على الرغم من فرحتي بها إلا أني مازلت أتأقلم عليها. لاحظت أن الشعر الأبيض في رأس أبي قد ازداد - كم أوحشتني أبي- أما أمي فقد نقص وزنها- سأطمئن على صحتها بالتفصيل من مروءة، أما مروءة فقد ازدادت جمالا وبالطبع كانت تتعامل معي برفقة شديدة لأنني لسه كنت واحشها، لكن طبعاً بعد يومين هترجع ربما لعادتها القديمة وتبدأ في إيقاظي بضربي بالمنخدرات كالعادة! أما فراشي الخلو فمازالست لا أستطيع التحكم في دموعها ولايزال وجهها ينطق بكل ما تريد قوله، ياترى ممكن نتحوز خلال شهر؟

عمر

"ياترى ممكن نتجوز بعد شهر؟" كانت هذه أول جملة قالها لي عمر عندما جلسنا أخيرا بعيدا عن أسرتنا. وأجبتة إجابة شعرت بالخجل منها بعد ذلك ولكني لم أستطع منع لساني عن النطق بما أشعر به! عارفين إحساس الوحدة لما تعمل ريجيم شهر ماتدوقش فيه الشيكولاته ؟ أهو ده بالظبط اللي كنت حاسه بيه وكان عمر هو الشيكولاته اللي اتحرمت منها سنة. ما كنتش عايزه افكر في اللحظة اللي هنضطر نخرج من بيت عمي ونروح بيتنا، كنت عايزة آخده معايا وماسيهوش تاني أبدا. إمتي نتجوز بقي؟ عشان لما كل واحد يروح بيته أروح أنا مع عمر.....

سارة

"ياترى ممكن نتحوز امبارح؟" كان هذا هو الرد الرائع الذى لم أكن لأحلم به من حبيبي. أول مرة أشعر بلهفتها على الزواج مثلي. صحيح وشها جاب ألوان بعدها، ولكن لسانها الذى لا تستطيع ربطه كان صديقي هذه الليلة. يمكن كنت عايز رد زي ده يضئ كل قلقي وغيري عليها وأنا في الغربة. أحضرت العديد من الهدايا لأهلي ولأهل سارة وكذلك هدية لسارة أعطيتها لها أمامهم ولكن هديتي الخاصة لسارة أعطيتها لها بين وبينها، كانت كرة ثلج بها تمثالين صغيرين لشاب يحمي حبيبته من هطول الثلج بينما معطفها الوردي يتطاير خلفها وهو يحاول تغطيتها بمعطفه الرمادي. "شكرا يا عمري" رد آخر جعلني أطيّر فرحا

عمر

لو كان كل اللي عمله عمر معايا طول خطوبتنا إنه بس
أهداني كرة الثلج دي ،لكنك بردوه حبيته طول عمري
...فما بالك بكل الحنان و الحب اللذي باشوفه منه في كل كلمة
وكل فعل بيقوم بيـه، لحظة ما شفت هديتة فكرت في إني نفسى
قوي أدخل الجنة مع عمر عشان نعيش للأبد مسع بعض.
ياااالله اجمعنا في دينا حلوة وجنة أحلى..بس الحمد لله إني
اشترتلته أنا كمان هدية ، ولا هو هيطلع أحسن مني! طلعت
الميدالية من شنطتي وكانت في كيس قطيفة كحلي.

(مكتوبة ليها)

"ايه دي؟"

"افتحها وشوف"

"العلبة دي فيها فيل؟"

" لا ديناصور .. افتحها بقي .."

وفتحها وأخرج الميدالية و.....قبلها..... أكيد عرفتموا
كان نفسي أكون مكان إيه دلوقتى!!!! بس اللي أحلى من
كده كمان إنه ماترددش لحظة وراح جايب سلسلة مفاتيحه
وخلعها وركب الميدالية الجديدة . كان نفسي أعرف إذا كان
هيرضى يشيل ميدالية عليها اسمي ولا هيخجل من كده، بس
الحمد لله ماخيش ظني فيه!

سارة

أعجبني الميدالية جدا لأنها تحمل اسم حبيبي ولكني للحق
ترددت للحظة وأنا أقبلها وفكرت هل أحملها في محفظتي عباءة
أم أضع مفاتيحي بها أمام الجميع بينما عليها اسم سارة. ولكني
تذكرت حبيبي رسول الله - صلى الله عليه و سلم - حين
سئل وهو جالس في مجلس كله رجال من الصحابة عن أحب
الناس إليه فرد ببساطة قائلا "عائشة" وأنا أحب سارة ، فلماذا
أحمل من حمل اسمها في جيبي مثلما هي في قلبي ؟

عمر

وضع الخطبة

" شقة كبيرة وفرح في الهيلتون له؟ ما الشقة كويسة
والحمد لله وفي منطقة معقولة ومع شوية ديكورات هتبقي
رائعة، أما موضوع الفرح ده....."

" يا جيلي كفاهه إني ما عملتكيش حفلة خطوبة تليق بيكي
سيبين أعمل اللي أنا عايزه بقي"

" يا عمري حفل خطوبتنا كان أحلى حفل خطوبة في العالم
عشان أنا كنت العروسة وأنت العريس.....بس بجد يا عمر
ممكن نصرف الفلوس بشكل أحسن من كده"

" يا سارة أنا سافرت عشان ما اضطرش أقعد احسبها
بالقرش والمليم وأعملك كل اللي إني عايزاه"

" ومين قال لك إن أنا ماعنديش كل اللي أنا
عايزاه.....اسمعي بس، إحنا نجهز شقة فيصل وفي نفس الوقت
ندفع مقدم شقة في أي مدينة جديدة تعجبنا وبكده يفضل
معانا فلوس عشان نشترى عربية صغيرة لأننا محتاجين عربية
وهنحتاجها أكثر لما ننقل في الشقة الجديدة في المستقبل"

"حلو کده بر دوه هیفضل مبلغ نعمل بیه الفرع"

"ما شاء الله إنت باين عليك راجع مليونير!!!"

"بطلی غلامہ انقی عارفۃ المبلغ الہی رجعت بیه بالظبط"

"أه بس حسيت إنك بتكلم عن مليون جنيه"

(مُخْبِتٌ) "طَبَّاهُ رَأَيْتُكَ أَرْجِعْ دُبِّي عَشَانِ أَغْمَلُ الْمَلِيونَ

فعلهم؟"

"لَا لَا لَا .. أنا هاحدك بشنطة هدومك ومن غيرها لو مش

عندك؟"

"طیب ما تعریفش مهندس دیکور کو یس؟"

"طبعاً أعرف المهندسة سارة... أنا يابني ليا وجهة نظر مختلفة

خدا! اللہ فی موضوع شقتنا"

"طيب و الفرح ؟"

"أنت مش عايز تدفع؟ أنا هادفعك بس استنى عليه؟"

سارة وعمر

شوية أحمر وشوية أزرق وشوية أصفر وشوية صغيرين أسود
وكتيبير أبيض هو ده تصوري لديكور بيتنا!!! لسه مافيش
شكل معين في دماغى بس هي دي الألوان اللي كنت باحلم
بيها دائما في بيتي. عمر مايعترضش على أي حاجة بقولها في
الديكور ولما سألته إنت ما عندكش اعتراض على أي حاجة؟
رد وقال لي " فيه حد بيعترض على قضاء الله !!!"

رحت سور الأزبكية واشتريت عشر أعداد قدام شويه من
مجلة البيت ودخلت بيهم على ماما

"ايه ده كله؟ دفعني فيهم كام؟"

"إيه يا ماما؟ إنتي كل ما جيب حاجة تسأليني بكام؟"

"يعني دفعني في شوية الورق دول كثير بقى؟"

"يا ماما ده بيت سارة حبيبتك ، يعني لازم يبقى حاجة تانية
خالص"

ماما اليومين دول وشها بيتغير كل ما اجيب سيرة بيتي.
حبيبتى صعبان عليها قوي إني هاسيب البيت مع إني وعدتها إني
هازورها كل يوم بس للأسف حتى كلمة "أزورك" ضايقتها
لأنها حسستها إني هاكون ضيفة فقلت لها " خلاص يا سني
قصدي -الرق لك كل يوم" أما بابا فقالها لي عراحة "لولا إن

الجواز سنة مؤكدة ، أنا كنت رميت عمر من البلكونة قبل
ماياخذك مني!!"

أنا بحب بابا وماما قوي، حتى الواد مصطفى بقى جتلمان
قوي معايا وكل شويه يجيلى شيكولاته وكمان بقى ييوس
إيدي أول ما أصحى من النوم، مع إني بقالي معاه سنين كنت
بأصحى كل يوم فيها عليه وهو بيزعق عشان ماما غسلت
القميص اللي كان عايز يلبسه لثالث يوم على التوالي أو بيهزني
عشان عايز عشرة جنيه وطبعاً كنت باديله خمسة بس!!
بس الحمد لله تصورى الخاص بيتي بدأ يتكون!!!

سارة

"بابا عايز اكتب كتابي على سارة بقي"

فرح أبي كثير! وإن كانت أمي تحفظت لأنها تريد أن يكون
كتب الكتاب والدخلة مع بعض ولكني أنا وأبي كنا الغالبية
العظمى فوافقت في النهاية. مش فاضل إلا حاجة بسيطة
خالص، ألا وهي موافقة عمي!!!! أما بالنسبة لسارة فقد
كانت موافقة بالفعل ولكنها كانت قلقة لأنها تظن أن والسدها
سيعترض. وأخبرتني أن سبب ذلك أن أبي قد يخاف أن أحاول
فرض سلطتي عليها وهي في بيته ويكفي أنه الآن متوتر جدا
لأنها قريبا ستزوج وتترك بيته ولكني طمأننتها وأخبرتها أن أبي
له طرقه الخاصة في الإقناع وأنه بإذن الله سيوافق ولكن علينا أن
ندعو ونصلي صلاة قضاء حاجة.

يمكن السبب اللي اتكلمنا فيه أنا وسارة ورا تعجيل كتب
الكتاب إن أنا وهي بنخرج مع بعض كثير عشان شرا حاجات
للبيت - يمكن كل يوم بعد شغلنا- وأحيانا ببقى عايزين
نروح الشقة عشان ناخذ مقاسات حاجة أو كده وعشان كده
أفضل إننا نبقى مكتوب كتابنا. لكن السبب الحقيقي بقه هو
إن أنا خلاص مش قادر أصير على إن سارة تبقى زوجتي وإن
لو مت بكره هتبقى هي زوجتي في الآخرة - لو ربنا كرمني
ودخلت الجنة . يارب عمي يوافق.

عمر

بعيدا عن كل الأسباب المنطقية و العملية وراء رغبتى فى
التعجيل بكتب الكتاب ،أنا سبي الأكر إن عمر بمسك إيدى
وإحنا ماشين مع بعض !!!

نفسى أقول كلمة "جوزي" أو "زوجي" على رأى فاطمة!
نفسى أخلص من قلقي المستمر من إذا ما كان خروجنا كثيرا
مع بعض به حرج لأننا لسنا متزوجين أم أن الخطوبة تسمح لنا
بذلك. نفسى انتمى لعمر رسميا لاني فى قلبي انتمى له منذ لحظة
رأيتة. نفسى أنجوز بقى!!! ياااارب بابا يوافق علسى كتب
الكتاب ويارب الشقة تخلص بسرعة....

سارة

"أبو عمر اتصل بيا الماردة في الشغل"

"ليه فيه حاجة؟"

"بيستأذن عشان يجي يزورنا الليه دي مع عمر"

"طبعا ما سألتوش ليه؟"

"لا طبعا....بيحوا يا أهلا و سهلا بس....."

"بس إيه؟"

"أنا عارف هما جايين ليه ، أكيد عايزين يخلدوا ميعاد
كتب الكتاب"

"ومالك بتقولها وأنت زعلان كده ليه؟ الحمد لله إنا هنفرح
بسارة وإحنا عايشين ونظمن عليها، وعمر بصراحة ولد
كويس قوي وصالح بإذن الله.....مالك بقي؟"

"ماهم كده ولا كده خلاص هاتجوزوا خلال كام شهر
عايزين يكتبوا الكتاب من دلوقتي ليه؟"

"يا عامر ده أحلى فترة في الجواز هيا بعد كتب
الكتاب...جواز من غير مسئولية و هم بيت و مصروف..."

"ما هو ده اللي قالقني "جواز من غير مسئولية" أنا إيه اللي
ضامن إن عمر هيحافظ على بنتي عقبال الجواز، ماهو ممكن
يقولك دي مراتي..."

" لا لأ لا إنا عرفنا عمر وأهله بقالنا فترة كبيرة والولد
متربي وملتزم وكمان بنتك متربية وملتزمة وما يتخافش عليها،
ولا أنت مش واثق فيها؟"

"ماتغيريش الموضوع، أنا ما بتكلمش عن سارة دلوقتي، أنا
باتكلم عن عمر، أنا مش هارمي بنتي"

"ترمى بنتك!!؟ عامر إنت متوتر قوي روح صلى ركعتين
وادعي ربنا واعمل استخارة وبعدين نتكلم" "طيب ربنا يحلها
من عنده"

والدا سارة

"تفتكر يا يا بابا إن عمي هيوافق؟"

"هو لسه هيوافق يا عمر، ماهو وافق عليك من زمان" (هو ده أبويا تسأله عن حاجة شاغللك يرد عليك في ناحية تانية خالص!!!)

"يا بابا... قصدي موضوع كتب الكتاب"

"يا حبيبي ما هو أنتو كده ولا كده هتتحوزوا بإذن الله، فيها إيه لو تكتبوا الكتاب من دلوقتي؟"

"مش عارف أنا قلقان... عمي مرتبط قوى بسارة وبيني وبينك أحياناً بيتهيألي إنه في آخر لحظة هيقول لي أنا ما عنديش بنات للجواز ويأخذ سارة"

(ضاحكاً) "إيه التفكير العيالي ده ؟ يابني ما أي أب مرتبط بيته بس بردوه بيتمنى يشوفها عروسة عشان يطمئن عليها ، وهما هيلاقوا حد يطمنوا على سارة معاه أكثر منك يا روح قلب أبوك"

(عمسة...) "بابا... بلاش تدليني قدام عمي"

"ليه ياخويا كبرت ولا أیه ؟ أدلعلك براحتی یا عموووري"
(ثم انفجر ضاحكاً)

بابا واثق قوي من أن عمي هايوافق ونفسيته مرتاحة
وبيضحك... يمكن دي أول مرة أحسده في حياتي !!! نفسي
يقي عندي نص ثقته دي. حلها من عندك يارب.

عمر

ياولاد بلدنا يوم الخميس

في بيت ريهام، كنت أقف فوق السرير ممسكة بقلم سميك
كأنه ميكروفون وريهام تقف على الأرض وتطبل على المنضدة
وباقى العصاة على السرير المقابل وعلى الأرض و ...

" ياولاد بلدنا يوم الخميس.. هاكتب كتابي وابقى
عريس... و الدعوة عامة وحتبقى لمة.... والدعوة عامة وحتبقى
لمة.... وحتبقى ليا في البيت ونبيس..... يا ولاد بلدنا" ثم
"هاتجوز..هاتجوز...هاتجوز...هاتجوز"

لم أصدق نفسي عندما وافق أبي على كتب الكتاب الخميس
بعد القادم، يعني بعد عشرة أيام ولا زالت الكلمات ترن في
أذني كأحلى أغنية سمعتها في حياتي " الخميس بعد الجاي
كويس، إحنا مش هنعمل حاجة غير إننا نكتب الكتاب في
المسجد والفرح الكبير بقي في الدحلة" قالها أبي وظللت أقراص
نفسى لكي أتأكد أني لا أحلم. أنا وعمر كنا قلقانين جدا
وأعصابي كانت مشدودة قوى لما جيه هو و عمي ، بس بابا
فاجأنا بموقفه، مش عايزة أقولكم إن عمر قال لي إنه كان هاتجوز
عليه يقوم ييوسه لما وافق!!! بس بس إيد باباه لما روح. عمي
ده زي العسل وكان متفائل من ساعة ما عمر فاتحه في
الموضوع.

كان اللقاء في بيت ريهام لثلاثة اسباب، أولا : الاحتفال
بكتب كتاب الأميرة سارة، ثانيا: إدخال السرور على قلب
جميلة حيث خدعناها لحضور الحفلة ، فادعت ريهام أنها مكتبة
و تشعر بالمرض وتريدنا بجوارها و اتصلتُ بجميلة لتخبرها
بذلك ولكن جميلة كانت تحاول الاعتذار ولكنني كبست عليها
مع هاجر وأخذناها باستخدام العنف في سيارتنا إلى بيت
ريهام!! وثالثا: سنحاول جميعا زحزحة جميلة عن موقفها
الرافض للاقتراح بسمير - أخو جمال - الله يرحمه. حيث مر
على الموضوع ٩ أشهر و أصبحت نفسية جميلة أفضل كثيرا
ولكنها ترفض سمير الذي تقدم لها مؤخرا ليس لشيء إلا لأنه
أخو جمال. وأنتم عارفين ان أنا موافقة على سمير والشلة كلها
وافقت وإن كانت هاجر كانت رافضة الفكرة إلا إننا اقنعناها
ومش فاضل غير جميلة!!!!

سارة

"على بحيرة الله" كانت هذه آخر كلمات عمي بعد أن وافق أبي على كتب الكتاب، وطبعاً أنا ما كنتش متخيل تسهيل ربنا ده كله، "وتفكري العيالي" على رأي بابا كان غلصيني مش سامع طول ما بابا بيتكلم مع عمي غير جملة "اطلع بره يا كلب!" وكان عمي سينطقها في أي لحظة، بس الحمد لله ، بابا طلع على الحق كالعادة وبالنسبة لي أنا فأنا ...هاتجوز... هاتجوزهاتجوز ، أرسلتها بصوتي رسالة صوتية إلى أحمد فاتصل بي سريعاً ليحذرنى ألا أغني أمام سارة لأن صوتي يطفش!!!

احتفلت بي الشلة بأن عزموني على سهرة في الحسين، ظللنا نغني طوالها أغاني الأفراح ونضحك وحاول تامر إقناعي بتجربة الشيخة وحاولت إقناعه بتلوق سمّ الفئران !!!

طبعاً رجعت المنزل في الثالثة فجراً - على غير العادة والله- لأجد أمي تصلّي القيام فجلست بجوارها حتى فرغت ، فقبلتني ودعت لي وأخبرتني أنها كانت تحلم بيوم زواجي من قبل أن أولد. قمت لأصلي أنا الآخر ودعوت الله كثيراً أن يجمعني أنا وسارة في القريب العاجل وحمدته كثيراً على كرمه علينا.

عمر

كنت قد أحييت عمر في الصباح الباكر أني سأكون عند ربهام و أخبرتة بموضوع جميلة وطلب مني كالعادة ألا أتدخل في حياة الناس وجادلته كالعادة ، فجميلة ليست ناس بل هي صديقتي! كنت عازية أقوله إني فرحانة قوى بموافقة بابا بس الغريب إني انكسفت! بس هو قالها وقاللي "...قاللي كلام أحلى كلام ... من بعد ماقاله ما هنام"

نرجع للبنات و الحفلة حيث اتصلنا بمروة بس على الماسينجر عشان نشوف البيبي وهي بتكلمننا، ما هي مروة ولدت وجابت مُعزّ. طالع عيونه سود وشعره اسود ناعم زي ابوه ، للأسف ماطلعش ملون زي مروة بس حلو برودوه!! وإن جميلة بتحب الأطفال بشكل جنوني فقد احتلت الكمبيوتر وظلت ترغي مع مروة حول الاعتناء بمعز وكلام من ده كثير ومن هنا التقطت فاطمة الحيط وبدأت تحدث جميلة عن الأولاد وعن الزواج بعد أن انتهينا من الحديث مع ماما مروة.

ظللنا نتجادل مع جميلة التي كانت تدمع أحيانا إلى أن أفتعنائها إلى حد ما أفما يجب أن تفكر بالزواج وإن لو شخص مناسب اتقدم ليه ماتفكرش فيه ،وسمير شخص كويس، فليه ترفضه من على الباب كده؟! طبعاً ما خرجتش جميلة من عند

ريهام مقتنعة ١٠٠% بكلامنا بس على الأقل إحنا خلياتها
تلين شويه واتفقنا بعيدا عنها إن من المأزده ولمدة أربعين يوم
لازم نوحّد دعائنا في الفجر إن ربنا يفرج همّ جميلة ويرزقها
بالزوج الصالح في القريب العاجل ويلين دماغها وقلبها.
وأنا متفائلة جدا لأننا استخدمنا الاستراتيجية دي كثير
ونجحت الحمد لله.

سارة

ذهبت إلى الشيخ مصطفى الذي كنت أحفظ عنده القرآن منذ الخامسة من عمري وأخبرته أني أريده أن يحضر يوم عقد قراني ليدعو لي وكان سعيدا بي جدا وقبلي وأعطاني ثمرة ذكرتني بأيام الطفولة حينما كان يعطي من يحفظ جيدا ثمرة ومن لم يحفظ يعطيه النواة!

حاسس إني داخل على حاجة كبيرة قوي، مش موضوع الفلوس و تجهيز الشقة بس، طول السنين اللي فاتت بابا كان هو الأساس، باعمل اللي أنا عايزه وقرر قسرات ماتطلعش صبح واحتار كثير بس ماكانش هاميني لأني مش مسئول عن حد. نفسى التجوز سارة بسرعة قوي وعارف إن فيه حاجات حلوة كثيرة مشتاق لها قوي في الجواز ... بس...انا قد كل ده؟ ينفع أبقي زوج وأب إن شاء الله؟ الموضوع ده شاغل دماغى كثير.فكرت أكلّم بابا ..بس بابا ده غير الناس كلها وأنا عمري ما هاعرف أبقي زيه. عايز حد زيني يقولي هو عمل إيه؟ فكرت في (علي) صاحي اللي التجوز من ستين و اهو عنده (شهد) دلوقتي. صحيح أنا وهو بتتكلم كثير بس ماسألتهوش قبل كده عن اللي أنا بافكر فيه دلوقتي.

عمر

استغلت فاطمة فرصة سفر إيهاب في عمل في المنصورة
عشان تحضر الحفلة، وطبعا إحنا استغلينا حضورها عشان
تحكيلنا عن الجواز! فاطمة غير الناس الثانية الغلسة اللي بعد
ما تنتحوز بأسبوعين تقعد تقول "ده الجواز ده قرف ، ده انتسوا
أحسنلکم تقعدوا كده ، بلا جواز بلا نيلة، ده الواحد شايل
الهم" بصراحة الكلام ده كان بيغيطني، يعني هيّ الواحد منهم
مش شايعة حاجة واحدة بس حلوة في الجواز ولا على رأي
ريهام " أصل الشكوى رقة" فاطمة بقي الله يكرمها قالت لنا
إن الجواز حلو قوييسيس ودعتنا كلنا بالسعادة. كنت خايقة
قوي من موضوع المسئولية في الجواز والروتين والملل والكلام
ده بس كان ردها : "بصى ياسنى موضوع الروتين والملل لسه
الحمد لله ماجرتهوش، بس المسئولية ما دام بتتقاسموها مع
بعض بتبقى سهلة وكمال لذيدة، أنا وإيهاب بنقعد آخر
الأسبوع نفكر هناكل إيه طول الأسبوع ونترل نجيب حاجات
البيت مرة واحدة لأنك عارفة إن إحنا الإثنين بنشتغل. ولما
ببقى تعبانة هناكل أي حاجة، ومنين ما يهف على دماغنا نترل
نتفصح نترل ولو كانت الساعة ثلاثة الفجر، بصراحة كأننا
طفلين سابوهم يتصرفوا في حياقم زي ما هم عايزين ، أحلى

حاجة كمان في إيهاب إنه عنده خطة زبي ،عايز يروح الجنة
معها وده مغلينا بنكر دماغنا في حاجات كثير لأن عندنا هدف
كبير"

"يعني مابتخافوش يا فاطمة"

"بتتخافق وبتحذف بعض بالمخدرات و حبسته في الحمام من
يومين عقابا ليه وهو كان قافل موبايله آخر مرة سافر في شغل
عشان كان مأموص مني، بس بردوه بترجع نتصالح و لا كأن
حاجة حصلت ، ماتخافيش و ارمي هموك على ربنا"
"ونعم بالله ، ماشاء الله عليكم يا فاطمة ، نفسي أنا وعمر
ن بقي زيكم"

سارة

"هو من ناحية مسئولية فهو مسئولية كـبـسـيرة"

"الله يطمئنك!"

كان هذا جزء من حوارى المتمر مع على عندما دعاني للغداء فى بيته بعدما أخبرته أنى أريد أن أتحدث معه قليلا وأخبرته عما يدور فى بالى

"يعنى حامس بالخوف مثلا من المسئولية ولا الموضوع ماشى عادى؟"

"يا بـنـى انت مكبر المواضيع كده ليه؟ هو حد فينا فيه فى إيديه حاجة؟ بس انت كويس إنك بتفكر فى المواضيع دى من دلوقتى، لأنى بينى وبينك ماكنش فى بالى حاجة من الكلام ده حتى بعد الجواز لغاية ما جت شهد، وعشان كده (علا) كانت بتشد شعرها بس الحمد لله دلوقتى ربنا هداني وعرفت المسئولية وباحاول أكون قدها أما أنت يا عمر فأنا مش عارف أنت قلقت ليه ده أنت أساسا شخصية مسئولة من أيام ما كنا فى ثانوى ، فاكر لما كنت بتروح بعد المدرسة تجيب تامر من على القهوة و تقعد تكلمه عشان يجي يذاكر معاك عشان مامته وصـتـك تنصحه وكنت عقبـال ماتكلمه أكون أنا ومحمد على

طالبين شيشة إحنا كمان تقوم شاحط فينا كلنا وماشى ، كنا
ساعتها بتتريق عليك و بنقول عليك الحاج عمر. ربنا يكرمك
فى جوازك كده ونشوفك رايح تحب ابنك من على القهوة"
"بعد الشر يا.....ولا بلاش إنت بقيت أب دلوقتي ومش
عايز اهزأك!!"

عمر

قبل كتب الكتاب

"انتي بتعرفي تطبخي يا سارة؟"

"يعني لو مش بعرف اطيخ هتغير رأيك؟!"

"هو أنا كل ما أسألك سؤال عمليتي محضر؟"

"وانت عايزي أجاب بنعم أو لا وخلاص؟"

"تفتكري إحنا ممكن نتخايق دلوقتي؟!!"

"آه طبعا ، ممكن كلام زي ده يقلب بخناقة لو احنا تافهين

كفاية"

"أو متفرزين من حاجة في الشغل مثلا وعايزين نفس غلنا

في بعض"

"صح الكلام ده بيحصل، بس أنا مش عايزاه يحصل معانا،

عشان كده لازم أنا وانت نقرر إننا لو اتناقشنا في حاجة ولاقينا

أعصابنا بتفلت نقوم بعيد عن بعض لغاية ما تهدا"

"أو نغير الموضوع"

"صعب نغير الموضوع واحنا حاميين ، أحسن كل واحد

يقوم يتوضا مثلا ويخرج من موود الخناق"

"تفتكري إحنا هنعمل بيت كويس"

"بلاش يا عمر تتكلم في الموضوع ده لأنني قلقانة قوي
بسيه"

"ما هو أنا كمان قلقان عشان كده قلت أكلملك يمكن
تطميني"

"بص البيت ده هيكون بتاعنا إحنا بس ولو أنا غلطت في
حاجة أنت تسامحي ولو أنت غلطت في حاجة أنا أسامحك
و.....ويس"

"صح ماحدش ليه عندنا حاجة، نعمل اللي إحنا عايزينه
المهم إنه يرضى ربنا"

"ولو هيرضى ربنا يبقى هيرضينا إحنا كمان"

عمر وسارة

فرحت قوى إني اتكلمت مع عمر عن مخاوفي من الجواز
ولقيته هو كمان قلقان. كل يوم بتأكد أنه تسوء روحي.
اليومين دول مشغولة عشان بادور على طقم حلو لكتب
الكتاب ، بس المفاجأة إني صحيت من النوم يوم الخميس
بالليل عشان اشرب لقيت علبة كبيرة في غرفتي، طبعا فتحتها
وكان جواها أحلى فستان ممكن أتخيله.. بابا حبيبي طبعا هو
اللي جابه ..أنا عارفة حركاته دي، زي ما كان يعجبني فستان
ويوم الوقفة بالليل أصحى ألاقى الفستان مع شنطة وجزمة
جنب سريري. بس كنت باحسب إني كبرت خلاص على
الحاجات دي.طبعا أقعدت جنب الفستان أعيط من الفرحة
وبعدين اتسحبت ودخلت غرفة بابا وماما وبوست إيد بابا
وهو نائم وكتبت له على المראה زي ماكنت باكتب وانا
صغيرة " بجهك يا عامر!!"

طبعا الفستان كان مقاسي لأن ماما عارفة مقاسي كويس
وأكيد طبعا كانت معاه وهما بيعشروا الفستان.
وفي الصبح بدري صحيت وحضرت لهم الفطار ودخلت
بيه غرفتهم و صحيتهم بإني رشيت عليهم من برفان ماما
"اصحى يا عريس...اصحى يا عروسة"

(بابا بصوت ناعس) "عريس إيه وأنا بنتي بقت عروسة"

(مصطفى) "وابنك كمان ولا أنا مش هاتجوز"

(ماما) "مش لما تخلص تعليم الأول"

"يووه لسه هاستنى"

كان أحلى إفطار على سرير بابا وماما على الرغم من
اعتراض ماما لأننا سنسقط الطعام على الملاية ولكن بابا أقنعها
بأن قُبِّلَ يدها..

مصطفى: "تفتكري عمر هيجبك قوي كده؟"

اتكسفت جدا من سؤال مصطفى قدام بابا وخصوصا لاني
كنت بافكر في نفس الموضوع ولكني داريت على كسوفي
وقلت "اسمحللى يا بابا اموتلك ابنك!" وجلست فوق مصطفى!

سارة

اتصلت بجون وعصام لأبلغهما موعد كتب كتابي
ولأدعوها له أو على الفرح بحسب إجازتهما وكذلك اتصلت
بعمي ولكن للأسف لن يستطيع أي منهم الحضور بسبب
إجازاتهم ولكن وعدوني بحضور الزفاف بإذن الله.

وسافر أبي إلى البلد ليدعو باقي أهلنا. سارة وأنا مشغولان
كثيرا ولا نتحدث طويلا مثلما كنا نفعل ، ولكن بإذن الله
سنكون مع بعضنا معظم الوقت بعد كتب الكتاب من أجل
تجهيز الشقة التي ستحول غالبا إلى فيلم كارتون بسبب أفكار
سارة ولكن على رأي أمي البيت هو مملكة الزوجة وأنا ماليش
دعوة، بس يارب تسيب لي مكتب صغير عشان اشتغل عليه!!

عمر

كتب الكتاب

على غير العادة استيقظت قبل الفجر بدون أن توقظني ماما،
فتحت عيني ونظرت في الموبايل فوجدت رسالة من عمر

"سكبتك في دمي حلما حنايا القلب ترعاه

فراح القلب في فرح يعني سر نجواه

ويشدو حينا لحنا كطيرا عاد مأواه

سألتك هل ترى يوما سنهدم ما بينناه؟

فقلت بقلبك الصافي:

حبيبي حينا في الله إبحار ...

وفي الفردوس مرساه!!"

أرسلت له كلمة واحدة "أحبك" وجلست على سريري
أدعو الله وأحمده ثم قمت فصليت ركعتين ثم أذن الفجر
فاتصلت به....

"صباح الخير انت صاحبي من امي؟"

"انا لسه مانتش"

"يعني هتنعس بعد كتب الكتاب وتقوللي مافيش خروج؟"

"آه طبعا، مجرد ما هتبقى مراتي هاوريك في الوش الثاني"

"يا ماما!!!"

"دعيني لي واني بتصلي؟"

"وانت إيه اللي عرفك إني كنت باصلي؟"

"مش قُلت لك قبل كده إن عندي بلورة مسحورة"

"لازم تعرف إن أنا كمان هاشترى بلورة مسحورة عشان

أراقبك بعد الجواز"

"يعني تفتكري أنا هاخاف من البلورة بتاعتك ومش

هاخاف من ربنا"

"ايوه كل ما أقولك حاجة تقلب لي على وش الشيخ عمر"

"طبعاً يابنتي، ده أنا إنمارده هاديكي البركة كلها لما

تتجوزيني"

"إنت اللي هاتنول البركة يا حبيبي، روح إلحق بقى صلاة

الفجر في المسجد"

"طيب يا سني عشان يبقى في الفردوس مرساه!!"

ألحق أنا كمان أصلى الفجر وأنام شويه قبل ما البنات يطبوا

عليها.

سارة

شعور غريب ينتابني.. سعادة وقلق وعدم تصديق! لسه فيه
حاجه جوايا مش مصدق إني هاتجوز وأفتح بيت. وكل ما
افتكر الموضوع ده أقلق بس ارجع تاني افتكر اني هابقى مع
سارة لآخر يوم في عمري فأفرح وم أصدقش نفسي. مش
عارف هو أنا أستاهل كل الفرح ده؟ ولا فيه حاجة مش
كويسة هتحصل هتاخده مني؟ بس لأ... ربنا كريم وهو اللي
يسر الأمور لغاية المفاردة، كنت فين وبقيت فين! تمها على خير
من عندك يا ودود. ياترى سارة مستغربة الدنيا زيني كده؟

عمر

متهايل إن هاموت قبل ما يتكتب كتابي على عمر! الفكرة دي مش عايزة تسييني. ماينفعش افرح كده من غير حاجة تعكر صفوي. فافكرة يوم الشبكة بعدها على طول عرفت إن عمر مسافر وغاب سنة وجمع فيها قلبي. باترى اتارده هيحصل إيه؟!

"بس التفكير ده من الشيطان يا سارة" قالتها مروة وأكملت
 "أنا كمان كان عندي نفس الإحساس ساعة جوازى من
 مهند، فأكرة إني فى الأول كنت معجبة بيه ومش عارفة هو
 معجب بيا ولا مش مهمت من الأصل...عشان كده يوم ما
 كلمني وطلب يتقدم لي كان متهيأي إني هاموت قبل ما أوصل
 البيت أقولهم، بس صدقني كل القلق ده وسوسة شيطان، يابني
 خلي عندك حسن ظن فى الله...ده انتي اللي دايما تقولي لي
 الكلمة دي! اتوضي بس و صلي ركعتين و ادعي ربنا يبعد
 عنك وساوس الشيطان ويتمم لكم على خير"

أراحني كلام مروة واراحت أكثر بعد أن صليت. أنا مش مصدقة نفسي أنها هاتجوز عمر الحارده ياااااااااااهووووه!!

ساره

صليت العصر بجوار أبي وعمي والد سارة، ثم جلست
لأختم الصلاة فحذيتي أحمد "يللا بقى هو المأذون هيستناك
لغاية إمتى يا خويا؟!"

كنت أظن أنه سيكون أمامي وقت لأدعو مرة أخرى بعد
الصلاة ولكن فوجئت بأبي وعمي وقد جلسا مع المأذون
والشيخ يجلس بجوارهما وأحمد يسحبني من ذراعي.

"إيه يا عمي مش تاخذ العريس فى إيدك ده باين عليه مش
واخذ باله إنه هايتجوز افهارد!"

عمر

في قاعة السيدات في المسجد كنت هاموت واعرف إيه اللي
بيحصل عند الرجالة. إزاي يعني يكتبوا الكتاب من غير حتى ما
أشوفهم !!! اتصلت بعمر فوجدت محموله مغلق فاتصلت
بمصطفى

"إيه يا بنى إيه اللي حاصل عندك؟"

"هاكتبوا الكتاب ياسارة ،ألف مبروك يا أميري"

اقشعر جسدى عندما بارك لى مصطفى بهذه اللهجة
الحنون. طيب كانوا حتى سابوني أشوف عمر وهو بيردد ورا
المأذون الكلام بتاع الجواز ده.

"يا بنى ما انتي هاتسمعي من الميكرفون عندك كل حاجة"

"يس مش هاشوف "

"ما تقلقيش أصحابي مش سايين حاجة إلا ويصوروها"

"ماأقلقيش...ياااريت"

ده أنا هاموت من القلق، بعد لحظات هترتبط حياي كلها
بعمر، ما عنديش شك إني مش هاحب حد غيره بس ده جواز
يعني هنفضل مع بعض على طوووول. أنا قلقانةأنا
قلقانة.

سارة

جلست بجوار أبي و أمسكت بيد عمي
"زَوْجُكَ ابْنِي الْبَكْرِ الرَّشِيدِ سَارَةُ عَامِرٌ خَلْفَ عَلِيٍّ كِتَابُ
اللَّهِ وَسُنَّةُ رَسُولِهِ....."
الآن تصبح سارة زوجتي .. الحمد لله

عمر

"وأنا قبلت الزواج ها.. بارك الله لكما وبارك عليكما
وجمع بينكما في الخير" سمعت هذه الكلمات ودمعت عيناى،
الآن أنا زوجة حبيبي عمر . الحمد لله

سارة

سحب أحمد المنديل سريعاً واحتضنني أبي ثم عمي وبدأ
الشيخ في الدعاء، بس انا عايز أشوف سارة دلوقتي حالا
ذهب مصطفى ليجعلها توقع على قسيمة الزواج وكان عليّ
الانتظار حتى رجوعه لأذهب إليها.

"مبروك يا عريس....مبروك يا عمر...لاحول ولا قوة إلا
بالله و ادي واحد عاقل اتجنن.. إنت مالك مدهوش كده ليه يا
واد؟" كان أصدقائي بالطبع يحيطوني ولا يكفون عن الكلام!
نفسى أطلب منهم لحظة صمت بس عشان استوعب اللحظة،
بس تقول لين؟؟

عمر

"مبروك يا جيلي ..مبروك يا مدام عمر"

"بجد يا فاطمة أنا بقيت مدام عمر؟"

هاجر" إيه يا سرسور إنتي ماسمعتيش المأذون ولا إيه ؟"

"سمعتة بس مش مصادقة نفسي"

انفجر الجميع بالضحك

فاطمة" فكرتيني بنفسي يوم كتب كتابي كنت عايزة حد
يقرصني عشان أصدق"

مروة " آمال أنا بقه اللي كانت كتب كتاب ودخلت مع
بعض؟"

اتكسفت قوي لما سمعت كلمة "دخلة" مع إني في العادي
ماباتكسفش أحكى مع البنات صاحباتي، بس مش عارفة،
يمكن عشان المرة دي بقى موضوع الدخلة شبه مؤكد! يعني
مش مجرد هزار مع البنات وخلاص.

جاء مصطفى مع أصدقائه "اللي بيصوروا كل حاجة" ومعه
التسيمة ورأيت توقيع عمر فلم أستطع منع نفسي من أن أقبل
إصبعي وأضعه على اسمه ووقعت وبصمت كمان ..

"دى قسيمة دي ولا فيش و تشبيه؟"

مصطفى "عشان يتأكدوا إننا مابدلناش العروسة!"

قبلتني أمي واحتضنتني والدموع تملأ عينيها

"مبروك يا سارة مبروك يا حبيبتى كنت بأحلم أشوفك

عروسة الحمد لله .. الحمد لله"

مي "إيه يا طنط إنتي كان عندك شك إنها هاتتحوز ولا

إيه؟؟!"

هايدي "ألف مبروك يا طنط عقبال ما تفرحي بعيالها"

كان الجميع يتبادل التهاني وأنا أحاول الاتصال بعمر ولا

يزال المحمول مغلقا... إيه الرخامة دي هو قافل الموبايل ليه؟

وفجأة سمعت مروة أخت عمر تقول "العريس جاي" و انماالت

الزغاريد

دخل عمر وهو ينظر إلى الأرض .. مكسوف يا عيني وسط

حشد البنات ده! دفععتني جميلة ناحيته وقالت "روحي سلمى

على جوزك بقى وبوسيه"

"أبوسه إيه الله يخرب بيتك!"

"يا سلام ! ما نتي كان نفسك تبوسيه من ساعة ما
أتقدملك"

"لمي نفسك بقه لحسن يسمعك"

"مايسمعني هو مش جوزك!"

استعادت جميلة روحها المرحه بشكل كبير بس مش على
دماغها! كسفتي خالص لما قالت لي أروح أبوس عمر!!
نظرت إلى عينيه فابتسم أجمل ابتسامه رأيتها في حياتي، أول
ابتسامه من "زوجي عمر"

عمر" ألف مبروك عليا يا سارة"

سارة"ألف مبروك عليا يا عمر" ورفع يدي وقبلها وارتعش
جسمي بأكمله وأحمر وجهي..

"دى اتكسفت ووشها أحمرًا" كانت هذه ربهام بالطبع
فهي لن تترك مثل هذه الفرصة للتعليق.

"حط إيدك على كتفها يا عريس عشان آخذ لكم صورة"

منك لله يا جميلة .. يحط إيده على كتفي إزاي يا رحمة!
نحرج عمر من وضع يده على كتفي فصاحت "ما انت خلاص
بقيت جوزها حط إيدك بقى عايزة أصوركم"

فوضع يده وصوّرتنا. كنت مكسوفة قوي بس كنت
مبسوطة قوي!!!

"طيب ميلي براسك شويه عليه كده"

"لا"

عمر "خلاص بقي يا جميلة كفاية عليكى صورة وبقية
الصور يوم الفرح إن شاء الله"

يوم الفرح هو فيه يوم فرح أحلى من الماردة!؟

سارة

طلع مافيش فرق بين البنات والولاد. سبت أصحابي
وتعليقاتهم في المسجد لقيت صديقات سارة مش عاتقنيها.
شعور رائع انتابني وأنا أقبل يدها كأني أخيرا اكملت وملا
الدفء قلبي، أردت أن أحتضنها ولكننا بالطبع كنا في المسجد
وكمان مش عارف هيكون رد فعلها إيه؟ خصوصا إنها كانت
مكسوفة لمجرد إني حطيت إيدي على كتفها وإحنا بتتصور.
فكرة واحدة ضابقتني في اللحظة دي وهي إني برودو في آخر
اليوم هروح لبيتي وسارة هتروح لبيتها، ياسلام لو كان الواحد
معه مصباح علاء الدين وكانت الشقة تخلص في لحظة!!!

عمر

مش عارفة إيه موضوع الكسوف ده، أنا دائما باكون
مرتاحة قوي في وجود عمر وأنا اللي بقعد أفكر إني نفسي
أبوسه أو أمسك إيده!! بس بعد كتب الكتاب بقت حتى
النظرة في عينه بتكسفيني .. حاسة وكان وشي يطلع سخونة
من كتر الخجل، بس عمر عادي ويتعامل بطبيعة قوي وكأنه
عادي كده إنه يمسك إيدي ويحط إيده على كتفي.

ظللتنا ممسكين بإيدي بعضنا في المسجد حتى ناداه مصطفى
ليذهب إلى قاعة الرجال ، فضغط على يدي فظننت أنه
سيقبلها مرة أخرى قبل أن يغادر ولكنه مال عليّ وقبل خدي
قبلة سريعة.. وظللت حابسة أنفاسي حتى رأيته يغادر القاعة
نهائيا و تجمدت تماما حتى عندما تجمع البنات حولي، كنت
في وادي تاني خالص!!!!

سارة

تجهيزات الشقة

نطقت الشقة بعد وضع السراميك وطلاء الجدران. كنا قد حولنا الغرفة التي تطل على الشارع والصالة إلى ريسييشن واسع نسيًا، تم طلاؤه باللون الأبيض .
"هناك الصالون لجوء والأنتريه على الشارع والسفرة في النص..."

"طيب انني استقرتني على رأي في موضوع الأنتريه، الراجل صاحب المحل عايز يعرف هتاخدي أنهي واحد من الأثنين اللي عجبوكي"

"بصراحة الإثنين يجننوا، نروح مرة كمان ونقرر..."
"حرام عليكى كل أوضه عشان تختاريتها بتقعدي تدوري قد كده ولما تعجبك حاجة تقعدي تفكري وتشوفها ميت مرة قبل ما ناخذها"

"طبعًا بابني ده بيت لازم يبقى فظيسيسع"
"فظيسيسع!!؟"

"طيب وأوضة النوم هستلمها إمتى؟"

"بعد بكرة، بس خلصي انتي بقى اختيار ألوان التنجيد، أنا
ماكتتش عارف إن ده كمان فيه ألوان وأشكال"

"ليه يا بني هي دى أول مرة تفتح فيها بيت ولا إيه؟!!!"

"لأ بس كل مراتي التانيين ما تعبونيش قوي كده!!!"

"مراتك؟!! طيب إمشي قدامي يللا قبل ما أرميك من
البلكونة!!!"

"طب حاولي كده!"

"أحاول إيه؟ أرميك من البلكونة؟ يابني أنا مش عايزه
أستخدم معاك العنف من دلوقتي عشان ما تخافش مني"

"لأ لأ عشان خاطرني استعماله يللا... وربي كده هترمي
من البلكونة إزاي؟"

"لأ خلاص بقىالطيب أحسن"

"طيب أنا بقى اللي هارميكي من البلكونة"

طبعا جريت قبل ما يحاول يشيلني وأنا أصرخ وأضحك
وذهبت للمطبخ لأقف وراء طنط التي كانت تحدد مع ماما
طريقة تنظيم المطبخ وقد تركت هذا الموضوع لهما لأن المطبخ

عندنا وعند طنط منظم صح وأنا ماعنديش فكرة قوي عن
الموضوع ده.

"ماما أنا عايزه نخط الغسالة تحت الحوض زى عندنا عشان
نوسع المطبخ"

"ما أحنا عملنا وصلتها بخلاص يا سارة وهتبقى مطرح مسا
انتي عايزة "

" وأنا يا ماما عايز التلاجة في أوضة النوم"

" إيه؟؟!"

"سيبك منه يا سارة ده بيهزر"

"لأ ماهزرش.... أنا ليه لما اصحى من النوم أروح لغاية
التلاجة عشان أشرب و لا أكل"

" لأ حوش الواد بياكل قوي"

عجبي رد طنط قوي و انفجرت ضاحكة حتى اغتاط عمر
"طيب تعالى يا سارة عشان تقولي رأيك النهائي في أوضة
الأطفال"

آآآآ.. جالك الموت ياتارك الصلاة، إنه وقت الانتقام!!!

سارة

مش عارف أنا كنت هاجيب منين فلوس لو ماكتش
سافرت، الواحد ماكتش متخيل كل المصاريف دي. أي حاجة
أحط لها ميزانية ألاقيني دفعت ألفين جنيه ولا أكثر فوق اللي
كنت مخطط له. سارة كمان بتقعد تحسبها معايا بس برردو
بنلاقي حاجات كتيرة صغيرة بس بتكلف. وكل ماتلاقيني
متضايق شويه من غلا الأسعار تقول لي "بس الحمد لله إن أنا
جبت الكيتشين ماشين في الرخص!" وكأن الكيتشين ماشين
بتاعها ده هو أساس البيت مثلا، ولما سألتها يعني ده لزمته إيه؟
قالت لي "عشان نتمنظر بيه!!!" أحلى حاجة فيها أنها
مابتشيلنيش هم حاجة و كل ما تحس إنها هتقلب بغم تقوم
تقلبها هزار وضحك مش عارف لو كنت نحدث واحدة جد
قوي كنت هاعمل إيه!!

عمر

طَيب قوي عمر ... حسيت قوي بالموضوع ده في
خروجاتنا الكثير عشان شرا العفش وحاجات الديكور،
يتعامل مع البياعين بذوق قوي ومايحش الفصال ودي نقطة
خلاف بينا لأن أنا باحب الفصال. ودايما يهدي بالعريية
ويعدي أي حد في الشارع ومايردش على أي حد يقوله كلمة
سخيفة وهو سايق..هو غريب قوي في الموضوع ده لأنني أنا
باشيط بسرعة وهو هادي قوي. بس يردو حِمَش قوي!!! مرة
كنا في محل أثاث كبير وكان هو بيتفق على سعر أوضة
أخترناها ودخلت أنا اتفرج في ركن الديكورات راح ولد من
اللي شغالين في المحل معاكسن بكلمة ولسة هادور عشان ارجع
لعمر لقينه في ضهري ومسك الواد بمدله وجاب مدير المحل
وقعد يزعمق له هو راخر عشان "مشغل عندك أشكال زي دي"
واعتذر له المدير وصاحب المحل كمان وكانوا مش عارفين
يعملوا إيه عشان يرضوه. أما بقي موضوع الكرم ده فأنا
عارفاه من زمان. أحيانا أقعد مع نفسي وأبقى مش مصدقة إن
فيه حد بيحيني قوي كده ، لدرجة إني أحيانا أتخيل إن كل ده
هيطلع حلم.. مش مصدقة إن فاضل أسايب وأكون مع عمر
للأبد.

سارة

"طيب والفرح الصباحي ده يكلف أكثر من الفرح العادي؟" سألني أحمد بعد أن أخبرتته عن شكل زفافنا كما خططت له سارة. "يعني ما فرقتش كثير، سارة أصلها متأثرة بالأفلام الأجنبية اللي بتحبها وعازية فرح مليون بلالين بيضا ووردي وحاجات كده"

"بس تعرف كده أحسن عشان تروحوا بدري وتبدأو اليوم من أوله!"

"هو انت يا أحمد مافيش في مخك غير الحاجات دي؟!!"

"يعني هو أنت فيه في مخك حاجة تانية؟!!"

"بس.. بس، المهم إني بافكر إن الشيخ عبد العاطي يجي بردو ويدعي لنا في الدخلة"

"حلو بردو، الواحد بيبقى محتاج الدعاء في يوم زي ده"

"أنا نفسي إنك تتحوز بقى عشان أطلع عليك كل ده"

"أنا اتحوز؟!!! أبدا"

طبعا أحمد ماكنش عارف إن سارة منشنة عليه عشان تاخذه واحدة من صديقاتها، بس مش هاقوله لحسن ما يحضرش الفرح!

عمر

فاضل أسبوعين على الدخلة..فاضل أسبوعين على الدخلة..
بأحاول أكرر الجملة يمكن استوعبها واصدقها! اتفقنا أنا وعمر
إنه يجي مع أصحابه وشباب عيلته عشان يفرشوا الغرف
ويرصوا الحاجات الثقيلة وبعدين هاجي أنا وعيلتي وصديقاتي
نوضّب ونكمل الفرش ونمسح الشقة وقبل الدخلة بيوم نمسحها
تاني عشان التراب. اليومين دول الصداع مش سايبني بسبب
القلق من إنا مانلحقش نخلص فرش قبل الفرح لأن كل شوية
نلاقي حاجة ناقصة ده غير الحاجات اللي بتكسر أثناء النقل،
أعصابي ساية خالص ولسه كمان قدامي قبل الفرح موضوع
الكوافيرة والتجهيزات الكثيرة إياها.حاسة إن الدنيا ادربكت
على دماغني وعمر آخر روقان، لأ وكمان جاي إمبراح يقول
لعي أفكر في إني أسيب الشغل. أنا ناقصة كمان كلام في
مواضيع زي دي، هو عارف إني باحب شغلي ومش عايزة
أقعد في البيت، لما ربنا يسرها ويبقى عندنا عيل هاشوف إذا
كنت محتاجة أقعد خالص ولا هاتصرف، خصوصا وإن ماما
وطنط موجودين ربنا يخليهم. وأساسا أنا مش ناقصة منه كلمة
من ساعة ما زعل عشان رحت السينما مع أصحابي من غير ما
أقوله. اتصلت بيه ساعتها كذا مرة وموبايله كان مقفول. يعني

إيه عايزني أوقف حياتي كلها لغاية ما يبقى فاضي ويديني
الإذن، لأ وكمان يقول لي مارحش السينما إلا معاه، أنا لولا
إني مشغولة وتعبانة كنت عملتها خناقة، بس شويه كده لما
افضالك يا عمر!

سارة

شوية توتر قبل الدخلة

سارة متغيرة اليومين دول مع إن مش فاضل غير أسبوع على الدخلة. مابقتش تضحك وبتتحجج إنها مشغولة في الفرش مع إنها في العادة بتكون بشوشة حتى وهي تعبانة. وكمان لاحظت إنها بتقول لي يا "سي عمر" ودي إشارة مش حلوة لأنها لما بتكون راضية عني بتقول لي "يا عُمرِي". الغريب إن المفروض أكون أنا اللي زعلان، لأنها خرجت وراحت السينما مع صاحباتها من غير ماتقول لي عشان موبايلي كان مقفول. طيب ما تأجل الخروج ولا تلغيها خالص، يعني هي لو قالت لي إنها عايزة تروح الفيلم ده ما أنا كنت هاخذها ونروح مع بعض ولا هي بتحب تخرج مع صاحباتها أكثر مني. لأ وكمان موضوع إنها تسبب الشغل، مارضيتش حتى ترد عليا ساعة ما كلمتها. بس أنا باقول بردو يمكن تكون أعصابها تعبانة قبل الدخلة.. بس بردو الموضوع ده مايتسبب كده.

عمر

بقالى يومين ما بنمش مع إني باكون مهدودة لما بادخل
سريري، بس الحمد لله إهمارده خلصنا فرش وبكرة هانمسح
الشقة ونبقى كده خلصنا. رجعت مبسوفة لأن جميلة قالتلى
إنها هتتخطب قريب، ماكتتش مصلقة وخصوصا لما قالت لي
مين العريس. لما كنا فى الجامعة كان عندنا معيد شاب كنا
معجبين بيه كلنا وماشاء الله عمل الدكتوراة وهو صغير وبقى
دكتور خالد وإحنا فى رابعة كلية وافتكروا إني سمعت إنه خطب.
المهم إن (هاجر) كانت فى الكلية من فترة بتخلص ورق عشان
الماجستير بتاعها وقابلته وقالت له عن أحوال الشلة وإني
هاجتوز قريب وسألها عن جميلة وأخبرته عن وفاة جمال وعرفت
منه إنه فسخ خطوبته من كام شهر. وأخذ منها نمرة جميلة
عشان يعزبها مع إن هاجر قالت له إنه أحسن مايعزبهاش
دلوقتي عشان ماتفتكرش خصوصا وإنما بدأت تفوق دلوقتي.

جميلة بقى قالت لي إنه اتصل بيها وسلم عليها وسألها عن
أحوالها وقعد يتكلم على الموبايل حوالي ربع ساعة وقعد فترة
يرسل ليها رسائل ديني أو تهنتة فى المناسبات ويعلمين لقيته

جميلة كانت فرحانة قوي خصوصا لما عرفت منه إنه كان
يبيحها من أيام الكلية، بس طبعاً جميلة كانت ساعتها مرتبطة
بجمال. ياسلااااااام ، ربنا ودود ولطيف قوي معانا مساكنتش
مصدقة إن جملة هترجع تفرح قوي كده ثاني.

"حاجة إيه يا بني ؟ ما إحنا خلاص فرشنا ومافيش حاجة ناقصة"

"إزيك"

"طيب أشرب الحاجة الساقعة"

"هنشرب بره"

وصلنا الزمالك وركن عمر العربية ومشينا وبعدين لقيناه
ماسك إيدي وداخل مطعم صغير كده معمول على الطراز
الإسلامي.

"يا بني فين المحل اللي بتقول عليه"

"تعالى بس" ودخلنا ووجدت ترايزة محجوزة لنا وعليها
بوكيه ورد.

"إيه ده كله، اهازدة مش عيد خطوبتنا"

"لأ زي اهازدة ربنا رضى عني وكرمي وفانتني ماما في
موضوع ارتباطي بيكي"

"بتقول إيه" وكأن كل ضيقي وتوتري اختفى في فمتو ثانية!
ماقتش عارفة أقول له إيه . فوجدته ممسكا بيدي فرفعت يده
وقبلتها.

سارة

كنت عارف ألما عندها شيء من ناحيتي . كنت أنا كمان
واخذ على خاطري ولكن افكرت وصية رسول الله "استوصوا
بالنساء خيرا" وقررت أبدأ أنا.

طبعا كانت مقابلتها ناشفة قوي بس بردو قلت أصير.
وأخذتها عشان حتفل بذكرى مفاخرة أُمي لموضوع زواجي
منها، هو بصراحة أنا ما كنتش فاكرا التاريخ بالظبط بس قلت
أقولها أي حاجة عشان تبسط!! بس اللي عمري ما تحيلته إني
لما مسكت إيدها في المطعم ألما تقبل يدي. ماصدقتش إن سارة
تعمل كده وغرقت يديها بالقبيلات حتى أحمر وجهها وطلبت
مني التوقف لأن الناس ينظرون لنا.

"مايهمنيش الناس...أنا مايهمنيش غيرك إنتي وبس"

"وأنا كمان ما عنديش بعد ربنا غيرك"

"أمال كان مالك اليومين اللي فاتوا دول؟"

"ما فيش"

"ما فيش؟ مش إنتي اللي دائما بتشتكي إني ماباتكلمش لما
بأبقى زعلان وإننا لازم نفضفض لبعض على طول ونعاتب
بعض لما نزعل من حاجة عشان مانبقاش شايلين من بعض"

تهدت ثم أحابت "يعني انت مش عارف أنا زعلانة من إيه؟"

"لا" ما جيتش أقولها إن انا اللي زعلان

"إنت controlling قوي يا عمر وأنا مايجيش كده"

"أنا !!! ليه يا جيبتي"

"ماخرجيش غير بلاذني.. ماتروحيش السينما مع صاحباتك.. سبي الشغل.. كل ده وأنت مش controlling؟"

"ياحبيبي أنا ماقلتش تستأذيني، بس قلت تديني خير، يعني إنتي مابتقوليش لباباكي إنتي رايحة فين قبل ما تخرجي"

"أيوه باقول بس لو أنا بره بعد الشغل مثلا ورايحة مشوار قصير باروحيه وأقله بعدها أو أتصل بيه وإذا ماعرفتش أوصله مايزعلش زي انت ما عملت"

"بس أنا مازعلتش بعدها.. أنا اتكلمت عادي وانتي اللي كنتي زعلانة، وبعدين بالنسبة لموضوع السينما.. أنا فعلا باخاف عليكى تروحي مع أصحابك لحسن حد يضايقكم"

"ما أنا طول عمرى باروحي معاهم وماحدش ضايقنا"

"الحمد لله، بس أنا بردو هابقي قلقان عليك، قلقي عليك
مايهمكيش؟"

"طبعاً يهمني ... بس أنا خفت"

"خفتي؟"

"أيوه أنا مش عارفة إيه اللي هأحصل بعد كده وخايفة
أحس إنك بتأمرني وأنا ماباحش حد يأمرني"

"إزاي أأمرك وأنتي أميري؟ خلاص يا حي أنا آسف لما نتحي
تروحي أي مشوار روعي براحتك بس أ بقي طمئني عليك"

"وأنا مش هاروح السينما تاني غير معاك بس توعدني
توديني كل ما يتزل أي فيلم باحبه"

"ماشي كلامك!!"

"ايه بقي موضوع الشغل ده"

"ياروحي أنا بس شايفك السومين دول تعبانة عشان
بتروحي الشغل وبعدين تطلعي على الشقة ففكرت إنك بعد
الجواز هيبقي وراكي حاجات كتير ويمكن تنعي من كل ده"

"ليه هو انت مش ناوي تساعدني في شغل البيت، ما أنا
باشوف عمو يساعد طنط حتى في غسل المواعين"
"طبعا مساعدك يا سني بس أنا عامل على تعبك"
"لأ أنا باحب شغلي وأنت عارف كده"
"خلاص اللي تشوفيه"
"أنا مش عايزاك تكون زعلان"
"لا والله مش زعلان، هو أنا أقدر؟!"
"لأ طبعا ماتقدرش!"

رجعت سارة تضحك كعادتها وأخبرتني أن جميلة ستُخطب
وأنها سعيدة بشدة لأنني سأكون معها في هذه الخطوبة لأنها
كانت تفتقد وجودي في مثل هذه المناسبات حينما كنت
مسافرا. وأخذتها بعد العشاء لشئ شيء الذي أخبرتها عنه.

عمر

- ۲۷۵ -

الفرح بكده

بالرغم من أني دعيت كثير عشان يجي اليوم ده وكنت
مش صابرة، إلا إني دلوقتي حاسه إنه جه بسرعة وإن كل اللي
عدى مش أكثر من ساعة. لسه فاكرة أول مرة شفت فيها
عمر وأول مكالمه تليفون وأول رسالة موبايل وأول هدية.
يمكن المشكلة الوحيدة الماردة إني فعلا مش مصدقة إن أنا اللي
هتجوز، وكأني بتفرج على اليوم من بره وحد تاني هتجوز،
ده غير إني بصراحة قلقانة قوي من موضوع الدخلة والكلام ده
بس بأحاول انسى تماما الموضوع ده دلوقتي!! حاسه إن غي
مهنج وكان كل حاجة ماشية بالتصوير البطيء حواليا. غريبة
قوي إني مش حاسه إني طيارة من الفرحة زي ما كنت متوقعة
إن ده هيكون إحساسي يوم جوازي!

سارة

يمكن ما كنتش عصبي في أي يوم في حياتي قد انهارده
لدرجة إني ماخدتش بالي إني ماضحكش ولا حتى بابتسم لغاية
ما علّق تامر صاحبي "إيه يا بني هما غاصينك على الجسوزة ولا
إيه؟" قدامي حاجات قد كده، أروح اجيبها من الكوافير
والفرح وده لوحده موال وبعدين التصوير وبعدين.....

صحيح هيتقفل عليا أنا وسارة باب واحد انهارده؟! صحيح
هاخذها في حضني؟! صحيح هاصحى كل يوم اشوفها نائمة
جنني؟! كل ضحكها وهزارها هيكون معايا؟ صحيح كل
خططنا هتكون مع بعض؟

ياترى هافضل مع سارة لغاية ما أموت ولا الدنيا مخيبة لينا
إيه؟ إيه يا عم التفكير المنيل ده؟!

عمر

في اللواقيح

"أنا زهقت خلاص... حد يشوفلنا التكيف ده"

هاجر: "أنا قلت للبنت وقالت لي إنه شغال بس عشان
عددنا كبير مش مآثر قوي"

"طب قولوها تخلص بقي مش عايزين نتأخر، المفروض
نمشي من هنا قبل العصر والساعة بقت ٢"

كنت في قمة عصبيتي وأنا في الكوافير، فجأة حسيت إن
الفيستان مش عاجبي مع إن كل صاحباتي قالوا إنه تحفة عليها،
وكان ماعجنيش الماكياج ورحت غسلت وشي كله...قلت
لها عايزة ماكياج بسيط قوي ما يبانش ودي بردو عملتسهولي
زي عروسة المولد.. وكان ريهام هانم ماجتش لغاية دلوقتي
وعمالة أرن عليها تليفونها غير متاح.

(وأخيرا جاءت ريهام)

"مابدي ياخوتي .. باباكي قاللي إنك خرجتي من الساعة
١٢ كل ده كنتي مين؟"

"طيب هاتي بوسة الأول؟ إيه يا فاطمةإيه يا مروة
مالكوا مزعلينها كده ليه؟"

فاطمة: "هيا اللي عصبية من الصبح ومش مبطله زعيق"

"معاكي مسكن أنا دماغى هتفرقع؟"

ريهام: "مسكن إيه يا سارة دلوقتي"

"لتحبي مسكن لتروحي تشتري شريط كيتوفان من
الصيدلية"

مروة: "خلاص ..خلاص أنا معايا بنادول"

فاطمة: "خدي نفس عميق واهدي بقى، لحسن لو عمر
شافك بالشكل ده هيفير رأيه"

هاجر: "ماتقوليلهاش كده يا فاطمة لحسن قلب فيكي"

"ليه أنا كلب عشان أهب فيها يا رحة"

مروة "معلش معلش أنا عارفة هسي متوترة كده
ليه، ماتخافيش يا سارة الليلة هتعددي على خير ولو تحي ممكن
أديكي منوم تحطيه لعمر في العصور!"

هاجر: "لا .. منوم إيه إحنا عايزينه صاحى ولا إيه يا سارة؟!"

"بقولكم إيه ماحدش بكلمني في الموضوع ده"

ريهام: "خلاص إهدي لإما هاديكي بوكس يخلصنا من زعيقك"

فاطمة: "إيوه يا ريهام إحنا كنا محتاجينك من الصبح لحسن دي ماحدش بيقدر عليها غيرك"

سارة وصديقاتها

أحمد: "يا بني إزاي تستحمي لوحدك في يوم زي ده،
المفروض إصحابك يحموك!!"

عادل "نحمي مين ياعم، ده بياخد حمام طيبني زي سيد
قشطة"

محمد: "بس يا ولا يا عمر أحننا جنبالك حتة برفان هينخلي
العروسة يغمي عليها إن شاء الله"

أحمد "بس يا جزمة! برفان إيه ..إحننا جنبالك"
(يدخل أبي)

"إيه يا ولاد عاملين إيه،عقبالكم كلكم ماعدا علي طبعاً"
"ليه ياعمي مايمكن أتجوز مرة كمان!"

"طيب يا لمض، يللا بسرعة عشان نلحق نصلي العصر في
الفندق قبل الفرح..أنا لسه مستغرب موضوع الفرح الصباحي
ده"

عادل موضه ياعمي وطالعة ...بعد كده هيعملوا الفرح بعد
الفجر"

"خلاص بابا يا دقيقة وهاكون جاهز"

"طيب أنا هانزل أنا ومامتك وعمك ومرات عمك في
عربي ومرو وبقية بنات وشباب العيلة هاسيحوا في عربية
عمك ومراته والباقي هسبحوا مواصلات بقي أو في عربياتهم"

"طيب يا حبيبي"

(يخرج والد عمر)

تامر: "المهم يا واد يا عمر عايزينك اتفارد ترفع راسنا!"

علي: "يا بني بلاش تضغط عليه الحاجات دي عايزه الواحد
يقي ريلاكس"

محمد: "هتعمل علينا حكيم الزمان عشان اتجوزت يا خويا"

علي: "طبعاً يا بني، اتفارد أنا الأب الروحي ليكم كلكم"

أحمد: "سيك من العيال ال.....دي و ركز معايا هنا
عشان اربطلك الكرافة ونخلص"

لقيت إن أحسن طريقة أعملها معاهم إني ما أردش لأفهم
كده ولا كده مش هيبطلوا كلامهم ده.

لما شفت نفسي في المراية حسيت إني عريس فعلا وحسيت
بالفرحة الحقيقية بترقص في قلبي أنا هاتجوووووووووز
ودلوقي ألحق أنزل عشان آخذ سارة من الكوافير لحسن لو
أتأحرت هتزعل وأنا مش عاجزها تزعل إمباردة خا!!!!!!للص!

- ۲۸۲ -

بعد ما راق الصداق هديت و حسيت إن عايضة أنام! أنا
ماغتش من إمبراح غير ساعتين، كويس برودو عشان بعد الفرح
أروح في النوم على طول!! اتصلت بعمر لقيتيه في السكة،
كويس إنه ما أتأخرش لإما كنت "هييت" فيه على رأي هاجر
ولولا كمان إن هايدي جت مع بنتها "جنا" كنت فرقعت
عقبال ما يوصل

هايدي: "الفسطان زى اليونانية عليكى يا سارة"
"بجد والله... مش عارفة اقبالي دلوقتي إنه مش قد كده"
هايدي: "انتي اصلك عبيطة ده كفاية الطرحة شكلها جديد
قوي"

هاجر: "دى طلعت عينينا عقبال ما اختارت الفستان ده يا
دودي"

ريهام: "وفى الآخر جابته من الأتيليه اللي على أول شارعنا
،مع إن قتلها عليه من الأول بس تقولي إيه لازم تلف أنحاء
جمهورية مصر العربية من مصر الجديدة للهرم عشان سارة
هاتم"

"اعترضي بقى؟"

ريهام: "لو اعترضت ماكتش صمدت معاكى ١١ سنة
ياختي"

مروة: "بس أنا حاجة جانا لمعز يا هايدي"

هايدي: "خديها ياختي من دلوقتي لو عايزة، امسكها يا
سارة عشان تنولي البركة"

"لحسن تعملها عليا"

هاجر (وهي تحملها) "العسل دي تعملها طيب مش
هاتاخديها"

فاطمة "لا لا شيلها يا سارة عشان تجي بنت حلوة زيها"

ريهام (ضاحكة) "هي هتروح من دلوقتي؟ ده لسه الواد
مامسكش إيديها"

"أمال فين ريمونده وليليان ونسرين ورشا وقيست العيال
بتوع الشغل"

هايدي "ريمونده اتصلت بيا وهايقابلونا في الفندق عشان
هيطلعوا من الشغل نص يوم"

فاطمة "طبعاً ما سيادتك عامله الفرحة الصبح"

"طب وجميلة فين"

ريهام: "مع دكتور خالد طبعاً!... هاتيحي معاه على
الفندق عشان هيوصلها مع باباها ومامتها"

"أه صحيح دى قالتلى كده لما كانت عندي امبارح"

(يرن التليفون)

"ده بابا.. أيوه يا حبيبي إنت فين.. أنا كويسة.. آه معظمهم
معاييا في الكوافير.. لأ بنات عمي وخالي في الفندق عشان
بيضططوا حاجات كده.. عمر لسه ما جاش.. ماما ليست ولا
لسه.. ومصطفى.. يا سلام! طيب يا روجي خد بوسة باي"

ريهام: "ده عمو... كنت عايزة أسلم عليه"

"إنتي مش خلاص اتخطبتى لسه حاطة عينيكى على بابا!"

(يرن التليفون مرة أخرى)

"ده عمرا! أيوه يا حبيبي"

ريهام: "هأكام حبيب؟!"

"أيوه خلاص جاهزة.. تعالى بقى" نظيرة أخيرة في

المرأة.. أنا بقيت عروسة! أنا فرحانة قوي قوي قوي!!!"

(تخرج سارة إلى الغرفة التي ستقابل بها عمر وحولها نصف
أمة لا إله إلا الله من البنات لتقبله وحوله باقي الأمة من
الشباب)

على الرغم من الزحام لم أر غير عمر..الجميع مجرد ديكور
لا داعي له يحيط بجبي لم يكن مبتسما ولكنه أهملني أهمل
ابتسامه حينما رأي و أسرع نحوي و أمسك بيدي
"مايجي فرب وسط الزحة دي؟"
"ماشي موافقة!"

"طيب تعالى نكمل بقية الخطة في العربية!"

لم أعد أعني شيئا حتى أني نسيت أن ريهام ستأتي معنا في
سيارة الزفاف وذهبت مع عمر الذي حوطني بذراعه في طريقنا
إلى السيارة المغطاة بالبالاين الوردية و البيضاء و الورد الصفراء
طبعاً! ودخلت السيارة بينما انحنى عمر ليضع باقي ذيل الفستان
بالسيارة..أعصابي كانت ساوية لدرجة إنني ما أقدرتش أساعده.

سارة

لغاية ما وصلت للكوافير كانت أعصابي متوترة خصوصا
مع زحمة أصحابي وقرايبي ولقيت نفسي باطلع الموبايل وأقلب
في رسائل سارة وكان آخرها (عصبي بعث كروت فرح كتب
عليها: الزفت اللي جاي مانتأخرش واللي مش جاي في ستين
داهية والكلاب الصغيرة تترزع في البيت والحق مش عليك
الحق على الواطي اللي عزمكم) حتى وهى مش موجودة
بتضحكني... يمكن دي من أحلى الحاجات فيها إن مجرد تفكيري
فيها يفرح قلبي.. ياترى هيّ كمان فرحانة بيا كده؟ ياترى
بتحبي قد ما باحيتها؟ أحيانا بيتهيألي إن سارة بتحب كل الناس
في الدنيا !

واحشاني قوى مع إن كلمتها من دقائق.

(في الكوافير)

إيه كل الناس دى، سارة عازمة كل بنات البلد ولا إيه؟!
وأخيسسيرا سارة
صحيح القمر دى مراقي؟!

عمر

وأحييت العم حلم جميل

مساحة خضراء واسعة وأكثر من ٣٠٠ بالونة بيضاء
وصفراء ووردية وزهور من جميع الألوان وورد بلدي وأهلي
وأصحابي وعمر.. أفكرت الجنة ساعتها، كان فرحي حته من
الجنة! عمر كان ممسكا بيدي ثم جاء أبي وأمي وقبلاي
واحتضنتني ماما (هو عمر فين؟) كان والده يحتضنه بشدة
هو الآخر ثم خفي من أمامي.

سارة

بالإتفاق مع ريهام وجميلة وأحمد رتبت كل شيء .. وقفت
جميع البنات صفا وجميع الشباب صفا يقابلهم و اصطحب
عمي سارة إلي . كان يمشي ببطء للدرجة أني أردت أن أسرع
نحوهم و أخذها بقي! وعندما وصلت قُبلت عمي وأخذتها
وبدأت الموسيقى الخاصة بالرقصة الأولى وكانت الأغنية من
اختياري .

عمر

إيه الصفين اللي وقفوا دول أنا ما اتفقتش على الموضوع
ده! تأبطت ذراع بابا ومشينا نحو عمر الذي كانت ابتسامته
تشرق زي قمر ١٤! عندما وصلنا قبل عمر أبي وأمسك بيدي
وبدأت أغنية الرقصة الأولى لنا .. كنت قد اتفقت مع السدي
جى على أغنية جديدة أحببتها ولكن...

"وأقولك إيه وانتي كل ماليا .. وأقولك إيه هداي ربي
بهديه..يافرحة قرية مي.. يا أقرب روح بتفهمني ..ياكمل
دنيي وديني وحبك نبضي وفي دمي ..يا أجمل حاجة جوايا
..إيمانك وحده ده كفايا..صبرت كثير ..قابلت كثير....
لقيتك إنتي دنيايا....ومين غيرك بيّفهمني على الطاعة وبيعي
..يا نعمة ربي في الدنيا ...ولو تاخدي السنين مني ماهو من
غير ما تتمني عشانك عمري بالثانية

"*(مصطفى محمود، ألبوم قلب كبير)

ومال عمر على أذني "دي إهداء مني ليكي يا حبيبي" وقبلني
في خدي وطبعاً سمعت لحظتها الياهووووووو من أصحابنا
وشباب العميلة .

كنت مكسوفة قوي وأنا في حضن عمر (بس اليرفان بتاعه
يجنن) كنت بأحاول أركز في كلمات الأغنية التي لم أسمعها من

قبل وكنت أهرب من عيون عمر التي تلاحقني بالنظر إلى بذلته
(إيه ده؟ ده ديبوس الكرافت اللي جتتهوله بعد
الشبكة....والزراير أهى) نظرت له ولسه هاسأله أجابني "كانوا
معايا من ساعتها وخذقم معايا دبي كمان ورجعوا معايا...هما
كمان كانوا مستنيين يوم فرحنا" على الرغم من إني لمضه
ومايباطلش كلام إلا إن لساني إنعقد فعلا! ووجدت نفسي
بخجل شديد أقبله قبله سريعة على خده فضمني إليه بشده
"عمر بابا والناس!"

"ماحدش ليه عندي حاجة" ثم قبلني!

سارة

كريم (خطيب ريهام) "ماتيجي نرقص زيهم"
ريهام: "إنت بتقول إيه هو إحنا لسه اتكتب كتابنا!"
كريم: " خلاص آسف .. طيب البوفيه فين أنا جعان؟"
"أقعد يا كريم لحسن والله.....!"
فاطمة: "يللا نرقص معاها يا حبيبي"
إيهاب: "بس ده مش غلط على الحمل؟"
فاطمة "لأ ماتقلقش ده رقص هادي"
إيهاب "إتفضللي يا أم عتريس!"
فاطمة: "عتريس في عينك!"
جميلة: " شفت ترتياني ..أنا وريهام وعمر اللي خططنا كل
ده من ورا سارة"
خالد: "وانتي اتكلمتي مع عمر إمتى؟"
جميلة: " كلمني من أسبوع عشان اطبط مع البنات موضوع
الوقوف في صفين وأكلم الذي جي يغير أغنية الرقصة الأولى"
خالد: "وجاب رقمك منين بقى"
جميلة (ضاحكة): "خالد انت بتغير؟!"

خالد: "أغبر من مين؟"

جميلة: "لأ ما تخافش عمر بيحب سارة ومش شايف حد غيرها"

"وأنتي؟"

"أنا..... أنا يا حب حد ثاني "

بابتسامه خبيثة "مين بقي؟"

"يا حب ربنا طبعاً"

هايدي (على الموبايل): "أيوه يا محمد انت فين ،الفرح ابتدا وإننت لسه ماجيتش...طب يلا بسرعة".

مي : "كويس إن محمد جاي أنا محمد جوزي قعد في البيت مع إسلام"

هايدي: "ما محمد كان عايز ياخذ جنا ويروح عند أمه بس سارة كلمته إمبراح وأكدت عليه يجي عشان كده اتكسف وجهه"

تامر " هيا البنات هترقص إمتي عشان نرقص معاهم؟"

عادل: "ما فيش بنات هترقص غير مع إجوازهم زى مانست شايف"

تامر "هو ده رقص؟"

على "فاكر فرحي بقي؟"

تامر: "آه ده كان فيه شوية مزز!!"

عادل: "خلاص في فرحك إبقى أرقص أنت والعروسة
بلدي وهتلاقى كل البنات يرقصوا حواليكم"

تامر: "ليه وأنا هاخللي مراتي ترقص ؟!"

(يظهر أحمد)

على: "ابني بطل تصوير وتعالى أقعد معانا ما فيه مصورين
في الفرع"

أحمد: "مش هيصوروا زيني، ده فرح عمر ولازم اصوره"

تامر: "طب روح صورلنا البنات"

على: "آه روح بس صورلنا الحلوين بس"

عادل: "عيب عليكم... وإنت يا متحوز لم نفسك"

أحمد: "طيب ماتنسوش إننا هنعمل دايرة حوالين العريس
والعروسة ونرقص حواليكم وانتوا عارفين الباقي"

الأصدقاء

"تعرف إنك أحلى من العريس خصوصا لما كنت ماسك
إيد سارة وواخدهاله"

"انتي اللي عيونك حلوة يا هناء"

"يعني أنا أحلى ولا بتتك"

"كل حلوة بنتي حنة من جمالك يا حبيبة عمري"

"طيب تسمحلني بالرقصة دى معاك يا عامر بيه"

"طبعاً يا سمو الأميرة"

بابا وماما سارة

"يا اسماعيل ما يصحش تعيط كده، ده فرح الواد.. هتخليني
أعيط أنا كمان أنا ماسكة نفسي بالعافية"
"ده أول فرحتنا يا جيهان عقبال مروة يارب"
"ان شاء الله تفرح بمروة وبغياهم كمان"
"ياااا... بس اطمئن على مروة مع واحد ابن حلال..
بتعطي ليه دلوقتي انتي كمان"
"افتكرت إن مروة هتسييني هيا كمان في يوم من الأيام
عشان تحوز"

بابا وماما عمر

انتهت الأغنية التي اخترتها لسارة ووجدت مصطفى أخو
سارة يتقدم مع شلته ويطلبوا مني الجلوس لبدء عرضهم. جلست
أنا وسارة على الكوشة التي صممها سارة ديكورها بنفسها
وأمسكت يديها وقبعتها. بمجرد جلوسنا فرفعت هي الأخرى
يدي وقبعتها. نظرت إلى عينيها وودت لو ينتهي هذا الفرع
الآن!

"عينك شكلها تعبان"

"انت عارف إني مانتش من يومين"

"طيب لما نطلع فوق نبقى نريح وتناميلك شويه عشان
بالليل تبقي مصحصة لما نزل نتعشى"

"أنا قتللك قبل كده إني بحبك؟"

"مش فاكرو..فكريني كده"

فمالت على أذني وهمست "بحبك يا عمر" واضح أن باغير
من ودي لأن جسمي كله ارتجف! ثم جاءت أمي و أبي وعمي
وطنط ليقفوا حولنا وناولوني أمي الهدية التي أحضرها لسارة

"ساعة ماجبتلك الشبكة كان نفسي أجيبلك أحلى حاجة
في الدنيا، يارب تعجبك هديتي دي واعتبريها باقي الشبكة"

"ياحبيبي ماكنش لازم تكلف نفسك تاني كفاية تكاليف
الفرح"

"هو انا عندى أغلى منك يا حي؟ هو أخوكي هيعمل
إيه مع أصحابه؟"

"مصطفى ده دماغ وأصحابه زيه"

رقص مصطفى مع أصحابه عدة رقصات عجيبة ولكن ما
أعجبنى فعلا عندما قام واحد ممتلى منهم بارتداء عباءة وعقال
وشغل الذي حي أغنية "ما أروعك" وصاحبه يمثل أنه يغنيها
وأضحك جميع المعازيم. ثم قدموا عرض باليه قامت به فتيات
صغيرات. وبعد ذلك قام مصطفى بتجميع جميع الشباب في
الفرح وشدوني من جنب سارة شد (أنا ماكتتش عايز أقوم!)
وظللنا نرقص وعلصت منهم وعدت لسارة وإن كانوا طبعاً
ماعنوهاش

تامر: "يا بني ما أنت قاعد معاها على طول بعد كده"

على: "سيه يا تامر وبلاش الحقد ده"

واقترب الفرع من نهايته لأننا قررنا أنه لن يطول أكثر من
ساعتين وجذبني أصدقائي وحذبتها صديقاً لنعوم بلعبة القطار
المعتادة وخللها سلمنا على جميع المعازيم وتقابلنا في النهاية التي
كنت أخشاها لأني عارف أصحابي هيعملوا إيه وطبعاً عملوا

الدائرة وفجأة وجدتني بالتخطف لفوق وقبل ما أقع أتحذف ثاني
(حسي الله ونعم الوكيل) الذي عملته في اصحابي في حوازا هم
بيترد لي!

عمر

قلبي كان ها يقف لما حذفوا عمر لفوق وكنت هازعق لهم
بس لما لقيت الكل بيضحك حتى عمر نفسه سكت. يللا أهو
الفرح قرب يخلص لأن البوفيه هيتفتح وعلى رأى ماما " مادام
المعازيم كلوا يبقى خلاص هيمشوا!" وأنا خلاص عايزة أنام
مش قادرة أفتح عيني.. متهيألى لو ماكانش الفرح الصبح
لكنت نمت فى الكوشة. مش مصلقة اللي عمر عمله
ده.. معقولة مع كل مشاغله والمصاريف اللي عليه يروح يجب
هدية غالية كده!

(بعد فتح البوفيه)

طبعاً قطعت أنا وعمر التورته وأطعمته بيدي وأطعمني بيده،
وعلى الرغم من أنني مختارة التورته بنفسى إلا إنى ما أقدرتش
أكل غير القطمة اللي إدهالى عمر، أما هو ماشاء الله فأكل
قطعتين و٢ حاجة ساقعة.. هو رفيع كده إزاي مع كل الأكل
ده؟! "

"يا حبيبتي الراجل مننا محتاج طاقة جامدة عشان كده بناكل
كثير"

"طاقة جامدة؟! طيب يا عم البطارية"

هو عايز طاقة ليه هو مش قال إن إحنا هتنام لما نطلع فوق؟! "

سارة

لسه كمان هنروح للمصور فى الفندق بعد الفرح. إحنا
مش هنخلص ولا إيه؟ ياترى بابا وماما وبابا ومامتها هيطلعوا
معانا الغرفة فوق؟! هيسيه أخيراً موسيقى الزفة النهائية!

عمر

كويس إننا لسه قدامنا موضوع المصور ده..هو الفرح
خلص بسرعة كده ليه؟ لما اتفقت مع عمر إنه يكون ساعتين
كان متهيأ لي إنهم هيكونوا وقت كبير...ده أنا لسه كنت
بارقص معاه الرقصة الأولى!

سارة

(عند المصور)

عايزك تحضنها وتميل عليها كأنك هتبوسها

سارة: "لا"

عمر: "خلاص خلاص كفاية الصور اللي خدناها"

طيب صورة كمان وأنت حاضنها وكأنكم بترقصوا

(على السلم) والجميع خلفهم

يارب بابا وماما يدخلوا الأرضة معانا ويقعدوا شوية

سارة

يارب يستنوقوا ويسبيونا بقى

عمر

وأخيراً في الغرفة

"مبروك يا عروسة"

تمت بشيء ما

"انتي لسه نعسانة يا حبيبتى؟"

واقترب مني، وذهب النوم من عيني!!!

